



AVA YIPINDAR YUVIRECOI VAHE

**Historias del
Antiguo Testamento**

AVA YIPINDAR YUVIRECOI VAHE

Historias del Antiguo Testamento

Guarayu

Publicado por
El Instituto Lingüístico de Verano
Cochabamba, Bolivia

Septiembre 1985
510

Traducido por
El Comité Guarayu
en colaboración con
El Instituto Lingüístico
de Verano

AGRADECEMOS
a la
Fundación David C. Cook
Elgin, Illinois, E.U.A.
que nos ha provisto los dibujos

INDICE

1.	YIPINDAR IVI APO RAMOSENDAR	
1.	Tūpa ivi apo agüer	1
2.	Tūpa ava apo agüer	3
3.	Yipindar ava oyavi mbahe aracahe	5
4.	Tūpa oñemotrosa ava upe aracahe.	6
5.	Caín iyavei Abel recocuer.	9
6.	Enoc recocuer.	11
7.	Noé oyapo arca aracahe	11
8.	Amarusu ivi mocañi agüer	14
9.	Tūpa remimombehucuer Noé upe	15
10.	Tūpa ava ñehe opa osecuñaro Babel ve . .	17
2.	ABRAHAM, TŪPA MBORIPAR ARACAHE	
1.	Tūpa oñehe Abraham upe	19
2.	Abraham, Lot rese oyepepi oyesui yuvireco	20
3.	Abraham osep iohir Lot.	21
4.	Melquisedec aipo osovasa Abraham	22
5.	Ismael haragüer.	23
6.	Abraham suindar icuapri imbocircuncidasa rese.	24
7.	Mbosapi cuimbahe Tūpa suindar yugüeru Abraham piri	25
8.	Tūpa omocañi tecua Sodoma iyavei Gomorra	26
9.	Isaac haragüer	28
10.	Ismael osē Abraham rēta sui.	28
11.	Tūpa osecōha Abraham.	29
12.	Abraham rembiguai oseca Isaac rembirecorā.	31
3.	ISRAELITA RAMOI JACOB	
1.	Jacob iyavei Esaú, ahe yuvirecoi Isaac rahir.	33
2.	Jacob ombopa vu.	34
3.	Jacob oñemi güeta sui.	36

**9. SAUL, DAVID IYAVEI SALOMON ISRAEL RERECUAR
YUVIRECOI**

1. Saúl, mborerecuar guasu yipindar vahe Israel ve	124
2. David ovesa rārosar secoi.	126
3. Tūpa David oiporavo mborerecuar seco áqua.	128
4. David oyuca filisteo yeroyasa Goliát serer vahe.	128
5. David Jonatán rese oyembort ai yuvireco.	131
6. Saúl ndoyambotai David.	132
7. David pan sovasaprí ohu aracahe. . . .	133
8. David ndoyapoi eté mbahe Saúl upe. . .	133
9. Saúl oso cuña ipaye vahe upe mbahe cua áqua	135
10. Saúl iyavei tahir Jonatán mano agüer .	136
11. David mborerecuar secoi cute	136
12. David oyemboangaipa.	137
13. David oporandu Tūpa upe ñerosa rese. .	138
14. Nuvirio David rahir oyamotaréh vu yuvireco	140
15. Salomón mborerecuar yáracuá vahe secoi	140
16. Túparo icatupri vahe oyapo Salomón . .	143
17. Salomón oyepepi Túpa sui	145
18. Israel pendar oyemboyaho yuvireco. . .	145

**10. TŪPA ÑEHE MOMBEHUSAR ELIA IYAVEI
ELISEO RECOCUER**

1. Mbosapi aravíter yemombítesa rupi omombita Tūpa amar.	147
2. Elía iyavei Baal recocuer mombehusar .	149
3. Elía ñemi agüer.	152
4. Acab oipota rai Nabot uva tì	153
5. Elía oso tìvare, nomanoi eté.	155
6. Eliseo oyapo poromondiisa.	157
7. Naamán lepra sui imbogüerasa	159
8. Tūpa ombosiquiyé Israel amotaréhisar Siria pendar yuvirecoi vahe	161

9.	Jonás oñemi Tūpa sui viña	162
10.	Jonás ombooyeroya Tūpa cute.	164
11.	Tūpa omombo norte contiñdar israelita yuvirecoi vahe oivit sui	165
11.	IVI IROHÌ COTIÑDAR JUDAS RERECUARETA, IPIPENDAR TŪPA ÑEHE MOMBEHUSARETA AVEI	
1.	Judá rerecuar yuvirecoi vahe.	167
2.	Mborerecuar Joás aviyé vahe	167
3.	Tūpa omboyecka mbahe oñehe mombehusar Isaía upe.	168
4.	Mborerecuar Ezequía aviyé vahe.	169
5.	Josía oyosu Tūpa porocuaita icuachiapri	170
6.	Tūpa oiporavo Jeremía oñehe mombehu água.	171
7.	Mborerecuar Joacim osapí Tūpa ñehe cuachiapri.	173
8.	Jeremía imombara+susa Tūpa ñehe mombehu sui tēi	174
12.	JUDIO ETA BABILONIA VE YUVIRECOI	
1.	Judá pendar ipisipri yuvireco	175
2.	Judio yuvirecoi vahe soquendapri Babilonia ve.	176
3.	Daniel recocuer	178
4.	Mborerecuar Nabucodonosor recocuer. .	179
13.	JUDIO GÜECUAVE YUVIRECOI IRISE	
1.	Judio oyevi güecuave yuviraso	180
2.	Omopuha iri judío tūparo yuvireco . .	182
3.	Esdras oporombohe Tūpa Nehengagüer rese.	183
4.	Nehemías omopuha Jerusalén áchisa . .	184
5.	Malaquías omombehu yande Yar yu água. .	185
14.	JESUS YU RENONDE OPA 400 ARAVITER MALAQUIAS PARE	186



1. YIPINDAR İVİ APO RAMOSENDAR

1. Tūpa ıvı apo agüer (Génesis 1)

Aracahe Tūpa oyapo ıva, ıvı avei no. Yipindar rumo pītuño tēi. Ndipo vītei eté arı, yasıtata avei.

Evocoiyase Tūpa aipo ehi:

--; Toime icatu vahe! --ehi.


Aheseve voi oime icatu vahe.

Ipare aipo ehi:

--Icatu vahe rer-ra arı; ndicatui vahe rer-ra evocoiyase pītu --ehi.

Ahe yipindar vahe arı.

Imoñuviriosa arı rese oipeha i mbahe pītu reime āqua ıva rese iyavei para guasu reime āqua ıvive.



Imombosapisa arī rese oipeha † ivi sui. Iyavei oyapo capihi, ivira avei. Nepei ivira yacatu omondo ihaguā, sāhitirā avei.

Imoirungatusa arī rese Tūpa oyapo arī poroesape āgua. Evocoiyase pītu resape āgua oyapo yasī, yasītata rehī avei no.

Imbopoyandeposa arī pīpe Tūpa oyapo pira rehi. Iyavei opacatu mbahe i porā oyapo, oyapo avei i vate rupi oveve vahe.

--Opacatu mbahe che rembiapo toyemboeta yuvireco, tombopopa i, i va yuvireco --ehi Tūpa.

Imoñepei ovasa arī pīpe Tūpa oyapo opacatu mbahe mimbā eta ivi porā, ahe: guaca, ovesa, cuchi, cave, yaguar, mboi iyavei opacatu ambuae mbahe.

Oñehe pīpe tēi oyapo co opacatu mbahe. Güembiaapo repiase,
--Aviye ité --ehi aracahe.

2. Tūpa ava apo agüer (Génesis 1, 2)

Ipare Tūpa oyapo ava ivi sui. Ahe secove água omondo, iyavei co yipindar ava rerguā omundo Adán.

Ichui oyapo mbahe miti rēta Edén; ahe inungar cove icatupri vahe Adán remiaroguā. Ipare Adán opacatu omondo mbahe mimbā rerguā.

Ahese Tūpa aipo ehi:

--Co mbahe mimbā opacatu ava upe nara --ehi.

Ichui aipo ehi iri:

--Ndiyai cuimbahe ahe ae seco água. Ayapora induguerā --ehi.

Evocoiyase omongue Adán, aheseve ñepei osequi ñaruca ichui. Ipare ñaruca sui oyapo cuña. Omahese Adán, osepia cuña Tūpa oyapo vahe chupe nara. Oyembovharete sese iyavei oipota rai eté. Omundo sererguā Eva. Evocoiyase, cuimbahe oyepepíra oyesupa sui güembireco rese güeco água, ahese oyeapora ñepei ava nungar yuvireco.



Cuimbahe, cuña reseve nani tupri yuvirecoi, ndoyuvinochi eté rumo. Ipare Tūpa oñehe chupe aipo ehi:

--Pe rahiratira peico. Opacatu mbahe mimbá cuaisar peicora. Pe remihura mbahe miti, mbahe ha avei; mbahe mimbá remihura aveira no --ehi.

Evocoiyase osepia opacatu mbahe güembiapocuer. Ahe avíye tupri ai chupe. Ahese soriveté.

Imoñuvirío ovasa arí pipe Tūpa opituhu opacatu
oporavíquisa sui aracahe.

3. Yipindar ava oyaví mbahe aracahe (Génesis 3)

Yipindar aipo ivi avíye aracahe. Aheve Adán yuvirecoi güembireco Eva reseve mbahe miti rēta Edén pipe. Ahe miti rēta aipo icatupri ai aracahe. Aheve Tūpa aipo ehi chupe yuvireco:

--Pehura co opacatu ivira ha --ehi aipo.

Iyavei aipo ehi chupe no:

--Co catu ñepei ivira ha mbiterve ihái vahe ndapehui chira --ehi--. Acoi ava ohu vahe co ivira ha, ahe oicuara mbahe avíye vahe iyavei mbahe naporai vahe; ipare rumo omanora --ehi aipo yande Ru Tūpa chupe aracahe. Ipare osoño.



Ahese Caruguuar oique mboi pîpe ava mbopa āgua. Ipare coiye rumo ou aipo oporandu Eva upe cute aipo ehi chupe:

--¿Ndohu uca potai eté Tūpa opacatu co ívira ha mbahe miti rēta pípendar pēu? --ehi tēi chupe.

Evocoiyase aipo omboyevi mboi upe aracahe:

--Opacatu orohu co ívira ha; co catu acoi ívira mbiterve ihāi vahe, ahe ndipotasai oreu --ehi--. Iyavei Tūpa aipo ehi oreu: "Acoi pepocose sese, pehuse, pemanora" ehi oreu --ehi aipo mboi upe aracahe.

Mboi rumo aipo ehiño chupe no:

--¿Ndapemanoi chira! --ehiño tēi--. Acoi pehuse co ívira ha, ahese pe mbahecua catura --ehiño tēi chupe--. Peico aveira Tūpa nungar. Peicuara mbahe avīye vahe, naporai vahe --ehiño tēi mboi imbopa aracahe.

Ahese Adán rembireco omahe evoco ívira ha rese, icatupri ai chupe. Ahese aipo ohu aracahe. Ichui ahe ohu pare, omondo avei omer Adán upe 'tohu' oya. Evocoiyase aipo ahe ohu avei no. Ichui opase ohu yuvireco, ahese aipo oicua ramo nani güeco yuvireco. Ichui aipo yuvirnochí tēi oyesui. Iyavei osiquiye tēi avei aipo yuvireco, ahese aipo caha ro tuvicha vahe ombovívi oturucuarā yuvireco aracahe.

4. Tūpa oñemotrosa ava upe aracahe (Génesis 3)

Caharuse aipo Tūpa ou Edén ve aracahe; ahese aipo Adán oñemi güembireco reseve ívira pāhu rupi yuvireco ichui. Sese aipo Tūpa oñehe chupe aipo ehi:

--Adán, ¿que vo ereico? --ehi chupe.

Evocoiyase aipo omboyevi Tūpa upe aipo ehi:

--Asendu tēi nde ñehe. Che rumo asiquiye nde sui, sese añemi --ehi--. Esepiá, nani tēi aico --ehi Tūpa upe aracahe.

Evocoiyase aipo Tūpa oporandu chupe aipo ehi:

--¿Ava omombehu nani nde reco ndeu? --ehi aipo chupe.

Ipare aipo oporandu chupe:

--¿Erehu vo ivira ha acoi, "Nderehui chira" ahe vahé ndeu? --ehi aipo chupe.

Evocoiyase aipo omboyevi iñehe chupe aipo ehi:

--Co cuña acoi erembou vahé cheu, ahe ombou co ivira ha cheu; ahe ahu --ehi Tūpa upe aracahe.

Evocoiyase Tūpa aipo ehi sembireco upe:

--¿Mbahe nde ereyapo? --ehi chupe.

Eva evocoiyase omboyevi iñehe chupe:

--Mboi che mbopasa aroya; sese ahu --ehiño aipo Tūpa upe aracahe.

Evocoiyase aipo Tūpa aipo ehi mboi upe:

--Nde ereyapo mbahe tēi cüritei; sese nde che ñemoirosa pípe ereicora; ereguatara nde pochiha rese --ehi aipo mboi upe aracahe.

Evocoiyase aipo ehi iri mboi upe:

--Cuña rese ndapeyeambotai chira --ehi--.

Iyavei nde suindar co cuña suindar rese ovavara yuvireco oyeupe. Iyavei cuña suindar omomarara nde áca. Nde evocoiyase ereichuhura ipitave --ehi aipo mboi upe aracahe.

Ipare aipo Tūpa aipo ehi cuña upe:

--Acoi nde membira potase, tasira ndeu --ehi--.

Ereipotara nde mer iyavei nde cuaise ereroyara --ehi aipo Tūpa Eva upe aracahe.

Cuimbahe upe avei aipo ehi:

--Nde rembireco ñehe reroyasave nde erehu co
t̄v̄ira ha acoi che orocuai vahe co, "Nderehui
chira" ahe acoi ndeu; sese nde ereporav̄qui
p̄iratara ar̄i yacatu rupi nde remihura rese yepi
--ehi--. Iyavei sor̄ira yu t̄v̄i rese ndeu --ehi
chupe--. Nde niha eresē t̄v̄i sui; t̄v̄ive avei
ereyev̄i irira --ehi aipo Tūpa Adán upe aracahe.



Ahese ramo aipo Tūpa omondo Adán iyavei Eva turucuarā mbahe pirer aracahe. Ichui aipo Tūpa omboyepepi Edén sui yuvireco cute 'toyuvirohu eme ité tivira ha tecovesa resendar' oya chupe 'yuvirecove tietera apirēhi vahe yuvireco' ohesa pipe aracahe.

5. Caín iyavei Abel recocuer (Génesis 4)

Eva membrí aipo oime ñuvirio aracahe. Yipindar cuacua vahe aipo serer Caín; ambuae chihivahe catu aipo Abel serer. Caín aipo oporavíquí vahe cove rese yepi. Tívrí rumo aipo ovesa rārosar.

Ñepei arí pipe aipo Caín güeru oporerecosa mbahe ha Tūpa upe. Iyavei aipo tívrí ogüeru oporerecosa Tūpa upe ñepei ovesami. Ahe tívrí porerecosa Tūpa oipisi. Tiquehir porerecosa rumo aipo Tūpa ndoipisi. Sese aipo oñemoiro aracahe. Evocoiyase aipo no Tūpa oporandu chupe:

--¿Mahera ereñemoiro? --ehi--. Acoi ereyapo tuprise mbahe, ahese ereicora che rupi --ehi Tūpa chupe--. Acoi aní etese, nde erereco angaipa --ehi Tūpa Caín upe aracahe.

Cain rumo aipo oñemoiro etepríño ité oico. Ichui aipo yuvirecoise amombrí rupi, aheve aipo vivri oyuca aracahe.

Ipare rumo aipo Tūpa oporandu voi aipo ehi chupe:



--Cáin, ¿que vo nde rívrí? --ehi aipo chupe.
Evocoiyase aipo omboyeví iñehe Túpa upe aipo
ehi:

--Che ndaicuai, ndahei che rívrí rārosar aico
--ehiño aipo Túpa upe.

Evocoiyase aipo Túpa aipo ehi chupe:

--¿Mbahe vo ereyapo? --ehi--. Nde ereyuca nde
rívrí --ehi--. Sese mbahe rāhíi ereñotí vahe,
ndasoríi chira íví rese ndeu --ehi--. Iyavei nde
ae ereguatara co íví pípe eico --ehi Túpa chupe
aracahe.

Evocoiyase aipo omboyeví Tūpa upe iñehe aipo ehi:

--¡Too, che rerocuaivisa mbahe tēi pípe! --ehi tēi--. ¡Che ae aguatase rumo, che yucara ambuae yuvíreco! --ehi tēi aracahe.

Ipare rumo Tūpa aipo ehi chupe:

--Acoi oimera ava nde rereco megusar, ahe chupe rumo che ayapora mbahe tēi catu no --ehi aipo Caín upe Tūpa aracahe.

Evocoiyase aipo oyeupe he pare aipo Caín oso ambuae iví rese aracahe.

6. **Enoc recocuer** (Génesis 5)

Setá aravíter pare aipo Enoc setá aravíter avei oguata Tūpa rupi oico aracahe. Ipare rumo aipo coiye ndosepia iri yuvíreco cute. Esepia, Tūpa ité niha aipo vīraso ivave aracahe.

Ahese ava yuvírecove pucu ité iyavei guahír vireco atí yuvíreco yepi.

7. **Noé oyapo arca aracahe** (Génesis 6)

Ipare rumo aipo ahe ava yípíndar yuvírecoi vahe mbahe-mbahe tēi oyapo Tūpa rovaque yuvíreco. Ndovíroyai oaposar. Êgue ehi aipo ava yípíndar yuvírecoi vahe aracahe. Evocoiyase Tūpa ipíhañemoñeta iri aipo ehi:

--Ayapo tiête ava vichico --ehi aipo opíhañemoñeta pípe.

Ahese ahe omboas† oyeupe cute aipo ehi:

--Opara mo ava che rembiapocuer amocañ† --ehi aracahe.

Ahese aipo oime ñepeíño ité mb†a seco catup†i vahe Tūpa rovague. Ahe Noé. Chupe Tūpa aipo ehi:

--Cûritei opacatu ava mbahe-mbahe tēi oyapo yuv†reco che rembiepiave --ehi--. Sese amondora icañ†sa yuv†reco chupe --ehi--. Opara amocañ† amarusu p†pe --ehi.

Ipare aipo aipo ehi chupe no:

--Nde año ereico tup†i vahe yepi --ehi--. Sese eyapo arca tuvichá vahe peyeupe nde rembireco, nde rah†r iyavei mbosapi nde rovayar upe nara avei --ehi aipo chupe.

Ipare aipo ehi iri chupe:

--Eyapo co iv†ra o† nungar mbosapi oyoha vahe --ehi aipo chupe iyavei aipo omombehu yapo āgua pucucuer ciento treinta y cinco metro tup†i.

--Eipichi tup†i ip†pe, ocar cot† avei mbahe ipomo vahe p†pe --ehi aipo Tūpa chupe.

Ipare aipo ehi:

--Emoingue arca p†pe opacatu mbahe m†mba ñepeí-peí cuimbahe cuña reseve iyavei v†rai, mboi avei --ehi--. Emoingue avei siete v†rai aviye vahe iyavei mbahe m†mba aviye vahe --ehi aipo Tūpa chupe.

Ipare aipo aipo ehi chupe no:

--Emoingue avei ihup†i peyeupe, mbahe m†mba upe nara avei --ehi aipo Noé upe Tūpa aracahe.

Ahe evocoiyase Noé opa ité omboav†ye aracahe.



8. Amarusu ḫv̄t mocan̄t agüer
 (Génesis 7)


Evocoiyase aipo opase mbahe omoingatu, ahese aipo Tūpa aipo ehi Noé upe:

--Eique arca p̄ipe cute --ehi aipo chupe.

Ipare opase aipq yuv̄troique, ahese Tūpa ité omboya oquenda chupe.

Ipare voi aipo oquí ari, p̄itu reseve aracahe. Cuarenta ari p̄itu reseve aipo oquí. Ahe ḫ aipo ḫv̄itri opa tupri oyopi aracahe. Ahese aipo ava opa tupri omano yuv̄ireco. Esepia, ndipo iri iyoepi āgua; sese opaño ité ava omano yuv̄ireco.

Evocoiyase aipo Noé güembireco reseve, mbosapi tahir, güembireco reseve-seve, ahe güeraño aipo oñepisiro arca p̄ipe yuv̄ireco aracahe. Iyavei aipo mbahe mimba yuv̄troique vahe arca p̄ipe, ahe avei oñepisiro yuv̄ireco no.



Seis yasî rupi aipo ̄vî i opa tuprî oyopî.
 Evocoiyase aipo Tûpa güeco pîpe ombou iri
 ̄vitu. Ahese aipo i tipa oso cute. Egüe ehi aipo
 co amarusu aracahe.

Evocoiyase aipo imbosietesa yasî rupi arca
 oguapi ̄vitri Ararat harîve. Ipare imondiesa yasî
 rupi osepia ambuae ̄vitri yuvireco. Ahese Noé
 ovîha yuvireco cute.

Evocoiyase aipo Noé ñepei vîrai omose imondo
 'tosepia ̄vî ipiru vahe' oya viña. Ahe vîrai rumo
 aipo oseca têi ̄vî ipiru vahe aracahe.

Ipare aipo omose ñepei apicasumi imondo no.
 Ahe apicasumi rumo aipo ndoyosui avei ̄vî ipiru
 vahe. Sese aipo ahe oyeviño arcave ou.

Ñepei semana pare aipo omose iri apicasu
 imondo. Ahe rumo aipo oyevi arcave ou, güeru caha
 ro ochi rese cute. Egüe ehi aipo sâha aracahe.

Ichui aipo ambuae semana pare aipo omose iri
 imondo. Ahe ndoyevi iri arcave chupe. Sese aipo
 oicua ̄vî piru cute. Evocoiyase aipo omboi arca
 roquenda ̄vî repia.

Ipiru tuprise, ahese Tûpa aipo ehi Noé upe:
 --Pesëpa arca sui opacatu reseve --ehi Tûpa
 chupe.

Ahe Tûpa ocuaita oyapo aracahe.

9. Tûpa remimobehucuer Noé upe (Génesis 8, 9)

Noé, sembireco, opacatu guahîr reseve,
 --Aviye ndeu --ehi Tûpa upe yuvireco arca sui
 yuvinosere. Esepia, Tûpa niha oipisiro arca pîpe.
 Sese avei omondo oporerecosa evocoi siete vahe
 mbahe mimba, vîrai avei mbahe reropovëhesa renda

ita apopri harive yuvireco. Êgüe ehi oporerecosa
mondo Túpa upe aracahe. Evocoiyase aipo Túpa
oviharete sese yuvireco. Sese aipo ehi:

--Che namocañi iri chira ava eta co amarusu
pipe --ehi chupe.

Ipare aipo ehi iri chupe no:

--Che amondora co iva quïha rese arco iri ahera
icua äqua --ehi--. Iyavei ava yemomahenduha äqua,
"Ndipo iri chira amarusu yande cañi äqua" he äqua.



Esepiā, namocañt iri chira ava eta amarusu pīpe curi --ehi--. Ahe che amombehu pēu --ehi chupe.

Evocoiyase aipo Tūpa osovasa Noé, tahir reseve. Aipo ehi avei chupe yuvīreco aracahe no:

--Perecora setá pe rahir pembopopara ivi --ehi aipo Tūpa chupe.

Ipare aipo ehi iri chupe:

--Pe niha peyocuaira opacatu mbahe mimbā --ehi.

Aipo ehi avei Tūpa chupe yuvīreco:

--Yipindar pe caha ro tēi pehu, mbahe ha tēi avei. Cūritei rumo pehura mbahe roho avei --ehi aipo Tūpa chupe.

Ēgue ehi Noé Tūpa ocuaita oyapo tuperise oico aracahe, ipiye sui oñepisiro. Iyavei opacatu tahir oñepisiro avei yuvīreco aracahe.

10. Tūpa ava ñehe opa osecuñaro Babel ve (Génesis 11)


Coiye catu, ava rehī oimese, ahe ñepei ñehesa pīpe pāve oñehe yuvīreco. Seta ava aipo ehi yuvīreco:

--Yayapo ñepei tecua guasu, torre avei yayapora, ahe yamboye potara ivave imondo --ehi yuvīreco--. Ipiye sui icuaprī ité yaicora, sese ndayaye pepiti chira opacatu ivi rupi yandeyesui --ehi yuvīreco aracahe viña.

Evocoiyase Tūpa omahese tecua rese, torre rese avei, ahese aipo ehi:

--Co ava tecua pīpe yuvīrecoi vahe oyoya pāve ipthañemoñetasa yuvīreco, ñepei avei iñehe

yuvireco. Co tecua iyavei co torre omboyepta
pota ivave yuvireco. Asecuñaropara rumo iñehe
yuvireco ichui. Evocoiyase tosenducua eme oñehe
yuvireco --ehi Tūpa.



Ichui ava eta nomboavíyei tecua guasu yuvireco.
Ipare opa oñemosai opacatu ivi rupi yuvireco.
Nepei-pei ava oñehe güembireco rese oñehe pípe ahe
ae yuvireco.

Sese tecua rerguā oso Babel. Esepio, aheve
Tūpa osecuñaropa ava ñehe.

2. ABRAHAM, TŪPA MBORIPAR ARACAHE

1. Tūpa oñehe Abraham upe (Génesis 12)

Setá aravíter pare aipo aracahe, ñepei mbia Abraham serer vahe secoi. Tūpa aipo ehi chupe:

--Abraham, esē co nde recua sui. Eseyapaño nde mu. Eso co ambuae ivi rese, acoi amboyecua vaheräve ndeu. Iyavei nde rahir, ichuindareta oyemboetara yuvireco. Oyeapora tecua tuvichá vahe yuvireco nde sui --ehi aipo Tūpa chupe.

--Iyavei nde recocuer sui opacatu tecua ivi rupindar sovasaprira yuvireco. Acoi ava mbahe oyapo tupri vahe ndeu, che avei ayapora mbahe tupri chupe. Iyavei acoi mbahe tēi oyapo vahe ndeu, che avei ayapora mbahe tēi chupe --ehi aipo Tūpa Abraham upe.

Evocoiyase Abraham seroyasa pípe oso oiviguáve. Ahe rumo ndoicuai ososa.



Vîraso güembireco Sara, oihîr Lot avei. Iyavei opacatu omabahe güembiguai reseve vîraso.

Ipare rumo oyepotase ̄vî Canaán ve yuvîraso, aheve Tûpa aipo ehi chupe:

--Co ̄vî amondora nde rahîreta upe --ehi.

Ahe rumo aipo vîrecose setenta y cinco aravîter, ahese oyepota Canaán ve yuvîreco. Ëgüe ehi Abraham Tûpa porocuaita mboaviye oico aracahe.

2. Abraham, Lot rese oyepeti oyesui yuvîreco (Génesis 13)

Iyavei aipo oime mbahe têi Abraham upe, oihîr Lot upe avei. Esepia, aipo Abraham setá guaca, ambuae mbahe mîmba avei vîreco aracahe. Iyavei aipo Lot vîreco atî avei no. Evocoiyase ̄vî ndiyai yuvîreco chupe. Sese aipo seimba rârosar ñemoeatêhi-têhi yuvîreco aracahe.

Evocoiyase Abraham aipo ehi oihîr upe:

--¿Umave vo ̄vî avîye catura ndeu? --ehi--.
Eiporavo ndeyeupe, aheve eresora --ehi chupe--.
Che evocoiyase asora ambuae ̄vî rese --ehi--. Co ̄vî rese yande ñemoeatêhi iriêhi âgua --ehi oihîr upe.

Evocoiyase aipo ihîr osepiase ̄vî iai Jordán pendar, avîye ité güepiase chupe. Aheve aipo capihi sovi tupri ai yepi, ëgüe ehi aipo chupe aracahe. Ahese aipo ihîr opa ahe ̄vî oipisi oyeupe nara. Evocoiyase aheve ahe oso aracahe.

Abraham evocoiyase oso ̄vî Canaán ve. Ahese Tûpa aipo ehi iri chupe:

--Co ̄vî amondopara opacatu nde rahîreta upe --ehi--. Esepia, nde rahîr nde suindar setara

oyesu inungar ūvīcuhi, ndayaicatui ipapa --ehi
aipo Tūpa imombehu chupe aracahe.



3. Abraham osepi oihir Lot (Génesis 14)

Ipare aipo iħir güecosa sui virovi-rovi catu
iri tecua Sodoma oso. Ichui rumo aipo
oyemboerecua ité tecua Sodoma ve cute. Iyavei
aipo ava ahe pendar ndaseco pōrai vahe yuvireco.
Mbahe-mbahe tēi avei aipo oyapo yuvireco oyeupe.

Ñepei ari pípe aipo yugüeru ambuae tecua pendar
ava ovava ava Sodoma īguar upe yuvireco aracahe.
Ovava pare, aipo oipisi Lot seraso yuvireco ambuae
ava reseve. Iyavei aipo setá iteanga mbahe oñomi
ava Sodoma īguar sui yuvireco.

Evocoiyase aipo ñepei ava ou Abraham upe iħiṛ mombehu.

Ahe ramoseve aipo Abraham ava reħiġi vħraso oħiħi reroyevi āqua ambuae ipiżipri yuvħirecoi vahe reseve. Iyavei aipo opa iri mbahe oñomi vahecuer vħroyevi yuvħireco ichui. Īgħie ehi Abraham Tūpa reco pīratasa p-iċċa aracahe.

Evocoiyase aipo oyeviše yuvħireco, ahese aipo mborerescuar Sodoma pendar oso sovaħchi.

Evocoiyase ahe mborerescuar omondo ati pota mbahe chupe aracahe viña. Abraham rumo ndoipiżi eté mbahe oyeupe nara ichui aracahe.

Evocoiyase aipo iħiġi oyevi iri oso Sodoma ve güeco āqua aracahe. Iyavei rumo aipo Sodoma, Gomorra iż-ġuwar mbahe-mbahe tēi vîteño aipo oyapo oyeupe yuvħireco, inungar aipo yipindar yuvħirecoi, īgħie ehi vîteño aipo yuvħireco aracahe.

4. Melquisedec aipo osovasa Abraham (Génesis 14)

Iyavei aipo aracahe Abraham oyeviše oħiħi recasa sui, aheseve avei aipo osavaħchi mborerescuar guasu Salém pendar, ahe serer Melquisedec. Ahe mborerescuar guasu aipo güeru pan, vino reseve chupe aracahe.

Evocoiyase aipo Melquisedec, ahe Tūpa eté iż-żebha pendar pahi, ahe aipo aipo ehi chupe:

--Tūpa tandek rovasa yepi. Esepija, ahe niha oyapo iż-żebha, iż-żebha avei no. ¡Ahe iż-żebha catu vahe iż-żebha pendar! Ahe avei niha nde pieti-żi nde amotar ħiġi sar reit iż-żebha āqua --ehi aipo chupe.

Evocoiyase aipo Abraham omondo oporerecosa Melquisedec upe opacatu mbahe güeru vahe sui, ñepei-pej diez mbahe sui, ñepei mbahe aracahe.

5. Ismael haragüer (Génesis 15, 16)

Ichui aipo Tūpa aipo ehi iri Abraham upe aracahe:

--Eresquiyei rene --ehi chupe--. Che amondora setá mbahe ndeu --ehi aipo Tūpa chupe.

Ahe rumo aipo ehi:

--Che rah̄r ndipoi --ehi Tūpa upe.

Ahese Tūpa aipo ehi chupe:

--Oimera ñepei nde rah̄r --ehi.

Ahese v̄roya Tūpa ñehe aracahe. Sese chupe, "Seco ūvi vahe ité" ehi. Aipo ehi avei chupe no:

--Co ūv̄ amondora nde suindareta upe --ehi.

Ēgue ehi Tūpa Abraham upe aracahe.

Iyavei aipo diez aravíter pare Abraham rembireco Sara aipo ehi chupe:

--Che ndachememb̄i ndeu --ehi--. Co rumo che remimboacua Agar secoi --ehi chupe aracahe--. Ahe ip̄pe nde rah̄ra viña --ehi aipo Abraham upe.

Evocoiyase aipo Abraham ēgue ehi aracahe, sese aipo Agar nomboyeroya iri omboacuasar Sara. Ipare aipo Sara ndoyambotai, ndosepia pota iri Agar aracahe.

Evocoiyase aipo Agar oñemi Sara r̄eta sui viña.

Tūpa rumo aipo oyemboyecua Agar upe ūgua rerovícave ūv̄ iporupitr̄eh̄isave, aheve Tūpa aipo ehi chupe aracahe: .

--Eyev̄i, tandememb̄eco rane Sara rese --ehi--.

Aheve tandememb̄ira. Ahe sereguā eremondora Ismael, ichui seta ava yuv̄inosera --ehi aipo chupe.

Ipare aipo Agar oyev̄i iri ou Sara r̄etave, aheve aipo imemb̄ira cute, ahe aipo omondo sererguā Ismael yuv̄ireco aracahe.

**6. Abraham suindar icuapri imbocircuncidasa rese
(Génesis 17)**

Abraham noventa y nueve aravíter vîrecose aipo, Tûpa oñeho iri chupe aipo ehi:

--Co che remimbotar ndeu nara: nde ava-ava têi ramoi ereicora --ehi--. Che nde Tûpaguão itera, nde suindar Tûpa avei aicora --ehi--. Amondo aveira co ívì Canaán ndeu, nde suindar upe nara avei apiréhì vaherã --ehi--. Nde evocoiyase nde rëta pendar cuimbahe opacatu reseve, pe suindar avei icuasara che remimbotar rupi pe guatasa circuncisión pîpe. Acoi ndoyembocircuncidai vahé, ahe pemboyepepíra peyesui --ehi aipo aracahe.

Iyavei aipo ehi avei chupe:

--Nde rembireco imembíra --ehi Tûpa.

Aipo oyeupe hese, Abraham opuca eté aipo ehiño:

--¿Mara orohe irira vo aipo ore rahì viña?

Esepia niha, che acuacuami --ehiño--. Iyavei che rembireco Sara ocuacuami avei --ehiño aipo aracahe.

Ipare aipo ehi no:

--Ndereipotai vo che rahìr Ismael --ehi aipo Tûpa upe aracahe.

Evocoiyase aipo Tûpa aipo ehi chupe:

--Sara, nde rembireco, imembíra --ehi aipo chupe--. Ahe sererguã eremondora Isaac --ehi Abraham upe.

Iyavei aipo ehi:

--Aipo che remimombehu chupe nara ité, ndahei chira Ismael upe nara --ehi aipo--. Isaac suindar ava setara --ehi aipo Tûpa chupe aracahe.

Ipare aipo Abraham, Ismael avei iyavei opacatu cuimbahe Abraham rëta pendar imbocircuncidasa yuvíreco aracahe.

7. Mbosapí cuimbahe Tūpa suindar yugüeru Abraham
p̄tri
(Génesis 18)

Ñepei ar̄ p̄ipe aipo Abraham oguapi oī voquendip̄ive, aheve aipo osepia mbosapí cuimbahe vovai. Ahese aipo oña oso sovañchi ipopist̄ yuvíreco. Ipare,

--Peiquemi che r̄etave. Pecarumi ranera --ehi ahe ava upe.

Ahese oyuca guaca rahir iquira catu vahe iyavei oyapo pan. Ëgüe ehi imbocaru tupri aí, yepe ndoicuai viña.

Ñepei ahe cuimbahe pāhu pendar aipo ehi chupe:

--Nde rembireco, Sara, imembira --ehi.

Osenduse ahe ñehesa, Sara opucaño. Esepia niha, ahe ocuacuami eté.

Yuvírocaru pare, ñuvírio cuimbahe Tūpa rembiguai yuvíraso Sodoma coti. Ñepei opitaño Abraham moñeta, ahe rumo Tūpa ité oyeapo ava nungar oico, ahese aipo ehi:

--Asora tecua guasu Sodoma iyavei Gomorra repia. Esepia, ava yuvírecoi mbahe-mbahe tēi p̄ipe aheve --ehi Abraham upe.

Ipare rumo Abraham ip̄hañemoñeta Lot rese, ahese Tūpa upe oporandu:

--Oimese 50 ava avíye vahe Sodoma p̄ipe, ¿eremocañipara p̄ha ava naporai vahe reseve avei? --ehi.

Tūpa aipo ehi:

--Oimese 50 ava avíye vahe, cheñeroñora opacatu upe co ava avíye vahe recocuer rese --ehi.

Evocoiyase oporandu iri:

--¿Mara ehira co oimese 45, 40, 30, 20 tēise; anise diez tēi? --ehi.

--Oimese diez ava aviyé vahe, ndamocañí chira tecua --ehi Túpa Abraham upe aracahe.

Evocoiyase Abraham oyeví güêtave, ichui Túpa osoño peri rupi.

8. Túpa omocañí tecua Sodoma iyavei Gomorra (Génesis 19)

Oyepotase ñuvirío Túpa rembiguai Sodoma ve yuvireco, Lot,

--Yaso che rêtave che piri, yacarumira; aheve avei pequera --ehi Túpa rembiguai upe.

Opacatu ava naporai, seco rai tēi vahe tecua pipendar,

--; Yanosepa sēta sui! --ehi Túpa rembiguai upe yuvireco.

Ahe ava yuvirecoveño ité imañeco tēi áqua, ahese Túpa rembiguai nomboesapiso iri opacatu omañecotēisar.

Evocoiyase Túpa rembiguai aipo ehi Lot upe:

--Túpa omocañira co tecua, nde rumo iyacatu nde rahir opacatu rese pesepara co tecua sui --ehi.

Lot rovayar co ñehesa ndovirayai yuvireco, ndoyuvinose potai tecua sui. Lot avei ndipoyava catuimi osē áqua tecua sui. Añihiveive rumo Túpa rembiguai ipoyava Lot rembireco tayri reseve seroyepepi tecua Sodoma sui. Sese aipo ehi iri:

--Peyepepi poyava, ndapemahe iri chira pe raquicuei coti --ehi.

Ahese Túpa oiti tata iwa sui tecua Sodoma ve, Gomorra ve avei. Ahe tata osapipa opacatu tecua iyavei ava naporai vahe, opacatu imbahe eta reseve yuvirocaipa.



Lot rembireco rumo omahe iri tiête guaquicuei cotí, ahe opita voi eté ahe peve, opa sata tupri setecuer, yucrit oyeapo.

Evocoiyase Lot güeraño tupri ñuvirio guayrit reseve yuvirinose mbahe tēi'sui, imbahe rumo opa ité ocañit.

9. Isaac haragüer (Génesis 21)

Túpa omboavíye oñehesa, evocoiyase Sara membrí oha ambuae aravíter rese, ahe pítani rerguã omondo Isaac yuvirreco. Ocho ari piye imbocircuncidasa Túpa porocuaita rupi. Abraham aravíter rumo cien, Sara aravíter evocoiyase noventa, ahese oha Isaac.

10. Ismael osé Abraham rēta sui (Génesis 21)

Isaac cambí sui imomboise, Abraham oyapo pieta guasu imboeteisave. Sara rumo omahe Agar membrí Ismael rese, Isaac reroñrosa piye ipucase sese. Sara evocoiyase voríehisa piye aipo ehi Abraham upé:

--Emboyepépi evocoí mbiguai, imembrí reseve. Ahe ndovirrecoi chira mbahe che membrí Isaac mombahesa --ehi.

Abraham evocoiyase guahir Ismael rese ndovirhai. Túpa rumo aipo ehi chupe:
--Eyembovirhaño. Eyapo mbahe Sara ñehe rupi. Nde rahir Isaac sui setá ava oimera iyavei Ismael sui, ahe niha nde rahir avei --ehi.

Añihivei Abraham tembihu omondo † reseve Agar upe iyavei imembr† Ismael upe avei oyuviraso äqua yuvirreco. Ahe yuviraso †v† iporupirrehisa rupi yuvirreco.

Ipare opa tēi † ichui yuvirreco. Sese, "Yamanopara revo" ehi yuvirreco viña.

Tūpa rumo osendu iyaseho, aipo ehi Agar upe:
--Eresiquiye eme. Esephia, peve † oime †vicuar pípe --ehi chupe.

Evocoiyase Agar oso † renose, ipare omundo omembr† toihu.

Ismael rumo ocuacua ité oico †v† iporupirrehisa rupi, iyavei ahe oicua vai uhu mombo. Ipare omenda cuña Egipto pendar rese.

11. Tūpa osecoäha Abraham (Génesis 22)

Setá aravíter pare Tūpa osecoäha Abraham aipo ehi chupe:

--Eraso nde rahir Isaac, nde rembiaisu, †v† Moriah pípendar †vitri† rese. Aheve ereyucara seropovéhe äqua cheu --ehi chupe.

Ahere ayihive voi, Abraham yuviraso guahir rese iyavei ñuvirío güembiguai viraso yuvirreco oyeupi. Imombosapisa ar† rupi oyepota Tūpa †v† oyeupe imombehusave yuviraso. Abraham aipo ehi:

--Pepitaño cohabe --ehi güembiguai upe--. Co che rahir rese orosora †vate oroyerurera Tūpa upe. Ipare oroyevira oroyu --ehi güembiguai upe.

Isaac viraso yepeha oachihiye, Abraham evocoiyase tata vireco iyavei quísemi, ēgue ehi yuviraso. Ahese Isaac oporandu oyesupa upe:

--Che ru, ¿que vo oime ovesa seropovēhepirā?
--ehi vu upe.

Abraham omboyevi chupe:

--Tūpa omboura ovesa yandeu oyeupe seropovēhe
āqua --ehi.

Oyepotase, omondo yepeha ita omopuha vahe
harive. Ichui opa oyocua guahir iharive imondo.
Oyuca pota ité quisemi pípe Tūpa ocuaisa pípe
viña.

Tūpa rumo aipo ehi chupe:

--¡Abraham! ¡Ereyuca eme nde rahir! Cūritei
orocua nde che reroya ité eve, eresiquiye avei che
sui iyavei ereyapoño ité che nde cuaisa, nde rahir
ité avei ereyruca pota cheu ereropovēhe vaherā viña
--ehi.



Ichui osephia ovesa iva rāca rese guāchi rese opāha vahē oī. Ahe ovesa vīropovēhe Isaac reropovēhe rāgüler sui.

Ahese Tūpa aipo ehi iri chupe:

--Orovasa catura iyavei setá ererecora nde suindar inungar yasitata retacuer iva pendar, iyavei inungar ivi cuhi retacuer. Esephia, nde che reroya ité eve, sese opacatu ava ivi piendar sovasapirā nde suindar sui yuvirreco --ehi.

Evocoiya güeco pare Abraham, Isaac iyavei mbiuai oyevipa güetave yuviraso.

12. Abraham rembiguai oseca Isaac rembirecorā (Génesis 24)

Sara manose, Abraham vīrocua ivi iti água. Evocoiyase Abraham aipo ehi güembiguai upe:

--Ndaipotai che Isaac omendara ha pendar cuña rese. Eso che mu recuave. Aheve eresecara Isaac rembirecorā --ehi.

Evocoiyase ahe sembiguai oso camello harive, vīraso avei porerecosa mbahe. Coiye oyepotase Abraham mu recosave oso, aheve opituhi igua ipive.

Aipo ehi oyerure Tūpa upe:

--Che Yar, cuñatai yugüerura i reca. Acoi ñepei upe, "Emboumi tēi i taíhu" ahese, ahe evocoiyase aipo ehise: "Eihu, iyavei nde reimba camello toíhu amondora" ehise cheu, ahe nde rembiporavo taraso Isaac rembirecorā --ehi.

Iparemi tēi ñepei cuñatai ou cute, ahese ahe mbiuai aipo ehi chupe:

--Emboumi tēi i taíhu --ehi.

Ahe evocoiyase aipo ehi:

--Eihu iyavei nde reimba camello toihu amondora
--ehi chupe.



Ichui vīnose ité i opacatu camello toihu.

Evocoiyase mbiguai omondo cuā penda chupe
iyavei mbahe oro apopri iyemoporañete āgua.

Ichui mbiguai oicua ahe cuña rer Rebeca, Nacor
rumino. Nacor evocoiyase Abraham rīvrī.

Evocoiyase mbiguai, "Avīye ndeu" ehi Tūpa upe
Abraham mu pāhu sui osecase Isaac rembirecorā ahe
opitivī pipe.

Oyepotase oīve mbiguai yuviraso, omondo tēi
mimoí tohu yuvireco, ahe rumo aipo ehiño: "Ndacaru
vitei chiranera ndamombehu viteise mbahe" ehi.
Ichui omombehu opacatu.

Ipare Betuel iyavei Laban, ahe Rebeca yesupa, iquívri avei aipo ehi yuvíreco chupe:

--Ndo co Rebeca Tūpa porocuaita rupi eraso Isaac rembirecorā --ehi mbiguai upe yuvíreco.

Ichui mbiguai omundo ati catu iri mbahe Rebeca upe iyavei imu upe porerecosa. Ahere ayihive Rebeca upe aipo ehi:

--Yaso che rerecuar recosave --ehi.

Ichui Rebeca upe oporandu yuvíreco '¿iquerēhī itera pīha?' ohecuer pīpe. Ahe rumo aipo ehi:

--Che querēhī --ehi.

Ipare voi yuvíraso ivi Canaán ve. Oyepotase mbiguai güerecuar rētave yuvíraso, aheve opa mbahe güembiapogüer omombehu Isaac upe.

Isaac evocoiyase Rebeca oipota rai voi eté güembirecorā.

3. ISRAELITA RAMOI JACOB

1. Jacob iyavei Esaú, ahe yuvírecoi Isaac rahīr (Génesis 25)

Ipare Abraham omano água renonde, Isaac upe opa omundo ombahe. Iyavei Ismael upe, ambuae guahíreta upe avei omondomi porerecosaño tēi.

Isaac oyeroqui Tūpa upe guahíhī rese. Tūpa evocoiyase osendu iyeroqui, ichui Rebeca upe aipo ehi:

--Nde membī coīra. Ahe pe rahīr sui oimera ñuvírio ava-ava tēi yuvírecoi vahe. Ñuvírio yuvírohase, ñepei ipíratá iteangara ambuae sui; yípindar oha vahe ihañecora ipa oha vahe rese --ehi.

Ichui icoĩ eté yuviroha. Yipindar oha vahe sagüé iteanga oha, ahe serer Esaú. Ipa oha vahe rer Jacob.

Ahe chihivahe ocuacua ité yuvireco. Esaú imbahe reca serai yepi. Tu Isaac rumo ahe osaĩsu catu ité. Esephia, ahe mbahe roho nomopanei eté chupe.

Jacob evocoiyase ndaseco-seco tēi vahe, oive tēi eté aipo secoiño yepi. Ichí Rebeca rumo ahe osaĩsu catu.

Esaú rumo ocuacua catu vahe, sese tu manore, imbahecuer opitara chupe nara pāve. Sese tēi Jacob ndoyambotai Esaú.

2. **Jacob omboopa vu** (Génesis 25, 27)

Ñepei arí, Jacob oyapo mimoi tīcue vahe. Ahese Esaú tīeporēhí vīroyepota omabahe recasa sui seru, oporandu voi mimoi tīcuemi vahe rese oyepotase. Jacob rumo aipo ehi chupe:

--Che catu taipisi nde mbahe erereco vaheví curi. Ichui niha mimoi amondora nde tohu --ehi Esaú upe.

Esaú rumo ombooyeví chupe:

--Che yuca pota ité mo aipo che rīeporēhí --ehi--. Nde ayase ererecora mbahe che rembierecoví --ehi.

Ichui opa Esaú omondo chupe mbahe güembierecoví, mimoi tīcue vahe repirā iyavei pan repirā. Tu rumo ahe mbahe sembiapo ndoicuai.



Iyesupa Isaac ocuacuamise ité iyavei ndoicatu
iri mbahe repia, ahe aipo ehi Esaú upe:

--Erio, che rahîr, che rembiaïsu. Che
acuacuami eté. Eru mbahe roho che remihura.
Ichui oroovasara --ehi.

Rebeca rumo, osenduse omer ñehe, omembri Jacob
upe aipo ehi:

--Eru ñuvirio ovesami cheu. Ayapora mimoi nde
ru rembihusei --ehi chupe--. Ahe ipipe, ahe nde
rovasara nde riquehîr rovasa râguer sui --ehi.

Jacob rumo aipo ehi osi upe:

--Che riquehîr sagué iteanga, che rumo ēgue
ndahei. Aviyeteramo, opocose che ru che rese, che
cuara. Ichui che aca-acá tiétera, che rovasa
râguer sui --ehi.

Ichî rumo omondo tiquehîr turucuar chupe iyavei
ovesa raguer omondo iyiva rese iyavei yachihî
rupi. Ēgue ehi Jacob oique oyesupa upe oso.

Iyesupa rumo aipo ehi chupe:

--¿Ava vo nde? --ehi.

Ahe omboyeví:

--Che Esaú aico --ehi chupe.

Iyesupa rumo, opocose ipo rese, aipo ehi chupe:

--Nde ñehe ndoyaví Jacob ñehe; nde po rumo avíye Esaú po --ehi.

Ichui iyesupa ohu mbahe roho iyavei osovasa, opacatu omondo mbahe vireco vahe chupe.

Iparemi tēi tiquehír Esaú ou, aipo ehi vu upe:

--Ndo co mbahe roho aru ndeu nde porandusa cheu --ehi.

Iyesupa rumo oporandu chupe:

--¿Ava vo nde? --ehi.

Esaú rumo omboyeví chupe:

--Che niha Esaú, yipindar oha vahe --ehi.

Oviharéhí pipe, iyesupa aipo ehi chupe:

--¿Ava ru cüritei güeru mbahe roho cheu iyavei che asovasa? --ehi.

Evocoiyase Esaú oyaseho iyavei oporandu iri tēi:

--Che avei che rovasamí eve --ehi oyesupa upe.

Iyesupa rumo aipo ehi chupe:

--Ndaicatui, nde rivri ou che mbopa, chupe amondo ndeundar rägüler porovasasa iyavei opacatu mbahe che rembierereco --ehi.

Ahese Esaú oyasehó iyavei oñemoiró iteanga rivri Jacob upe.

3. Jacob oñemi güéta sui (Génesis 27, 28)

Co mbahe pare, Esaú ndoyambotai Jacob iyavei ipihainemonaeta aipo ehi:

--Pihaiivi niha omanora che ru, ahese rumo ayucara che rivri --ehi.

Ichì Rebeca oicua voi eté aipo ihesa, ichui omembrì Jacob upe aipo ehi:

--Eñemi, eso che quívrì Labán rëtave. Esepia, nde riquestir Esaú nde yuca pota --ehi Jacob upe.

Ipare ichì aipo ehi omer Isaac upe:

--Acoi Jacob omendase cuña coha pendar rese avei inungar Esaú, evocoiyase che tamanoño --ehi.

Ahese Isaac aipo ehi guahìr Jacob upe:

--Eso nde mianga Labán pìri eico, ahe tayrì rese emenda. Inungar Tùpa aipo ehi Abraham upe, inungar avei che aipo ahe ndeu: "Nde rahìr setá oimera iyavei setá tecua itera yuvìrecoi, Tùpa omondora co ivì chupe" ahe --ehi.

Ipare Jacob güëta sui osë oso omianga Labán recosave.

4. Jacob querai agüer (Génesis 28)

Pìtu têise caha pìpe Jacob upe, ahe peve oque. Aheve oquerve osepia carera ivà rese ité opùha ohà, ahe carera rupi osepia oyeupise, ogüeyìse Tùpa rembiguai yuvìreco.

Tùpa ité rumo aipo ehi oñehé chupe:

--Che aicora nde rupi iyavei co ivì pìpe avei oromboyevìra. Co opacatu ivì nde mahera. Setá ava oimera nde sui iyavei opacatu ivì rupi ava sovasaprìra yuvìreco nde sui iyavei nde suindar sui --ehi.

Jacob querai pare omahe aipo ehi:

--Co catu Tùpa rëta, ndaicuai eté tie viña --ehi--. Tùpa omboavìyese oñehé cheu, ahe itera

che Tūpa iyavei che avei amboyevīra diez sui
 ñepei-peí mbahe che porerecosa che poravīquí reprí
 sui opacatu chupe --ehi.

5. Jacob oporavīquí omianga Labán upe (Génesis 29-35)

Coiye Jacob oyepota omianga Labán píri, ahe
 ipíri oporavīquí ñepei yasí rupi oico. Imianga
 Labán aipo ehi Jacob upe:

--Nde ereporavīquí iteanga cheu. ¿Mbahe vo
 ereipota amondo vaherā nde poravīquí repírā ndeu?
 --ehi chupe.

Imianga Labán rumo vireco ñuvirío guayrī.
 Ñepei tayrī cuacua catu vahe rer Lea; chihivahe
 catu vahe rer Raquel.

Ichui aipo ehi omianga upe:

--Erembose nde rayrī Raquel che rembirecorā,
 aporavīquí irira siete aravíter ndeu --ehi omianga
 upe.

--Avíye ayase aipo rupi --ehi imianga Labán
 chupe.

Jacob aipo osaísú iteanga Raquel, avíye chupe
 siete aravíter ndipucuimi vahe evocoiyase.

Ichui Labán oyapo pieta mendasa resendar.
 Guayrī Lea tēi rumo omondo icupíhīr Raquel
 recuñara Jacob upe..

Jacob oporandu voi eté omianga upe:

--¿Mahera che mbopa tēi eve? Aporavīquí niha
 siete aravíter Raquel repírā. ¿Mahera Lea tēi
 erembou cheu? --ehi.

Imianga rumo omboyeví chupe:

--Ocuacua catu vahe upe rane ité rumo iya
 imenda áqua, ipare omendara chihivahe catu vahe.

Emboavìye rane catu ñepei semana Lea rese eico, ichui Raquel avei amondora ndeu. Ereporavìqui iri ranera rumo siete aravíter cheu --ehi.



Êgüe ehi Jacob; Raquel ité rumo osāsu catuño ité Lea sui yepi. Ichui oporavìqui iri seis aravíter Labán upe. Yepe oporavìqui píratá iteanga viña, imianga rumo nomboepi tupri chupe iyavei setá yupagüer imianga ombopa. (Yípíndar rumo ahe rane ité ombopa vu Isaac. Cûritei rumo ahe imianga Labán setá yupagüer ombopa.)

6. Jacob rer Israel (Génesis 32, 33)

Setá aravíter pare, Jacob oyevi pota omu repia. Oyevi güembireco, guahir, güeimba opacatu rese oso oivive. Ahe peri rupi Esaú osovaichi ou.

Ipare oyeaco-aco yuvireco. Esepias, ahe noñemoiro iri chupe.

Jacob rumo oyepota ité oyesupa Isaac repia, ichiñ Rebeca rumo omano. Ahe Jacob rumo vireco doce tupriñ guahir, ñuvirio tahir chihivahe vite vahe rumo, ahe Raquel membrí. Ahe serer José iyavei Benjamín. Ambuae cuacua catu vahe rer: yipindar Rubén, ambuae Simeón, Leví, Judá, Isacar, Zabulón, Dan, Neftalí, Gad, Aser.

Túpa rumo aipo ehi Jacob upe:

--Ndahe iri chira Jacob nde rer. Esepias, ahe ava oporombopa tēi vahe rer. Nde rer-ra Israel 'ipiratá vahe Túpa rese' oyapave. Setá oimera nde rahir iyavei oyemboerecua guasura yuvireco. Co ivi amondo vahe Abraham upe iyavei Isaac upe, ahe ndeu amondo --ehi.

4. JOSE, VIQUEHIR REMIAMBOTAREH

1. José querai agüer (Génesis 37)

Israel rer yipindar Jacob, ahe osaísú iteanga José. José yipindar vahe Raquel membrí, ahe oyapo icamisarā icatupriñ ai vahe, ipara vahe yuvireco. Osepiase rumo tiquehireta ahe icamisa sese yuvireco, ndoyambotai José seroñrosave yuvireco.

Ñepei pítu aipo José iquerai, oquerive viquehireta pâhuve oipoho angahu trigo oico, ahese aipo tiquehireta rembipoho ipopeve opa ñacaiviso ichui, ahe sembipoho rumo aipo ipove nañacaiviso eté. Iyavei ambuae iquer pipe ariñ, yasiñ, yasitata opa ñacaiviso yuvireco chupe.

Opase omombehu vīquehīreta upe evoco i ñuvīrio oquerai agüer, ndoyambotai eté yuvīreco.



2. Tīquehīreta omondo José ambuae ava upe yuvīreco (Génesis 37)

Ñepei arí José rīquehīreta yuvīrasopa caha pīpe ovesa rāro. Ahese Israel aipo ehi José upe:

--Eso, teresepia mara ehi pīha nde rīquehīr yuvīreco --ehi chupe.

Oyepotase vīquehīreta recosave oso, ahese tīquehīreta sepiase,

--Yayuca evoco iquierai serai vahe --ehi yuvīreco chupe.

Tīquehīr Rubén rumo aipo ehi:

--Yayuca eme. fīciuar ipiru vahe pīpe tēi yamondo --ehi.



Ichui ēgüe ehi icamisa ipara vahe rerocua pare yuvíreco chupe.

Evocoiya sereco pare tiquehíreta ocaru yuvínoi, aheseve mbahe mbovendesar Egipto ve yuvírocua vahe oyepota yuvíreco chupe. Tiquehír Judá aipo ehi:

--Yamondo José veinte guarePOCHI rupi mbahe mboepísar upe, ahe tovíraso güembiguairã yuvíreco --ehi.

Ipare tiquehír oyuca cavara yuvíreco, ahe suví pípe José camisagüer omopíra-píra yuvíreco. Ichui víraso oyesupa upe yuvíreco aipo ehi:

--Co camisa oroseca. ¿Ndahei vo José camisa? --ehiño tēi vu upe yuvíreco.

Israel rumo sese tēi ndovíhai eté iyavei oyasehó iteanga 'omano ité revo José' oya viña.

3. Potifar rembireco osecomomara pota José (Génesis 39)

Mbahe mbovendesar vîraso José Egipto ve yuvireco. Aheve aipo mbia mborerecuar, Potifar serer vahé mbahe rese hañecosar, ahe ovirocua José oyepiri nara. José evocoiyase oporavíquì tupri ai eté ahe mbia Potifar piri oico. Sese aipo ahe vireco opacatu güëta rese hañeco água.

Potifar rembireco rumo aipo ehi José upe:

--¿Ndiyai vo yaquemi che piri viña? --ehi-ehi aipo yepi.

Aipo ehiño rumo ahe cuña upe:

--¡Aní! ¿Mahera vo aipo che mbahe têi ayapora Tûpa aroyase viña? --ehiño chupe.

--Yaque che piri --ehiño ité José upe arì yacatu rupi yepi.



José aipo arī yacatu,
--¡Aní! --ehiño ité chupe yepi.

Ñepei arī José oique oī pīpe oporavīquī āgua, aheve ahe cuña secoi, ndipoi eté aipo ambuae ava aheve yuvīreco. Aheve aipo ahe cuña icupe cotī oicamisa soho 'toque ité che pīri' oya chupe viña.

José rumo aipo osequīi tuprīñō ocamisa ipove, oñá oso ichui.

Ichui ahe cuña semira tēi omer upe oso aipo ehi:

--Esephia José camisa, ahe ndipīhai pota cheu, oyapo pota mbahe che rese viña. Che rumo che rāse pucuño ichui, ahe evocoiyase oñá oso che sui, oseya tuprīñō ocamisa cheu --ehi tuprīt tēi omer upe imombehu.

Ichui tēi imer Potifar oñemoiro ité chupe, osoquenda uca.

4. José roquenda agüer (Génesis 40, 41)

Tūpa rumo aipo oipītīvīi José soquendasave iyavei ahe soquendas a pīpe mborerecuar faraón oyocuai vahe ava soquendaprī rāro āgua, ahe oyocuaino soquendasave José imboetasa soquendaprī rese hañeco āgua.

Mborerecuar faraón aipo aheve avei osoquenda uca ñuvīrío güembiguai. Aheve sembiguai voquendasave iquerai yuvīreco. Aheve José, "¿Mahera vo ndapevīhai?" ehi oso chupe.

--Ore querai agüer rese tēi; ndipoi eté ava omombehu vaherā oreu --ehi yuvīreco chupe.

--Tūpaño ité niha oicua yande querai --ehi José.



Ichui opa omombehu oquerai agüer yuvireco
chupe, José rumo iñehe rendu pare aipo ehi:

--Nde querai omombehu: ereyevi irira
mborerecuar rese hañeco água --ehi ñepei upe.

Ichui ambuae upe aipo ehi:

--Nde queraisa omombehu nde mano água --ehi.

Ichui ēgue ehi eté ahe mbiguai upe yuvireco.

Ñuvirio aravíter pare, aipo faraón avei
iquerai. Iquierve aipo siete tupri guaca iquira
vahé yuvinose íai Nilon sui yuvireco capihigua;
saquicuerivemi avei aipo opa yuvinose siete tupri

guaca icangüer rai-raimi vahe. Ahe opa yuvírohu omboetasa guaca iquira vahe. Êgue ehi iquerive chupe.

Ahere ayihive añihivei oyocuai pahi eta Egipto ve yuvírecoi vahe iyavei yaracua vahe faraón 'tomombehu che queraisa yuvíreco cheu' oya viña. Ndipoi eté rumo oicatu vahe imombehu yuvíreco chupe.

Ichui aipo sembiguai soquendapirer oyemomahenduha José rese. Ahe omombehu vahecuer iquerai agüer soquendasave chupe. Ichui omombehu faraón upe, ipare faraón oichoho uca.



José rumo faraón rovai oso ãgua, opa oñeapi, oyemonde tupri oso. Aheve faraón opa oquerai agüer omombehu chupe. Ahe faraón querai agüer renduse aipo ehi chupe:

--Tūpa nde monguerai mbahe oime vaherā rese, nde icua āqua iyavei nde yemoingatu āqua. Aipo siete guaca iquira vahe nde monguerai omombehu 'siete aravíter rupi oyesu vîtera mbahe tembihu' oyapave. Siete guaca icangüerai-raimi vahe nde monguerai, ahe omombehu 'siete aravíter rupi ndoyesui chira mbahe tembihu. Ahese oimera tiavor opacatu ava upe' oyapave. Sese iya ereseca mbia imbahecua vahe opacatu rupi tembihu apocatu uca āqua siete aravíter tiavor oimese nara ava upe --ehi José faraón upe.

5. José mborerecuar itate vahe secoi Egipto ve (Génesis 41)

Faraón pîhañemoñeta rumo José ñehe rupi tupri avei. Ichui José upe aipo ehi:

--Ndipoi eté rumo ambuae ava nde nungar imbahecua vahe Tūpa opîtivîisa pîpe --ehi--. Ndeño ité mborerecuar ereicora che povrîve --ehi chupe--. Nde ereguatara opacatu rupi tembihu apocatu uca āqua iyavei co Egipto rese nde hañecora --ehi chupe.

Faraón viroyá iteanga José imbahecua rese Tūpa ipîtivîisa pîpe. Ichui José upe opa ité mbahe omondo, ahese mborerecuar ité secoi cute, ahe opacatu ava viroya yuvireco tecua rupi oguatase.

Coiye omenda cuña Egipto pendar rese. Ichui ahe cuña pîpe tahî, yîpîndar tahîr rer Manasés ichui tahî iri ahe serer Efraín. Iyavei setá ité omonuha uca trigo siete aravíter tembihu reime vîteseve.

Ipare aipo ndoyesu iri eté tembihu opacatu ivi rupi. Ahese aipo opacatu ivi rupindar ava yugüeru Egipto ve mbahe tembihu rerocua yuvireco.

6. José riquehir yugüeru Egipto ve (Génesis 42)

Israel aipo ehi guahireta upe:

--Peso Egipto ve. Aheve aipo oime trigo --ehi.

Guahir Benjamín rumo omombitaño ité tiquehíreta sui oyepiri, aipo ehi:

--Opa omano Raquel iyavei José. Ñepeiñomi tēi co oicove cheu, sese tēi ndamondoi chira pe rupi --ehi aipo Israel guahireta upe.

Ichui aipo tahireta yuviraso, oyepotase aipo Egipto ve yuvireco, aheve vivri José rovai opa oñenopicha yuvireco. Ahe rumo aipo José upe, "Yande rívrí co" ndehi eté yuvireco, ahe rumo, "Che riquehir co yuvirecoi" ehi voiño ité.

Ichui aipo José oporandu viquehíreta upe:

--¿Mbahe vo peipota? ¿Que sui vo peyu? --ehi chupe.

Ahe aipo ehi yuvireco chupe:

--Ore oroyu ivi Canaán sui coháve trigo rerocua água --ehi.

José aipo ehi iri:

--¡Aní, pe peyu ore reco repia água tēi, "Yayucapa" peye revo oreu! --ehi.

Ahe aipo ehi iri yuvireco chupe:

--Aní, ore oroico ñepei ava rahirño ité, oyeivri pāve oroico, doce tupri, ñepei chihivahe catu vaheño rumo opita ore yesupa piri, ambuae rumo omano --ehi.

Ichui José aipo ehi iri chupe yuvíreco:

--Supi etese pe ñehe, ñepei opitara ave, ambuae evocoiyase yuvírasora aipo vívri chihivahe catu vahe reca --ehi José víquehíreta upe.

Ichui aipo Simeón opita Egipto ve, ambuae aipo opa oyeví yuvíraso tembihu reseve-seve.



Opase, oyepota oyesupa upe yuvíraso, opa voi omombehu mbahe yuvíreco chupe. Ichui iyesupa aipo ehi chupe:

--Benjamín rumo ndosoi chietera. Esepiá, José ndipoi iyavei Simeón avei, sese ndiyai eté oso Benjamín pe rupi --ehi yuvíreco chupe.

Trigo opase rumo ichui yuvíreco, aipo ehi aipo tu chupe:

--Peraso evocoiyase Benjamín, peso --ehi.

Tíquehír Rubén iyavei Judá, ahe aipo,

--Ore ore hañecora sese --ehi yuvíreco vu upe.

Oyepotase Egipto ve yuvíraso, aheve José vivri Benjamín osepiase, víraso opacatu oyepíri imbocaru. Ndoicua vítei eté rumo José secose yuvíreco.

7. José osecoāha víquehíreta (Génesis 43, 44)

Vírocua irise aipo trigo tíquehíreta yuvíreco. José oyocuai güembiguai víquehíreta mbahe ríru pípe trigo ñoña água iyavei guarePOCHI apoprí ohigua ríru avei oñoña uca Benjamín mbahe ríru pípe ahe icuaéhi água yuvíreco aracahe.

Opase aipo yuvíraso tíquehíreta Egipto sui añihiveive, saquicuerivemi aipo José omondo güembiguai víquehíreta upe porandu água ohigua ríru rese. Ahe güembiguai upe José aipo ehi:

--"¿Mahera peñomi che rerecuar ígua ríru?" erera chupe --ehi.

Ichui ahese mbiguai osupitíse güerecuar tíquehíreta aipo ehi eté chupe.

Tíquehíreta rumo oyeupe poranduse, "¿Mahera aipo ore oroñomira seru viña?" ehiño yuvíreco chupe.

--Acoi ñepei mbahe ríru pípe sui eresecase, ahe mbahe ríru rerecosar tomano, ore evocoiyase pe rembiguai oroicora --ehi.

--¿Mara peyera vo catu pe peico? --ehi sembiguai chupe.

Ichui aipo sembiguai oseca Benjamín mbahe ríru pípe sui. Ipare aipo tíquehíreta ndovíhai tēi yuvíreco. Ëgüe ehise, opa voi eté aipo Egipto ve oyeví yuvíreco, aheve aipo aracahe opa oñenopíha vívri José rovai yuvíreco.

José aipo ehi chupe:

--¿Mahera ëgüe peye? Sese opítara Benjamín coháve che rembiguairá pe sui. Ambuae iyacatu oyevíño güëtave yuvíraso --ehi chupe.

Judá aipo ehi José upe:

--Oroyepotase rumo ore rëtave oroso ore rívrí ndosoise ore rupí, omanora ovíharéhisa pípe ore yesupa. Che apítara coháve che rívrí recuñara nde rembiguairá. Eyapomi mbahe icatuprí vahe oreu, Benjamín catu toyevíño tēi oso ore yesupa upe --ehi.

Evocoiyase José aipo ehi:

--Ndahe iri catu co güeco ai aracacondar pípe vité yuvírecoi --ehi opíha pípe chupe.

8. José omombehu güecocuer (Génesis 45)

Ahese José aipo ehi chupe:

--Che José aico pe rívrí. Peyembóviháño peico pe che mbovende agüer rese. Túpa che mbou coháve

pe paraſuēhi āqua mbahe tembihu rese. Ipane vîte cinco aravîter rupi mbahe ihupri ndipoi chiño itera. Peyevi, peso yande rêtave. Taperu yande yesupa cuacuami iyavei pe rahireta, pe mu pe reco vahe. Evocoiyase cohaye peicora iyavei mbahe pe remihura, nipeanei chietera pêu --ehi.



José riquehîreta rumo ndovîroyapriño mborerecuar chinise yuvîreco aracahé.

Ipare José vîvri omondo vîquehîr rupi.
Oyepotase yuvîraso oyesupa Israel upe:

--José oicove iyavei mborerecuar chini peve Egipto ve --ehi imombehu oyesupa upe yuvîreco.

Tu rumo yîpîndar ndovîroyapri eté; coiye rumo vîroyase supi eté vahe, oyembovharete cute.

**9. Israel, guahîr opacatu reseve yuvîrovapa
Egipto ve
(Génesis 46-50)**



Tûpa aipo ehi Israel upe:

--Peso Egipto ve opacatu nde rahîr, nde rumino
reseve. Aheve pe recuarã tuvichá vahe peyapora.
Ipare oyevî irira nde rahîr cohave ívî oyelpe
imondoprîsave curi --ehi.

Ahese opacatu ité yuvîraso José mu Egipto ve.
Israel rumo, osepiase guahîr José, oyembovîharete
ité sese.

Ava yugüeru vahe Israel sui oyemboerecua Gosén tivit rese yuvireco setá aravíter rupi Egipto coti. Israel cuacuami etese cute, opa osovasa guahireta.

Osovasa avei ñuvirio vumino, José rahir. Coiye Israel omanose, serasosa Canaán tivive ñotí água aheve ocuave tamoi Abraham, tu Isaac ruvípa. Doce vahe Israel rahir ahe serer: Rubén, Simeón, Leví, Judá, Isacar, Zabulón, Dan, Neftalí, Gad, Aser, José iyavei ipa vahe Benjamín. Ñuvirio vahe José rahir ahe: Manasés iyavei Efraín.

Ipare coiye co yuvirecoi vahe, faraón opa omano yuvireco.

5. MOISES: TUPA REMBIGUAI ISRAELITA RENOSESAR EGIPTO SUI

1. Ava Egipto pendar oyamotaréhi israelita yuvireco (Exodo 1)

José mu eta, tiquehireta avei opita Egipto ve yuvireco, ahe tahiratí yuvireco aheve. Evocoiyase chupe, "Israelita" ehi yuvireco aracahe. Esepi aipo, ahe ava Israel suindar ité yuvirecoi.

Evocoiyase ipiasu vahe faraón aipo ehi cute:
--Co israelita yuvirecoi vahe setá etepri iyavei ipirata catu yuvireco --ehi--. Acoi oimese vavasa, aviyeteramo ahe oipitivinora yande amotaréhsar ovava yuvireco yandeu --ehi--. Evocoiyase toporaviqui pírata yuvireco yandeu --ehi yuvireco chupe.

Ahese omboporaviqui píratá israelita yuvireco oyeupe. Omboporaviqui uca caha piye, cove rupi,

arobe guasu apo, arobemi apo, oī apo, tecua
guasurā apo avei.

Oporavíquí iteanga catuse, oyemboeta catu-catu
iriño ité yuvíreco. Sese faraón pīhave tasī tēi.
Coiye aipo ehi:

--Opacatu Egipto t̄guar yuvíroha vahe cuimbahé
mini israelita suindar, ahe pemombopa voi t̄ai rupi
--ehi--. Cuña güeraño toyuvírecove --ehi aipo
faraón opacatu upe aracahe.



2. Tūpa osāro Moisés pītani (Exodo 2)

Oime aipo ñepei mbia Leví suindar omenda Leví
suindar cuña rese ae, ahe cuña v̄ireco omembri
Mirian serer vahe iyavei imembri cuimbahemi Aarón.

Ipare v̄ireco iri ambuae guahir yuvíreco. Ahe
cuña omembri catupri aimi repiase, oñomi mbosapí

yas† rupi sereco yuv†reco mborerecuar sui. Ipare aipo ndoicatu iri ñomi yuv†reco. Sese aipo ich† oyapo †ruova s†rugua, omboya tupri† mbahe ipomo vahé p†pe. Ipare oñoña p†tani ip†pe yuv†reco. Ipi†pe ñoñare, aipo omondo †ai p†pe piri p†hu rupi.

Seindr† evocoiyase osepia catuño ohā '¿mara ehira p†ha?' oya.



Iparemi tēi faraón rayri† ou †aive oyasu. Aheve osepia †ruova †ve. Evocoiyase aipo oyocuai güemimboacua senose ãgua.

Osepiase p†tani, ipara†su tēi chupe. Ahese aipo ou Mirian oporandu chupe:

--¿Ndereipotai vo añahe vaherã ñepei mb†a upé co p†tani mbocambu ãgua? --ehi seindr†.

Evocoiyase aipo faraón rayrī:

--Aviye --ehi voiño chupe.

Ahese aipo Mirian oñehe osī upe ae. Ichui ichī ité vīraso iri güētave. Ahe aipo omboacua faraón rayrī membīrā. Faraón rayrī evocoiyase omondo Moisés sererguā.



3. Moisés secoi mborerecuar faraón rētave (Exodo 2)

Iyavei aipo Moisés pītani cuacua catumise, ichī vīraso mborerecuar faraón rayrī upe aracahe.

Evocoiyase aipo Moisés secoi mborerecuar rētave tayrī membīrī nungar ité secoi. Aheve ocuacuase,

mbahe yar ité secoi. Iyavei opacatu mbahe Egipto pendar imbahe pāve ité. Iyavei aipo imbohesareta, avīye vahe pāve ité yuvīrecoi. Egipto ıguar nomboetei vahe ité aipo Tūpa yuvīreco.

Moisés rumo, "Ndahei che Egipto ıguar aico" ehiño ité. Imahenduhaño ité omu rese iyavei osī Tūpa suindar mbahe oyeupe imombehu agüer rese. Cuarenta aravíter rupi mborerecuar rahır nungar ité secoi.



4. Moisés ovesa rārosar secoi (Exodo 2)

Ichui ñepei arī Moisés oso israelita pīri. Aheve osepia ava poravīqu pīrata. Iyavei osepia

ava Egipto pendar ovavase israelita rese yuvireco, evocoiyase aipo Moisés oyuca ahe ava Egipto pendar israelita repisave.

Faraón rumo, oyanduse Moisés recocuer, oyuca pota ité. Evocoiyase oñemi voi oso amombrí, ivi Madián rese.

Ipare aipo omenda ahe pendar cuña rese. Aheve aipo osáro ovesa vovayar reimba. Cuarenta aravíter rupi iparaísu oico ovesa ráro.



5. Túpa oñeho Moisés upe (Exodo 3)

Ichui coiye aipo Moisés oyepota oso ivitri Sinaí ve aracahe. Aheve aipo aviyeteramo tēi

osepia caha Mata Zarza serer vahe. Ahe aipo sendi
guasu oĩ chupe, ndocai eté rumo.

Ichui ahe ramoseve, Tūpa oñehe Moisés upe aipo
ehi:

--Ereyu eme cõimi cheu --ehi Tūpa chupe--. Che
aico Abraham Tūpa, Isaac Tūpa, Jacob Tūpa avei
--ehi chupe.

Ahese oyeovapîño Tūpa sui.

Ipare Tūpa aipo ehi chupe:

--Ava Israel iquier cheundar ité yuvirecoi
--ehi.



Evocoiyase aipo aipo ehi:

--Che asepia ahe iporavíquisa ipíratá iteangase yuvíreco, sese arasora tiví Abraham upe amondo vahesave --ehi--. Aheve setá mbahe oime: guaca cambi, eirí avei. Che oromondo faraón upe Egipto sui ava renose água tiví Abraham upe amondo vahecuersave --ehi Túpa chupe.

Oporandu rumo Túpa upe aipo ehi:

--¿Mara vo nde rer? Israelita upe nde rer mombehu água --ehi chupe.

Túpa aipo ehi:

--Che oicové vahe ité aico, ahe che rer --ehi.

Evocoiyase Túpa upe aipo ehi:

--Ndache reroyai chira rumo yuvíreco --ehiño aipo chupe--. Esepia, ndaicatu tupri añahe yepi. Iyacatu ambuae ava eremondora viña --ehiño chupe.

Túpa rumo aipo ehi:

--Che oropítivíra opacatu mbahe rese, sese eresoño itera --ehi chupe--. Iyacatu nde ríquehír Aarón ererasora nde pítiví água --ehi--, evocoiyase Aarón iyacatu omombehura ava upe, faraón upe avei mbahe nde suindar ñehesa --ehi Túpa chupe.

Égüe ehi aipo Moisés güembireco seraso, opacatu guahír avei Egipto ve aracahe.

6. **Moisés oyeví oso Egipto ve** (Exodo 4-6)

Moisés, osepiase víquehír Aarón, ahese mbahe Túpa oyeupe omombehu vahecuer omombehu chupe. Evocoiyase Aarón opa omombehu ava Israel íguar rerecuar yuvírecoi vahe upe. Iyavei opa omboyecua

mbahe poromond̄isa icua āqua chupe Tūpa remimbou güecosa.

Evocoiyase aipo co ava israelita viroya yuvireco aracahe. Sese aipo, "Aviye ndeu" ehi Tūpa upe yuvireco. Esepi aipo, Tūpa osendu iyeruresa yuvireco yepi, evocoiyase aipo Tūpa osep̄ pota Egipto pendar ava yuvirecoi vahe sui aracahe.

Sese aipo Moisés, Aarón rese aipo ehi yuvireco faraón upe:

--Israelita Tūpa niha aipo ehi: "Toyuvinosepa co ava che reroyasar co ivi sui" ehi --ehi faraón upe.

Evocoiyase aipo faraón aipo ehi:

--¿Ava vo pe Tūpa? Che ndaicuai --ehi--.
Iyavei ndopomose ucai chietera --ehi.



Evocoiyase faraón aipo ehi ava Egipto ɨguar upe:

--Ndapemondo iri chira capihi co israelita upe arobe rese nara. Ahe ae toseca capihi yuvireco oyeupe iyavei tomboaviye arobe retacuer, inungar oyapo arī rupi yuvireco yepi --ehi.

Evocoiyase aipo ava Egipto pendar yuvirecoi vahe oinupa aipo ava isrealita yuvirecoi vahe. Esepia, aipo oporaviquisa nomboaviyei yuvireco, sese ēgue ehi yuvireco chupe aracahe. Evocoiyase aipo israelita omoasi Moisés upe yuvireco. Esepia niha, aipo iporaviquisa ndiguayi etepri yuvireco chupe. Evocoiyase aipo ehi Tūpa aracahe:

--Opara araso co israelita ɨvī Canaán ve --ehi aipo.

Ichui rumo aipo ehi:

--Yipindar rumo amondopa ranera che poronupasa ipirata vahe Egipto ɨguar upe yuvireco --ehi--, ipipe sui tache cua yuvireco, "Tūpa ité catu" tehi yuvireco cheu --ehi aipo aracahe.

7. Tūpa opa oinupa Egipto ɨguar (Exodo 7-10)

Evocoiyase Moisés, Aarón yuviraso iri faraón repia aracahe. Aheve faraón aipo ehi:

--Supi etese Tūpa pe cuai pe mbou, pemboyecua ayase Tūpa píratasa cheu --ehi aipo Aarón upe.

Ahese Aarón omombo opococa ɨvive, evocoiyase aipo ipococa cûritei oyeapo mboi. Evocoiyase ava Egipto pendar ipaye vahe oyapo avei mboi yuvireco. Aarón oyapo vahe rumo mboi, ahe opa omoco ipaye vahe rembiapo.



Ipare aipo omoñeno opococa †ai harive. Ahese aipo † cûritei oyeapo tuvi nungar. Ipare aipo ipaye vahe Egipto pendar oyapo inungar avei yuvireco. Evocoiyase siete ar† rupi aipo opacatu † †ai rupi oyeapo tuvi. Ipare rumo aipo Tûpa güeco pîratasa pîpe omboyevi iri † tupri avei.

Ipare aipo Aarón omoñeno iri opococa, evocoiyase Tûpa oyapo ati vireque opacatu †vi rupi, ipare aipo ipaye vahe oyapo inungar avei yuvireco. Evocoiyase vireque setá etepri opacatu o† rupi iyavei tupave, tembihu pîpe avei yuviropo-ropo.

Sese aipo faraón aipo ehi Moisés upe:

--Eporandu nde Tûpa upe tovirocuapa vireque †vi sui --ehi--. Evocoiyase opase vireque virocua yande †vi sui, ahese voi amosera ava imboetei --ehi.

Ahe rumo aipo ehi tēi. Evocoiyase ndipo irise vireque, ahese faraón ndomose pota iriño ava Tūpa mboetei āgua.

Evocoiyase aipo Tūpa coiye omondo iri mbahe qui opacatu ivi rupi ava mañeco tēi. Ipare rumo aipo ipaye vahé ahe pendar ndoicatu iri yapo yuvireco. Ichui aipo Tūpa omundo mberu opacatu ivi Egipto rupi, Gosen ivive israelita eta yuvirecoi aheve, ndipoi eté mberu.

Ipare Tūpa omondo mbaherasi vai; omomba mbate mimbá Egipto pendar reimba.

Evocoiyase Tūpa aipo ehi Moisés upe, Aarón upe avei:

--Peipisi tanimbu. Pemombo ivate coti, evocoiyase ava Egipto pendar rese toyuvinose ati curuai --ehi.



Ipare Tūpa oiti amanda guasu, ahe oyucapa ava ocar pendar. Ndipoi rumo amanda Gosen ivi rupi.

Evocoiyase faraón setá tēi aipo ehi:

--Perocuapa poronupasa ore sui --ehi--, evocoiyase amosepara ava --ehi angahu tēi chupe oico.

Ipare rumo aipo Tūpa virocuase oporonupasa ichui, ahese aipo ivate catu oyapoño ité opihāehīsa faraón. Iyavei aipo ndomondoíno ité ava Tūpa mboetei. Sese aipo Tūpa omondo iri tucucaru yuvireco chupe 'co tohupa tupri ité acoi amanda guasu nomomara vītei vahe mbahe miti' oya.

Ipare voi ombou pītumimbí vahe ahe opacatu ivi rupi, pītumimbí eté aipo cute mbosapi ari rupi iyavei ndipoi eté que ava osē vahe güēta pīpe sui. Faraón rumo aipo ehi Moisés upe:

--Ndamondoi chietera ava ndeu. Ereyu iri eme che repia. Ereyuñose, eremanora --ehi.

8. Ava rahīrīpi opa omano yuvireco (Exodo 11, 12)

Evocoiyase Tūpa aipo ehi israelita upe aracahe:

--Pemondo ovesa ruvi oyovai voi pe roquendipi rese iyavei pe roquenda harive --ehi--.

Evocoiyase pītu pīpe pehu mbahe roho sesipri, pandayapepoi vahe rese iyavei caharo tēi itira pehura. Evocoiyase pecaru pare, peyemoingatu voira pe guata āgua. Esepia, co pītu pīpe che opara opovinose Egipto sui --ehi chupe aracahe.

Evocoiyase aipo israelita viroya ité opacatu Tūpa yuvireco, sese oyemoingatupa voi yuvireco.



Aipo ehi avei Tūpa:

--Pītu pīpe, opara ayuca ava rahīrīpi ñepei-peí sēta rupi Egipto pendar --ehi--. Co ovesa ruví rumo tecocuer omboycua ucara. Sese ndayucat chira ava rahīrīpi que oī rupi acoi vīreco vahe ovesa ruví voquenda rese --ehi.

Evocoiyase faraón osendu tēi iñehe; ichui rumo aipo ndovíroyai eté. Ahese aipo Tūpa oyapo güemimbotar chupe cute. Evocoiyase aipo pītu mbīterve oyuca opacatu ava rahīrīpi opacatu oī rupi acoi ndovírecoi vahe ovesa ruví güëta roquendīpi rese iyavei faraón rahīrīpi omano avei aracahe.

Opacatu ava Egipto pendar oyaseho tēi ahe pītu pīpe yuvíreco. Evocoiyase faraón oyocuai Moisés, "Peyepépi co ivi sui" ehi chupe,

--Peso opacatu, peñehe tupri pe Tūpa upe che recocuer rese --ehi chupe aracahe.

9. **Ava Israel īguar yuvíraso Egipto ve** (Exodo 12)

Evocoiyase aipo ava israelita oporandu guarepochi rese, oro rese iyavei turucuar icatupri vahe rese Egipto īguar upe yuvíreco aracahe.

Ipare ahe opa omondo ité opacatu mbahe iporandusa yuvíreco chupe. Ahe pītu pīpeve opacatu ité israelita yuvínose Egipto sui. Iyavei Israel retacuer seiscientos mil opacatu cuimbahe, cuña retacuer ndicuasai, chihivahé retacuer avei no. Tūpa pītu pīpe oguata senonde yuvíreco chupe. Ahe rumo oyeapo inungar tata iyavei arī rupi

secoi supiveño ité ūva quīha nungar rese yepi.
Ēgüe ehi Tūpa oico ava upe aracahe.



**10. Israel osasapa para guasu Píra vahe yuvíreco
(Exodo 14)**

Coije ava Israel oyepepi pare Egipto sui yuvíreco, ahese faraón aipo ehi aracahe:

--¿Mahera yamondopaño ava? ¿Ava vo oporavíquira yuvíreco yandeu cüritei? --ehi.

Ahese aipo faraón omoña sundao rehi pípe yuvíreco carétomi vavasa resendar pípe iyavei cabayu rese no. Ipare aipo osupiti yuvíreco para guasu Píra vahe rerovicave. Ahe para guasu popive aipo israelita yugüeru iyavei ivitri oime yivíi. Ahe icupe coti sui aipo sundao rehi Egipto pendar yugüeru yuvíreco.



Evocoiyase aipo israelita osiquiyé iteanga yuvireco ichui. Sese aipo oporandu Moisés upe yuvireco:

--¿Mahera vo ore reru eve cohave? Egipto īguar ore yucapara yuvireco --ehi.

Evocoiyase Moisés aipo ehiño ava upe:

--Pesiquiyei rene. Tūpa niha pe repisar --ehi--. Sese pesāroño rane, ndapesiquiyei chira --ehi.

Ahese Moisés omoata oyiva para guasu rese, ipare voi ivitu Tūpa ombou. Opa oipepi tupri i. Oyeapopa cūritei i oyoya voi sambipe nungar. Yaviter rupi oyeapo peri ipiru tupri vahe.

Evocoiyase israelita supi osasapa yuviraso sovai. Egipto īguar aipo, "Yasoño ité saquicuei" ehi yuvireco viña, ahese aipo i oyopipa ava yuvireco. Aheve opacatu tupri ava Egipto īguar ocañi yuvireco.

Ahese israelita vīroya ité Tūpa yuvireco, Moisés avei eté vīroya yuvireco, ahe Tūpa rembiguai.



Ipare aipo Moisés opacatu israelita reseve osapucai Tūpa upe yuvireco 'aviye ndeu, ore písiro eve co Egipto igua sui' oya yuvireco aracahe.

6. MOISES VİROGUATA ISRAELITA

1. Tūpa tva sui tembihu ombou (Exodo 16)

Ava israelita yuvirecoi vahe aipo oguata ava porêhisa rupi yuvireco aracahe. Setá etepri rumo aipo Moisés oyamotaréh aipo ehi yuvireco:

--Moisés tēi yande reru cohabe tieporéh upe yande yucapa áqua --ehi aipo yuvireco.



Evocoiyase aipo Tūpa aipo ehi Moisés upe:

--Che amondora tembihu †va pendar ar† yacatu ava upe --ehi--. Ahe tembihu omonuhara yuvireco ahe ar† rese nara güeraño tupri --ehi--. Co imboseisa ar† pípe rumo, co tembihu omonuhara ñuvirío ar† rese nara yuvireco oyeupe --ehi--. Evocoiyase nomonuhai chira mbítuhusa ar† pípe yuvireco --ehi aipo aracahe.

Ipare aipo caharuse Tūpa ombogüey† at† inambu nungar opacatu †v† rupi, ahe soho aipo yuvirohu yuvireco aracahe. Iyavei aipo añihiveive aipo morochi tupri mbahe †v† rupi inungar acoi yesapt† ñapirata vahe.

Ahese Moisés aipo ehi ava upe:

--Co ombou Tūpa tembihu †va pendar --ehi.

Aipo ihe pare aipo omonuha yuvireco güemihura.

Ipare aipo ava aipo ehi yuvireco no:

--Co tembihu yandeu imboupri rer maná --ehi aipo yuvireco aracahe.

Evocoiyase israelita yuvirohu tembihu †va sui imboupri ava poréhisa rupi yuvireco; cuarenta aravíter rupi égue ehi aracahe.

2. Tūpa ombou † ita guasu sui ava †guarā (Exodo 17)

Ipare aipo omboas† iri ava Moisés upe mbahe yuvireco no. Esepi aipo, † ipane yuvireco chupe. Evocoiyase aipo Tūpa aipo ehi Moisés upe:

--Erasopa co ava rerecuar ita guasusave †vitr† Horeb rese --ehi--. Aheve emota ita nde pococa pípe, ichui † ohéra ava toihu --ehi chupe aracahe.

Ēgue ehi Moisés yapo, ichui aipo † ohē. Ahese aipo ava opacatu oihu yuvireco cute.



3. Tūpa ombou diez oporocuaita (Exodo 19, 20)

Mbosapi yasi pare aipo ava oyepota co ivitri Sinai ve yuvireco aracahe. Sese aipo Moisés oyeupi, aheve aipo Tūpa aipo ehi chupe:

--Acoi oyapose ava che remimbotar yuvireco, ahe ava cheundar itera --ehi aipo chupe--. Evocoiyase tecua avīye vahé yuvirecoira cheu nara --ehi aipo Tūpa Moisés upe aracahe.

Evocoiyase aipo israelita aipo ehi yuvireco:

--Yayapora aipo opacatu Tūpa remimbotar --ehi yuvireco.



Ipare aipo ava eta oyemoingatu opacatu Tūpa ñehe rendu āqua yuvireco. Iyavei aipo mimbi rendu ramoseve, oyemboya voi ivitri coti yuvireco aracahe. Aheve rumo Tūpa aipo ehi yuvireco chupe:

--Pepocoí rene ivitri rese. Acci opoco vahe sese, yucasara ita pipe --ehi ava eta upe aracahe.

Aheve aipo Tūpa oñehe písunuño tēi iyavei aipo ivitri omi-omi. Tātachi aipo osē ichui, tata avei. Ēgue ehise aipo, ava oyembosiquiye guasu yuvireco ichui aracahe.

Moisés evocoiyase Aarón rese oyeupi ivitrive yuvireco. Aheve aipo ehi Tūpa Moisés upe:

--Che Tūpa aico orogüeru vahe Egipto sui --ehi chupe--.

1. Ndererecoi chira ambuae tūpa che sui.
2. Ndereyapoi chira mbahe rahanga tēi, que t̄va pendar, t̄v̄ p̄pendar, anise que t̄ p̄pendar no.
- Ndereñenopihai chira chupe, ndereroyai chiaveira.
3. Nderesenoi tēi chira che rer.
4. Ndereporaviquí chira mb̄tuhusa ar̄ p̄ipe; ereporaviquíra rumo seis ar̄ rupi, imbosietesa ar̄ p̄ipe evocoiyase erepituhura. Esepio, seis ar̄ rupi opa ayapo t̄v̄, evocoiyase imbosietesa ar̄ p̄ipe apituhu --ehi Tūpa chupe aracahe.

Iyavei aipo ehi:

- 5. Eremboeteira nde ru, nde s̄t avei, ahese ereico pucura co t̄v̄ p̄ipe.

6. Ndereyuai chira ambuae ava no.
7. Nandeaguasai chira.
8. Nandemonundai chira.
9. Nanderemirai chiaveira eremombehuse ambuae ava recocuer.

10. Ndereipota rai chira nde rapichar mbahe, sembireco, sembiguai, semimboacua, seimba t̄ivi, guaricu, que ambuae mbahe v̄reco vahe --ehi.

Acoi ava osenduse osunu vahe iyavei osepiase overa-vera vahe yuv̄reco tātachi t̄v̄tr̄ sui osēse avei, ahese oyembosiquíye guasu yuv̄reco aracahe. Sese aipo ehi Moisés upe yuv̄reco:

--Aviyeño nde ereñehe oreu --ehi yuv̄reco--. Tūpa oñehese rumo oreu, opara oromano --ehi aipo yuv̄reco aracahe.

Ipare Moisés aipo ehiño ahe ava yuv̄recoi vahe upe:

--Pesiquíyei rene --ehi--. Esepio, Tūpa pe recoāha, "Tache mboyeroya yuv̄reco" iyavei,

"Toyuvirecoi eme mbahe tēi pīpe" ehi pēu --ehiñō aipo ava upe aracahe.

Ipare aipo Moisés omondo oporerecosa Tūpa upe. Ichui aipo oyeroquī opacatu Tūpa porocuaita ava eta upe.

Evocoiyase aipo ava eta aipo ehi yuvireco:

--Yayapora opacatu Tūpa omombehu vahe yandeu --ehi yuvireco aracahe.

Ahese aipo Moisés opa ava osipī mbahe ruví pīpe,

--Co mbahe ruví pīpe Tūpa omoime güemimbotar yandeu --ehi aracahe.

4. **Moisés upe Tūpa oñehé iri**

(Exodo 24-31)

Evocoiyase aipo Moisés, Josué rese oyeupi ivitrí rese yuvireco aracahe. Moisés rumo aipo cuarenta ari ivitríve secoi. Aheve aipo Tūpa oñehé opacatu mbahe rese chupe.

Evocoiyase aipo aheve ombou cuachiar chupe ahe ava recocuer mohivi tuprī ãgua iyavei secocuer rese porandu tuprī ãgua mbahe supi tuprī vahe pīpe. Ahe Tūpa ombou güeco píratasa chupe ava imboyeroya ãgua resendar aracahe. Iyavei ombou oporocuaita aravíter yacatu mbosapī pieta apo ãgua yuvireco chupe aracahe. Ñepei pieta aipo Pascua apo ãgua, ava Egipto sui senose agüer rese yemomahenduhasa.

Ambuae pieta aipo tembihu yavíye vahe poho agüer resendar. Iyavei Tūpa aipo ehi:

--Peyapora che rētarā che porocuaita mondo agüer rese mahenduha ãgua --ehi aipo aracahe.

Iyavei aipo ehi:

--Ip̄ipe che mboeteira peye, ereyapo aveira porerecosa cheu --ehi aracahe.

Ipare aipo ehi:

--Aarón guah̄r reseve yuv̄recoira pahi cheu --ehi--. Ahe pahi v̄ropovēhera porerecosa yuv̄reco cheu acoi mbahe t̄ei peyapose --ehi aracahe.

Aheseve Tūpa omondo Moisés upe oporocuaita ñuv̄irío itape rese icuachiapri aracahe.

5. **Ava omboetei guaca oro apopr̄i yuv̄reco** (Exodo 32)



Ipare aipo Moisés ivitrive opita pucuse aracahe, ahese aipo ava aipo ehi Aarón upe yuv̄reco:

--Ore ndoroicuai que vo catu Moisés coháve ore
reru pare oso ore sui --ehi yuvíreco aracahe.

Evocoiyase aipo ehi yuvíreco:

--Yayapo ayase tūpa yandeyeupe --ehi.

Ahese aipo güeru omabahe icatupri vahe iyavei
ocuā penda oro apoprí Aarón upe yuvíreco.

Ahe evocoiyase oyapo guaca rahanga oro aracahe.
Evocoiyase ava eta aipo ehi yuvíreco cute:

--Pesepia, ndo co tūpa chini cute --ehi--. Co
yande reru vahe Egipto sui --ehi yuvíreco.



Ipare rumo Aarón aipo ehi:

--Ayihive yayapora pieta co tūpa upe --ehi ava eta upe aracahe.

Evocoiyase aipo Tūpa osepiase co mbahe rahanga, aipo ehi Moisés upe ivitrive:

--Eso ava upe --ehi--. Cūritei mbahe tēi, opa ava oseya co tecocuer avīye vahe yuvireco. Oyapo oro guaca rahanga tēi yuvireco oyeupe --ehi--.

Evocoiyase ahe chupe vīropovēhe mbahe mīmba yucaprī, oyerure avei yuvireco chupe --ehi aipo Tūpa Moisés upe.

Ichui aipo Moisés, ivitrī sui ogüeyise, osepi guaca rahanga. Sepiase, aipo oñemoiró iteanga, sese aipo itape opa omboviapi ivīve. Opa aipo ñuvirío itape oyeca aracahe. Ipare aipo Moisés opa guaca rahanga otīapri, ahese aipo ehi Aarón upe:

--¿Mahera ereyapo co nungar? --ehi aracahe--.
Nde ereyapo mbahe tēi --ehi chupe.

Evocoiyase aipo Aarón aipo ehiño chupe:

--Ava moco oyapo mbahe naporai vahe yuvireco. Esepi, ahe niha oyapo otūpaguā yuvireco, ahe avei güeru oro yuvireco cheu. Ipare che amondo tatave, ichui osē guaca rahanga --ehi aipo Moisés upe aracahe.

Aarón aipo he pare, aipo Moisés oyerure iri Tūpa upe aipo ehi:

--Eyapo mbahe icatuprī vahe, ndeñero ava upe mbahe sembiapo ai rese --ehi.

Evocoiyase aipo Tūpa aipo ehi:

--Pemanora mbahe tēi peyapose --ehi aipo.

Ahese Moisés aipo ehi chupe:

--Acoi nandeñeroi etese ava upe, che mombo ayase eve ehi; anise, emboyeho nde cuachiar pīpe sui che rer --ehi chupe.

Tūpa rumo aipo ehi chupe:

--Che amboyehora che cuachiar pīpe sui acoi ava mara-mara tēi yuvīrecoi vahe --ehi aipo Moisés upe.

Aipo ihe pare, aipo setá israelita omano yuvīreco.

Ipare aipo Moisés oyeupi iri ɬvītrī rese.

Aheve aipo Tūpa oicuachía iri ñuvīrīo itape rese oporocuaita chupe. Aheve Tūpa aipo ehi chupe no:

--Moisés, nde ndaseco marai vahe ereicora.

Inungar che ndaseco marai vahe aico --ehi aipo chupe.

Ipare aipo Moisés oyevīse ava upe, ahese aipo sovarendī aracahe. Esepio, aipo ahe oñemoñeta Tūpa rese yuvīreco, sese aipo īgūe ehi sova aracahe.

6. Israelita oyapo Tūpa rēta yuvīreco (Exodo 35-39)


Ipare Moisés aipo ehi ava upe:

--Opacatu iquerēhī vahe che pītīvī ūqua yuvīreco Tūpa rēta apo ūqua rese, ahe togüerumi opacatu mbahe oporerecosa yuvīreco --ehi aipo aracahe.

Ahese aipo opacatu ava güeru oporerecosa yuvīreco guarepochi, turucuar icatuprī vahe, mbahe pirer, ɬvīra avīye vahe iyavei ita icatuprī vahe iyavei ambuae mbahe no.

Ahese aipo oyapo Tūpa rēta yuvīreco cute; Tūpa Moisés upe imombehu agüer rupi tuprī aipo oyapo yuvīreco. Evocoiyase aipo Tūpa rēta ɬvīrape sambīpe vīreco yuvīreco oro pīpe yaopri tuprī

aipo. Iyavei aipo ivate nara turucuar icatupri vahe, ipara-pará vahe, yayí vahe. Iyavei iharíve ambuae turucuar yaná vahe mbahe ragüer piapri iyavei aipo ñuvirío mbahe pirer pípe osovapí iri yuvíreco aracahe.



Oquenda avei aipo turucuar icatupri vahe, secose vahe no. Opacatu aipo mbahe Túpa rëta apopri, oro pâve iyavei ivira aipo oro pípe yaopri tupri ité. Ñuvirío oyeasía vahe aipo Túpa rëta. Yipindar oí aipo vireco itaisí rapisa renda tahimi vahe. Aheve avei oime pan renda no, ahe aipo pahi upé naraño ité avíye yepi iyavei aipo oime avei ñepei vera hí. Sese aipo oime siete tataendi, ahe aipo sendí arí yacatu rupi yepi.

Evocoiyase aipo ambuae oí pípe oime arca. Ahe iharíve aipo oime ñuvirío Túpa rembiguai íva pendar rahanga. Iyavei aipo ipípe oime diez Túpa porocuaita itape rese. Ipípe avei aipo tembihu poratu pípe íva sui imbourpri. Evocoiyase aipo pahi ivate catu vahe güeraño ité aipo oique ahe oí

p̄ipe yepi. Iyavei aipo ñepei arñō ité ñepei-peí
aravíter p̄ipe oique ip̄ipe tuví reroique ãgua
oangaipa rese, ava angaipa rese avei. Esepiá,
Túpa aipo ehi:

--Acoi tuví ndoyepiyereise, che nacheñeroi
chira angaipa upe --ehi aracahe.

Evocoiyase aipo Túpa r̄eta rovai oime mbahe
reropovéhepri renda tuvichá vahe aracahe. Aheve
aipo pahi osapí porerecosa Túpa upendar arí yacatu
rupí yepi añihivei, caharuse avei.



Ava güeru oporerecosa, "Aviye ndeu" ohe āgua Tūpa upe yuvireco, angaipagüer upe ñero āgua avei. Evocoiyase aipo angaipa resendar porerecosa rapisa tecua rocarve aracahe.


Evocoiyase aipo Tūpa rēta, mbahe seropovēhepri renda mbiterve aipo i riru oime. Aheve aipo pahi oporaviqui pare, oyepoi yuvireco aracahe yepi. Tūpa rēta āchisa aipo turucuar aviye vahe pāve aracahe. Iyavei aipo ñachisa moviracuasa guarepochi apoprī pāve iyavei oquenda ari sēsa cotindar turucuar ipara vahe iyavei secose vahe apoprī aracahe.

Aarón turucuarā avei aipo oyapo icatuprī vahe yuvireco, tahir upe avei. Esepia, ahe aipo tūparo rese ñangarecuar yuvirecoi, sese ēgüe ehi yuvireco chupe.

Yapo pare, aipo Aarón omondo porerecosa Tūpa upe aracahe, ahese avei aipo Moisés, Aarón rese osovasa ava yuvireco. Evocoiyase aipo Tūpa ombou tata i va sui yuvireco chupe, ahese aipo porerecosa ocai. Evocoi piye aipo omboycua ava rese oviharetesa.

Evocoiyase aipo sēta rese ogüeyi seco pīratasa aracahe. Iyavei ahe omondo i va quīha tuvichá vahe güēta harive ari piye iyavei aipo pītu piye omondo tata.

Evocoiyase i va quīha oguatase aipo, ava avei supive oguata yuvireco iyavei i va quīha opitase, supive avei ava opita yuvireco. Ēgüe ehi Tūpa ava rerasopa ambuae i vi rese aracahe.



7. Canaán rerovicave ava oyepota yuvíreco (Números 13, 14)

Ipare coiyemi aipo Tūpa aipo ehi Moisés upe aracahe:

--Namombrívei co iví sui peico cute acoi amondo vaherā pēu --ehi aipo aracahe.

Evocoiyase aipo ehi:

--Eyocuai ru ava imondo Canaán ve. Tosepia ité ru iví yuvíreco amondo vahe Abraham upe, ahe co amondora pēu --ehi aipo ava upe.

Evocoiyase aipo yuvíraso doce tupri ava Canaán ve. Aheve aipo opa ité osepia tupri iví yuvíreco.

Ichui oyevíse aipo yuvíreco, ovostí yugüeru mbahe ha rese. Ahese aipo ehi yuvíreco:

--Aheve iví avíye ité --ehi--. Iyavei setá oime mbahe mimbá cambi aheve, iyavei eiri --ehi--.

Iyavei mbahe ha aviyé vahe oime seta aheve --ehi aipo ava yuvíreco--. Co rumo mbahe oime aheve, ava píratasa tuvichá etepri. Sese ndayaicatuí chira secopi ãgua --ehi aipo yuvíreco aracahe.

Ipare rumo aipo Caleb, Josué rese aipo ehi yuvíreco:

--Yaso poyavara, ndayavai ahe pendar ava recopi ãgua --ehi--. Esepiá, Túpa niha secoi yande rese --ehi aipo aracahe.



Israelita yuvírecoi vahe rumo aipo osiquiyé etepri iyavei oyaseho aipo yuvíreco aipo ehi:

--Ndayasoi chira ayase. Esepiá, yande yuca tēira --ehi--. Yayevíñora Egipto ve --ehi aipo yuvíreco.

Evocoiyase aipo ehi aipo yuvíreco no:

--¿Mahera Túpa yande reru cohabe, yande yucapa
āqua? --ehi aipo ava yuvíreco aracahe.

Evocoiyase aipo Túpa oñemoiro ité yuvíreco
chupe, aipo ehi:

--Co ava ndache reroyai yuvíreco. Sese
ndoyuvíroi quei chira Canaán pípe yuvíreco --ehi
aipo--. Tahír güeraño rumo yuvíroiquera ipípe
yuvíreco; Caleb, Josué avei yuvíroiquera ipípe.
Oguatara rumo opacatu cuarenta aravíter rupi ava
poréhisa rupi yuvíreco, acoi omanopase voi co ava
oyeroya rai vahe che rese yuvíreco --ehi aipo
Túpa.

Evocoiyase aipo co osenduse ava aipo nungar
yuvíreco, tasí ipíhave. Esepiá, aipo ndoyeví pota
iri íví iporupíröhísave yuvíreco aracahe.

Sese aipo ehi yuvíreco:

--Yaique catu co íví pípe, acoi Túpa ombou vahe
yandeu --ehi tēi yuvíreco.

Ipare rumo ndiya iri yuvíreco chupe iyavei Túpa
ndoipítívíri iri yuvíreco. Sese aipo yuvíroi que
potase co íví pípe, ahe pendar ava aipo ovava
yuvíreco chupe, ahese aipo ahe ndoicatui secopí
yuvíreco, sese aipo opaño oyeví íví
iporupíröhísave yuvíreco aracahe.

8. Túpa oñemoiro Coré upe (Números 16)

Ñepei arí pípe aipo co yuvírecoi vahe mbosapi ava
ahe: Coré, Datán, Abiram, ahe aipo Moisés
oyamotaréhí yuvíreco aracahe. Evocoiyase aipo ehi
Moisés upe, Aarón upe avei yuvíreco:

--Ava opacatu oyapo tupri tēi mbahe yuvireco iyavei Tūpa secoi eté sese yuvireco no. ¿Mahera ru peyeapo mborerecuar no? --ehi aipo Moisés upe yuvireco aracahe.

Evocoiyase aipo Moisés aipo ehi:

--Ayihive Tūpa omombehura pēu ava pīha secoi sese yepi iyavei ava pīha ipehapri secoi sese hañeco āgua --ehi--. ¿Mahera peyeapo pota rai pahi rerecuarā? --ehi aipo yuvireco chupe aracahe.

Ahere ayihive aipo Tūpa aipo ehi cute:

--Peyepepi opacatu Coré, Datán iyavei Abiram sui --ehi.

Ahese aipo Tūpa oyoca īvī, ipipe aipo co mbia mbosapi yuvirecoi vahe, supindar avei opa ovīapi yuvireco aracahe.

9. Aarón pococa sorī

(Números 17)

Ichui Tūpa aipo ehi Moisés upe:

--Iyacatu co ava doce tupri oñemu yuvirecoi vahe rerecuar güerura opococa yuvireco ndeu. Acoi ava aiporavo vahe pococa, ahe sorira --ehi--. Evocoiyase ndipoi chira ava oñemoiro vahe ndeu --ehi aipo Tūpa Moisés upe.

Evocoiyase aipo doce ava rerecuar yuvirecoi vahe güeru opococa Moisés upe yuvireco.

Ahe aipo Moisés omondo tūparo pīpe. Ipare aipo añihivei Aarón pococa rese güeraño oime so iyavei aipo ipotri, iha avei aipo no.

Evocoiyase aipo Moisés opa iri omboyevi ipococa ambuae ava rerecuar upe. Aarón pococa güeraño rumo aipo omondo tūparo pīpe aracahe. Ahe aipo

ava mahenduha āqua chinira, ahese ndipoi chira ava oñemoiro vahe Moisés, Aarón upe yuvireco cute. Ēgue ehi Tūpa Moisés upe. Esepiá, Moisés Aarón rese viroya etepri yuvireco aracahe.

10. Moisés omota ita (Números 20)

Ipare aipo ava oguataño ité ava porēhisa rupi yuvireco aracahe. Ahese aipo † ipane yuvireco tōhu, ihusei tēi yuvireco aracahe. Sese aipo oñemoiro iri yuvireco. Tūpa rumo aipo aipo ehi Moisés upe:

--Eipis† Aarón pococa; eñehe ita upe, ichui tohē † --ehi aipo chupe aracahe.

Ipare rumo aipo Moisés oñemoiro, sese noñehei ita upe; omotaño tēi ñuvirío rupi Aarón pococa pípe. Ahese aipo † ohē ita sui yuvireco chupe. Ichui opacatu ava oīhu yuvireco aracahe. Ipare aipo Tūpa aipo ehi Moisés, Aarón upe avei:

--¿Mahera ndache reroyai peye? --ehi.

--Pe rumo ndapeñehei ita upe. Pemotaño tēi, sese ndapeiquei chira †vì piásu pípe iyavei ndapeyepotai chiaveira aheve --ehi chupe aracahe.

Ipare aipo omano Aarón, imanore aipo tahir Eliazar serer vahe opita pahi †vate catu vahe aracahe.

11. Moisés osupi mboi rahanga †vira rese (Números 21)

Ipare aipo ava omboasi iri Moisés upe mbahe yuvireco aipo ehi:

--¿Mahera ore reru coháve eve ore manopa āgua tēi? --ehi--. f ndipoi coháve yandeu iyavei mbahe tembihu ndipoi coháve --ehi--, iyavei aipo co tembihu fva pendar ndoroyuse iri --ehi aipo yuvireco.

Sese aipo Tūpa ombou mboi yuvireco chupe aracahe 'toichuhu iyavei tomano setá ava yuvireco' ohesave.

Ipare aipo yugüeru ava Moisés upe aipo ehi:

--Ore oroyapo mbahe tēi ndeu ore ñehe-ñehe tēisa pípe iyavei Tūpa upe --ehi yuvireco.

Ipare aipo oporandu iri Moisés upe yuvireco, "Eyeroquimi tēi Tūpe upe ore rese, tovirocuami tēi mboi ore sui" ehi aipo yuvireco chupe aracahe.



Ipare aipo Moisés oporandu Tūpa upe aipo ehi:

--Erocuapa mboi ava sui --ehi aipo Tūpa upe.

Tūpa evocoiyase aipo ehi:

--Eyapo guarepochi mboi rahanga --ehi--. Ahe eresupira ūvira rese --ehi--. Acoi oichuhuse mboi que ñepei ava, ahe ava omahese co mboi rahanga guarepochi rese, ahese oicovera --ehi aipo Tūpa chupe aracahe.

Moisés evocoiyase oyapo mboi rahanga guarepochi. Evocoiyase aipo acoi oichuhu vahe opacatu omahe vahe yuvireco sese, ahe aipo nomanoi yuvireco aracahe.

12. Balaam osovasa israelita

(Números 22-24)

Ichui aipo cuarenta aravíter pare israelita oyepota iri Canaán rerovícave yuvireco aracahe. Aheve aipo oime mborerecuar Moab pendar, ahe serer Balac. Evocoiyase aipo ahe osepia setá etepri ava israelita. Ahe rumo aipo osiquiyeño ichui. Sese aipo oyocuai opovri pendar aipo ehi oñehe mombehu água imondo:

--Peseca Tūpa ñehe mombehusar Balaam. Chupe aipo peyera: "Setá etepri ava yuguero Egípto sui. Eyu, teremomara nde ñehe pípe, ichui oroicatura secopipa yuvireco" peyera chupe --ehi aipo imondo aracahe.

Ipare aipo yuviraso ava Balaam upe oñehe 'tou' oya yuvireco.

Ahese rumo aipo Tūpa aipo ehi:

--Peyapoi rene mbahe chupe --ehi--. Esepia, che asovasa sereco --ehi 'toso eme ava rupi' oya aracahe.

Evocoiyase aipo Balaam aipo ehi ava upe:

--Tūpa ndoipotai che so āqua pe rupi --ehi aipo ava upe aracahe.

Ipare aipo güeru uca pota iri mborerecuar Balaam, "Eyuño ité" ehi. "Ereyuse ava rupi, che amboepira setá ndeu" ehi aipo chupe aracahe.

Evocoiyase aipo Balaam aipo ehiño:

--Taicua rane catu, ¿mara ehira pīha Tūpa co pītu pīpe cheu? --ehi aipo ava upe aracahe.

Evocoiyase aipo Tūpa aipo ehi chupe:

--Eso ayase ava rupi --ehi chupe aracahe.

Ahese aipo Balaam oyeupi güeimba guaricu haríve oso. Ipare aipo Tūpa oñemoiro Balaam upe. Esepi aipo, guarepochi rese tēi ēgue ehi oico. Sese aipo mbosapī rupi Tūpa rembiguai oyemboyecua quīse pucu reseve chupe. Ahe rumo aipo ndosepiai, guaricu rumo aipo osepia. Evocoiyase ahe sepiase aipo co cotī rupi oyahuva pota tēi aipo. Iyavei oñeno-ñenoño. Balaam rumo aipo ndosepiai Tūpa rembiguai iyavei aipo ocua-ocuaño aipo guaricu rese.

Sese aipo Tūpa omoñehe guaricu aracahe.

Evocoiyase aipo co mbahe mīmba oporandu Balaam upe:

--¿Mahera vo co erecua che rese mbosapī rupi?
--ehi--. Esepi, setá aravíter rupi tēi niha orovíraso que rupi yepi --ehi aipo guaricu chupe--, iyavei ndayapoi mbahe naporai vahe ndeu
--ehi chupe aracahe.

Ahese ramo aipo osepia Tūpa remimbou, ahe aipo vīreco quīse pucu opove. Ichui aipo Tūpa remimbou aipo ehi chupe:

--Ehi co guaricu ēgue ndehise, oroyuca itera viña --ehi aipo chupe--. Evocoiyase cūritei eso ava rupi --ehi chupe--, ereñehera rumo Tūpa ndeu

mbahe omombehu vahe reseño tupri --ehi Tūpa rembiguai chupe.

Ipare aipo mbororecuar Balac osepiase Balaam, aipo ehi chupe:

--Tamondo setá guarePOCHI ndeu --ehi aipo chupe--, eremomarara evocois israelita yuvírecoi vahe nde ñehe pípe --ehi aipo Balac Balaam upe aracahe.

Mbosapí yupagüer rumo aipo Tūpa oñehe omundo Balaam upe israelita rovasa áqua aracahe. Sese aipo mbororecuar Balac ombahemboasi chupe. Ipare aipo aipo ehi chupe:

--Eyeviño nde rētave --ehi--. Esepio, ereyapo mbahe tēi. Eresovasa che amotaréhimbar eico, sese namboepí chira ndeu --ehi chupe aracahe.

Balac upe rumo aipo ehi:

--Ñehesa Tūpa ombou vahe cheu, ahe güeraño amombehura ndeu. Evocois israelita nde recopíra yuvíreco --ehiño chupe.

Ipare aipo Balaam oyeví tupriño tēi oso güétave aracahe.

13. Balaam omboangaipa uca israelita (Números 25; Josué 13)

Ipare aipo Balaam oyapo mbahe naporai vahe aracahe. Aipo ehi aipo cuña Moab pendar upe: "Pemoñeta israelita yuvírecoi vahe pe rese oque vaherā" ehi aipo chupe.

Ipare aipo ahe cuña oñehe yuvíreco cuimbahe upe: "Yaso pietasave" ehi yuvíreco. Ahe aipo otúpa omboetei uca yuvíreco chupe. Evocoiyase

aipo setá israelita oñenopīha Moab pendar mbahé rahanga upe yuvíreco.

Ahese aipo Túpa aipo ehi iri Moisés upe aracahe:

--Opacatu ava acoi yuvíroque vahe Moab pendar cuña píri, ahe opara omano yuvíreco --ehi.



Ipare aipo israelita ovava Moab, Madián yuvírecoi vahe rese yuvíreco. Ahese aipo osecopi ité yuvíreco. Balaam avei aipo oyuca supive yuvíreco. Evocoiyase aipo Moisés aipo ehi sundao upe:

--Cuña Moab pendar niha ombopa israelita yuvíreco Balaam ñehe mboyeroyasa pípe. Ahe cuña avei evocoiyase omanopara yuvíreco --ehi.

Ahese supi eté opa oyuca yuvíreco aracahe.

**14. Moisés omondo oñehe ipa vahe israelita upe
(Deuteronomio 4-6, 34)**

Tūpa aipo ehi Moisés upe:

--Emombehu ava upe aipo erera: "'Acoi pesasase iai Jordán iyavei acoi peyepotase ivi Canaán ve, pemosepara ava ahe pendar peyesui' ehi aipo. 'Iyavei petihapiti pa itūpa yuvireco ichui no. Evocoiyase amondora ahe ivi pēu' ehi" erera chupe --ehi aipo Tūpa Moisés upe aracahe.

Ipare aipo Moisés aipo ehi eté ava upe iyavei,

--Pemboetei Tūpa saisusa pipe, peguata supi imboetei água opacatu pe piha pipec. Iyavei peyapo opacatu mbahe semimbotar, perúora mbahe pe porerecosa chupe yepi --ehi--. Esepio niha, ivi, ivi opacatu Tūpa mbahe --ehi--. Tūpa niha pe pota opacatu oyese pe rereco água --ehi--. Pemboheño



itera pe rahîr opacatu mbahe Tûpa pe cuai vahe rese 'togaata avei Tûpa remimbotar rupi yuvîreco' pe hesave. Iyavei peicua catu, peresarai rene Tûpa sui --ehi omu eta upe.

Iyavei aipo Moisés aipo ehi vîteño ava upe aracahe:

--Acoi peicose pe recuave, aviyeteramo pemomarara ava peico --ehi--. Peporavîquise peico, aviyeteramo peyucara ava pe mahemohaëhi pîpe. Acoi ëgüe ehise ava, iyacatu oñemi tecua yoepîsa pîpe. Iyavei acoi noseise ahe tecua pîpe sui, ahese omano vahe mu ndoicatui chietera mbahe apo äqua yuvîreco chupe --ehi aipo--. Sese perecora seis tecua yoepîsa pe ivi piásu pîpe --ehi aipo.

Ipare Moisés aipo ehi Josué upe aracahe no:

--Tûpa aipo ehi cheu: "Nde ndererasoi chira ava ahe ivive" ehi cheu. Nde rumo ererasora ava --ehi Josué upe.

Ipare aipo Moisés oso ivitrí Nebo ve. Aheve Tûpa omboyecua ivi Canaán chupe aipo ehi:

--Co niha ivi amondo vahe Abraham upe, Isaac upe, Jacob upe iyavei tahîr upe no. Evocoiyase tamboyecuaño têi ndeu; ndereyepotai chira rumo aheve --ehi aipo chupe aracahe.

Ipare aipo Moisés omano cute, ahese aipo Josué opita ava rese hañeco äqua aracahe. Ipare aipo ndipo iri eté israelita yuvîrecoi vahe Tûpa ñehe mombehusar Moisés nungar aracahe.

Ichui aipo ambuae upe Tûpa iquer nungarve têi oñehe, Moisés upe rumo Tûpa oñehe sovai eté aracahe.

7. JOSUE IVI PIASU PIPE MBORERECUAR SECOI

1. Josué recocuer aracahendar (Josué 1, 2)

Aracahe aipo Moisés manore, Josué opita israelit rerecuarā. Ahese Tūpa oñehe chupe aipo ehi:

--Nde eique evoco i vi pipe. Ereguatara opacatu ahe ivi rupi ipis̄ āqua. Aheve nde guatasa rupi ereico etera, nderesiquiyei chira eico yepi. Esepi, che niha aicora nde reseve yepi. Iyavei ereroyara opacatu che porocuaita, ahese ereguata tuprira eico --ehi chupe.



Evocoiyase aipo ahe oyocuai ñuvirío mbia imondo,
--Tapesepia tupri mbahe tecua Jericó ve --ehi
aipo chupe.

Co tecua yipindar upe aipo ovavara yuvireco.
Evocoiyase evoco ñuvirío ava yuviroique Jericó
pipe. Aheve aipo Jericó iquier osepiase co ava
yuvireco,

--Yaipisipa voi --ehi yuvireco viña.

Aheve rumo aipo cuña Rahab serer vahe, ahe aipo
oipitiví ñomi água ava sui. Ahe cuña aipo omose
uga inicha rese tecua áchisa metana rupi tecua
popive voi. Evocoiyase ahe aipo ehi yuvireco
chupe:

--Acoi oroyuse, orovavara co tecua upe, ahese
ndoroyapoi chira mbahe ndeu iyavei nde mu upe no
--ehi aipo yuvireco chupe aracahe.

2. **Israelita iai Jordán rasagüer** (Josué 3, 4)

Ichui aipo mbosapi arí pare, Josué aipo ehi:

--Yaso. Yasasa iai Jordán yande reique água
yande ivive --ehi aipo--. Pahi rane rumo
yuvirasora tenonde. Ahe rumo ovostira yuviraso
Túpa porocuaita ríru rese --ehi aipo aracahe.

Ahe arí pipe rumo aipo iai savapiro tupri vité
tembihu avíye ramose. Ahese aipo pahi yuviroha
ramose iive yuviraso, avíyeteramo tēi Túpa opa
omombita i yuvireco ichui. Ipare aipo opacatu
israelita osasa iai ipiru vahe rupi yuvireco.
Evocoiyase Josué aipo omopuha uca ava upe doce ita
iai mbiterve iyavei ambuae doce omonuha iai rovai
ava momahenduha água, "Túpa ité yande pítiví co
iai rasa" he água aracahe.

Ipare aipo yuvíroiquese ahe íví pipe, ohu tembihu ipipendar yuvíreco cute, sese aipo Túpa nomondo iri mbahe iva pendar semihura yuvíreco.

3. Jericó āchisa nduru agüer (Josué 6)

Jericó aipo yipindar tecua osecopí vaherā yuvíreco opacatu íví rereco água aracahe. Ahe tecua rumo ñachimbrí tuprī. Iyavei aipo oime oquenda guasu sese. Ahe tecua pendar ava rumo aipo israelita sui osiquiyepave oyoquenda tupriño yuvíreco aracahe.

Movíro arí pare Túpa oñehe Josué upe, "Na erera co tecua āchisa mondurupa" ehi.

Josué evocoiyase oyapo Túpa oyeupe imombehu agüer rupi. Evocoiyase aipo seis arí rupi oyere tēi tecua íví yuvíreco. Ñepei arí pipe rumo ñepeiño oyere yuvíreco yepi. Tenonde aipo sundao eta opacatu mbahe vireco ovava água yuvíreco no. Ëgüe ehi opivondí yuvíreco.

Saquicuei evocoiyase yuvíraso pahi eta. Ahe pahi omoñehe güemimbí yuvíreco. Ambuae pahi rumo aipo ovostíño ité Túpa porocuaita ríru rese yuvíreco. Iyavei aipo pahi raquicuei yuvíraso opacatu ambuae israelita yuvírecoi vahe. Ahe ndayaívui tuprī yuvíreco aracahe.

Ipare rumo aipo imbosietesa arí pipe ayihiteve catu yuvíraso oyere água siete yupagüer tecua rese yuvíreco. Ahese aipo aviyeteramo tēi omoñehe güemimbí yuvíreco. Iyavei aipo opacatu ava eta osapucai pírata yuvíreco. Ahe ramoseve aipo tecua



āchisa opa onduru. Aheseve aipo sundao eta yuvíroique tecua pípe ava yucapa água yuvíreco.

Evocoiyase aipo cuña Rahab, omu reseño tuprī, oñepístiro yuvíreco, ahe güeraño aipo ndoyucái sundao yuvíreco. Ipare aipo tecua osapí yuvíreco.

Aheseve rumo aipo Acán serer vahe, opoco oro rese iyavei aipo turucuar icatuprī vahe rese tecua Jericó ve. Ahe aipo vīraso güëtave ñomi. Tūpa rumo yipindar aipo ehi yuvíreco chupe viña:

--Ndapepocoí chira que mbahe tecua Jericó pendar rese --ehi yuvíreco chupe.



**4. Ñepei ava rembiapo sui opacatu ava iparañsu
yuvireco**
(Josué 7, 8)

Ñepei tecua Hai serer vahé tahími, sese israelita aipo ehi chupe:

--Co tecua tahími vahé --ehi--. Cûriteimi revo ava yayucapara --ehi yuvireco viña.

Ichui rumo aipo acoi ovavase ité yuvireco cute, aipo Hai ñguar omoña, oyuca treintaiseis sundao israelita yuvireco. Omu manose, aipo Josué oyaseho Túpa upe. Túpa rumo aipo ehi chupe:



--Esepio, oime pe pāhu pendar imonda vahe, ndovirayai vahe acoi che ñehe. Sese nde mboetasa omano pe pāhu sui --ehi--. Sese ndopopitivti chira oime vitese angaipa pe pāhuve --ehi chupe aracahe.

Coije rumo aipo oicua yuvireco mbia Acán serer vahe, ahe imonda vahe. Evocoiyase aipo ahe vñose ava recosa sui opacatu imbahe eta reseve yuca água yuvireco. Ipare voi aipo Túpa oipitivti ava Israel ahe tecua iguar momba água cute.

5. Ava Gabaón aipo ombopa Josué yuvireco (Josué 9)

Evocoiyase aipo ava Gabaón pendar osenduse yuvireco co mbahe-mbahe tēi oime vahe Jericó ve, ahese aipo osiquiyé iteanga yuvireco. Evocoiyase vñose oaracua sui opitañemoñetasa avíye vahe yuvireco güecocuer písiro água. Ahese aipo omondo volsa mbahe pirer cuacua apoprí guaricu haríve seru yuvireco. Uva rícuer ríru mbahe pirer cuacua apoprí avei. Iyavei aipo omonde pitaqui cuacua, turucuar cuacua avei iyavei vraso pan cuacua sávehasi vahe. Ahe aipo Josué mbopa água oyapo yuvireco. Ichui yugüeru Josué upe aipo ehi yuvireco:

--Ore oroyu ambuae ivi amombrí vahe sui. Orosendu opacatu mbahe oyapo vahe pe Túpa Egipto ve --ehi tuprí tēi aipo yuvireco--. Iyavei aipo oyapo vahe ambuae mborerecuar coha pendar upe. Sese ore rerecuar ore mbou ore reco tuprí água pe rese --ehi yuvireco Josué upe.

Ipare aipo ehi yuvireco no:

--Ore orosē, oroyu ore recua sui ore turucuar, ore p̄itaqui ip̄asú vahe rese viña --ehi aipo yuv̄treco--. Iyavei pan yapop̄i ramo orogüeru viña no --ehi yuv̄treco--, ore oroico amombr̄i coháve sui. Evocoiyase emboumi nde ñehe ore yucaéh̄isa resendar oreu --ehi Josué upe yuv̄treco.

Ahese Josué omaheño t̄ei imbahe rese, osepia aipo iturucuarai-raimi t̄ei yuv̄treco. Sese aipo ndoporandui Tūpa upe co ava recocuer rese. Esepia niha, aipo v̄iroya ité mb̄ia yugüeru vahe ñehe. Sese avei aipo ehi:

--Ndape yucasai chira pe --ehi.

Ichui aipo ahe mb̄ia oyev̄i güecuave yuv̄raso.

Mbosap̄i ar̄i pare aipo evocoí mb̄ia osovaíchi tecua Gabaón ve yuv̄treco. Ahese aipo oicua Josué mbopasa yuv̄treco. Ahe aipo Josué omboasi. Ipare rumo ndoyuca ucaiño ité aipo aracahe. Israelita rembiguairā t̄ei v̄treco. Ëgüe ehi aipo aracahe.

6. Ar̄i, yas̄i reseve Josué omombita uca (Josué 10)

Ipare aipo ambuae cinco tecua pendar oñemoíró iteanga yuv̄treco Gabaón pendar rese. Ahe aipo yuv̄raso sopeña ovava áqua yuv̄treco chupe aracahe. Evocoiyase aipo Gabaón rerecuar oyocuai ava imondo Josué upe aipo ehi:


--Peyu poyavami t̄ei ore rep̄i áqua --ehi yuv̄treco.

Ahese aipo Josué yuv̄raso poyava osundao reseve. Iyavei aipo Tūpa oip̄itiv̄i etepri ivava áqua rese cinco tecua pendar upe aracahe. Iyavei aipo setá oñemi pota yuv̄treco israelita sui

os̄iquiyepave viña. Tūpa rumo aipo ombosururu ita
īva sui iharive, inungar acci amanda oha vahe
yepi; ipipe aipo opa oyuca.

Evocoiyase aipo ar̄i momba tupri ovava opita
vahe rese yuvireco. Sese aipo Josué ar̄i oique
potase oso, ahese aipo oyerure iri Tūpa upe
aracahe:

--;Ar̄i emombitaño v̄ite yasi reseve! --ehi--.
Tosesapeño v̄itemi tēi Gabaón upe ore vava āgua
--ehi aracahe.



Evocoiyase Tūpa cūriteimi omombita ar̄i, yasi
avei seni ñepei ar̄i rupi acci opase voi ava
israelita omomba oamotarēhimbar yuvireco. Ndipo
iri ambuae ar̄i ēgue ehi iri vahe.

Yepe aipo ambuae tecua pendar iyavei mborerecureta oñemonuha tēi avei yuvíreco Josué, israelita amotaréhimbave ovava água chupe yuvíreco aracahe viña, Tūpa rumo oipítivitiño ité ahe ava recopí água. Ipare aipo opa vireco opovrīve ahe ivi Tūpa omombehu vahe yipíve yuvíreco chupe imondo água. Ipare aipo opituhu ovavasa sui yuvíreco cute.

7. Josué ñehe ipa vahe (Josué 24)

Ipare Josué opa omboyaho-yaho ivi ñepei-peí upe co doce Israel suindareta yuvírecoi vahe upe. Evocoiyase aipo opacatu yuvíraso ñepei-peí güecua rupi yuvíreco oivi rupi-rupi aracahe omu reseve-seve. Leví suindareta rumo aipo oyapo güecuarã opacatu tecua mbiterve yuvíreco. Ahe aipo ndovírecoi oivi ité yuvíreco. Ahe iporavíquisa rumo aipo tūparo reseño ité iyavei aipo ambuae ava porerecosa pípe sui yuvírecove yepi. Ëgüe ehi aipo Leví suindar tūparo rese yangarecuar yuvíreco aracahe.

Setá aravíter pare, aipo Josué cuacuami cute, ahese aipo opacatu mborerecuar Israel pendar oichoho uca aipo ehi:

--Tūpa omundo opacatu co ivi avíye vahe pẽu, sese pemboyeroyara opacatu pe piha pípe. Anise peiporavo pero ya herã, che rumo opacatu che rahir reseve orovíroyara Tūpa --ehi.

Evocoiyase opacatu ava aipo ehi yuvíreco:

--Tūpa güeraño ité yamboeteira --ehi.

Ahese Josué ita tuvichá vahe omopuha ñepei
tivira tūparo rovai ihāi vahevriye. Ipare aipo
ehi:

--Co ita Tūpa ñehe rese pe yemomahenduha āgua
iyavei Tūpa reroñroēhīt āgua --ehi.

Ipare aipo opacatu oyevi güëta rupi yuvireco.
Coiye aipo Josué omano. Secove viteseve, aipo
israelita viroya vîte Tūpa yuvireco iyavei aipo
ava cuacua osepia vahe Tūpa mbahe oyapose yuvireco
aracahe.



**8. AVA RECOCUER MOINGATUSAR YUVIRECOI VAHE
ISRAEL PIPE**

**1. Ava recocuer moingatusar yuvirecoi vahe
israelita pāhuve
(Jueces 2-3)**

Josué manore aipo israelita nimahenduha iri Tūpa rese yuvireco aracahe. Mbahe rahanga reseño aipo imahenduha yuvireco, chupeño ité aipo oyerure yuvireco yepi. Iyavei aipo co Tūpa ndovirayai vahe rese aipo omenda yuvireco yepi no.



Sese aipo Tūpa oñemoiro chupe yuvireco.
 Evocoiyase aipo Tūpa oseyao ité 'tosecopiño ayase
 ambuae tecua rupindar yuvireco' oyapave.

Evocoiyase aipo ahe ava eta oyemomahenduha iri
 Tūpa rese oangaipa mboasisa pípe yuvireco aracahe,
 seseoyerure yuvireco chupe. Evocoiyase Tūpa
 omundo ava recocuer moingatusar ipitivti água
 'tosecopi oamotaréhīsar yuvireco' oyapave aracahe.

Ipare rumo aipo omanore evocoai ava recocuer
 moingatusar ichui yuvireco, ahese aipo ava
 sesarai, nimahenduha iri Tūpa rese yuvireco. Sese
 aipo oyecopí uca iri oamotaréhīsar upe yuvireco.

Setá rupi ēgue ehi yuvireco aracahe.

2. Cuña Débora serer vahe ava recocuer moingatusar secoi (Jueces 4)

Iyavei aipo veinte aravíter rupi cananeo
 yuvirecoi vahe osecopí aipo israelita yuvireco
 aracahe. Sese aipo iparaísu yuvireco, oparaísusue
 aipo oyaseho Tūpa upe yuvireco.

Ahese aipo cuña Débora serer vahe mborerecuar
 ava recocuer moingatu água secoi. Tūpa aipo oñeho
 chupe. Ahe evocoiyase aipo omombehu iñehengagüer
 ava upe oico aracahe yepi.

Ñepei arí aipo Débora oichoho uca Barac oyeupe,
 aheve aipo ehi chupe:

--Tūpa aipo ehi: "Pemonuhapa opacatu sundao eta
 ovava vaherā yuvireco cananeo yuvirecoi vahe upe"
 ehi --ehi.

Iyavei aipo ehi chupe:

--Tūpa niha pe pítivtiira seitipa água --ehi
 aipo Barac upe.

Evocoiyase aipo Barac aipo ehi chupe:

--Acoi nde eresose che rupi vavasave, ahese che avei asora --ehi--. Acoi nderesoise rumo, che avei ndasoi chira no --ehi aipo Barac chupe aracahe.



Evocoiyase aipo Débora omondugüeño ité co ava sundao rehíi vava ãguave. Iyavei aipo Túpa oipítivíi eteprīt yamotaréhímbar reitípa ãgua ichui yuvítreco aracahe. Ëgüe ehi aipo cananeo yuvítrecoi vahe rerecuar aipo oñemi vavasa sui cuña rëtave. Evocoiyase aipo co cuña omondoñomi aipo mbahe itoíhu, ahe aipo oñomiño sereco.

Ipare rumo aipo ahe cuña aveiño ité oyuca iqueseve cananeo rerecuar aracahe.

Ëgüe ehi aipo Débora iyavei aipo ambuae cuña oipítivíi israelita repí ãgua aracahe.

3. Gedeón, sundao 300 vahe rese (Jueces 6-7)

Ichui rumo aipo israelita yuvírecoi vahe sesarai iri Túpa sui yuvíreco. Ahese aipo yugüeru madianita eta, ahe aipo opa tupri mbahe semimonuha vírocua yuvíreco ichui. Iyavei aipo guaca víreco vahe avei opa vírocua yuvíreco ichui. Iyavei ambuae mbahe imbahe eta avei aipo opacatu reseve. Ëgüe ehi aipo israelita yuvírecoi vahe, ndovíroyai tiête Túpa yuvíreco aracahe.

Ipare aipo iparaſsu siete aravíter rupi yuvíreco. Ahese ramo aipo imahenduha iri Túpa rese yuvíreco.

Iyavei aipo oyerure iri Túpa upe yuvíreco no, ahese aipo Túpa aipo ehi Gedeón upe:

--Nde niha oromondo israelita repi áqua --ehi aipo Gedeón upe.

Ipare aipo ehi:

--Yipindar rumo eremombo ranera evocoí tupa rahanga angahu tēi Baal serer vahe renda --ehi--. Ipare aheve ité ereipovéhera mbahe mimbá cheu --ehi aipo Túpa chupe aracahe.

Evocoyase aipo acoi omombopase mbahe rahanga, ahese ahe tecua pendar omahe yuvíreco sese. Ichui aipo, "Yayuca" ehi Gedeón upe yuvíreco viña.

Iyesupa rumo aipo aipo ehiño:

--Co Baal tupa ité secoise, iyacatuño ité oyoepira, osárora ombahe reropovéhepri renda --ehi aipo chupe aracahe.

Evocoyase aipo Gedeón omonuha 32 mil sundao oico aracahe. Ipare aipo Túpa aipo ehi:

--Setá eteprí sundao --ehi.

Ichui rumo aipo ehi no:

--Acoi opacatu osiquiye vahe yuvireco, ahe toyevipa güetave yuvireco --ehi.

Evocoyase aipo 22 mil sundao opaño oyevi yuvireco. Ipare voi aipo Tupa osecoaha iri aracahe aipo ehi:

--Opacatu acoi oñenopicha vahe oihu água + iaiye yuvireco, ahe toyevipa güetave yuvireco --ehi--. Iyavei aipo ambuae acoi opuhaño vahe oihu omahemohasave yuvireco, ahe opacatu topitaño nde rupi --ehi.

Sese aipo 300 sundao güeraño opita yuvireco Gedeón rupi. Ahe aipo secoahasave Tupa égue ehi yuvireco chupe.

Yamotaréhsar rumo aipo setá iteanga yuvireco. Evocoyase aipo Gedeón aipo ehi osundao 300 vahe upe aracahe:



--Perasora ñepei-pe i peyacatu co tataendi --ehi aipo--. Cambuchimi pípe rumo perecora --ehi aipo osundao upe aracahe.

Iyavei aipo aipo ehi osundao eta upe:

--Co mimbi pereco co coti pe pove --ehi--.

Pitu mbiterve yañesirora co madianita quesa rese yayere tuprira --ehi aipo osundao eta upe.

Iyavei aipo ehi no:

--Acoi che amboycuase che rataendi iyavei acoi amoñehe ramoseve voi che remimbti, pe avei opacatu ēgue peyera che rupive --ehi aipo osundao upe aracahe.

Ēgue ehi aipo ahe pitu mbiterve, aviyeteramo tēi aipo omahepa yamotarēhīsar yuvireco mimbi renduse. Ahese aipo omahe tataendi rese yuvireco pitusave opacatu rupi sendise.

Evocoiyase aipo ahe ae-ae tēi oyeyuca yuvireco. Ahese aipo ndayavai oñemi pota vahe yuca água aracahe.

Ēgue ehi aipo 300 ava vīroya vahe Tūpa osecopit setá vahe oamotarēhīmbar yuvireco aracahe.

4. Sansón ipiratá vahe (Jueces 13-16)

Israelita yuvirecoi vahe aipo nomboaviyei Tūpa porocuaita yuvireco iyavei sesarai iriño Tūpa sui yuvireco aracahe. Sese aipo Tūpa noipitivit iri. Iyavei aipo opa omundo filisteo povritve imombaraísu uca água cuarenta araviter rupi.

Ipare aipo ñepei ari pípe Tūpa oyocuai güembiguai imondo cuña israelita upe aracahe. Evocoiyase Tūpa rembiguai aipo ehi co cuña upe ou:

--Cuña, oimera nde membrí ñepei --ehi chupe--.
 "Iyavei eresāro tuprīra no" ahe ndeu. Iyavei iha
 ndereyasīai chira; vino avei ndereīhu ucai chira
 chupe. Esepiá, ahe niha aviyera secoi Tūpa upé
 iyavei ipirata vahe secoira --ehi aipo chupe
 aracahe.

Iyavei aipo ehi chupe:

--Ahe niha secoira israelita repí ãgua filisteo
 sui --ehi aipo cuña upé aracahe.



Ipare aipo acoi ohase pítani cute, ahese aipo
 omondo sererguã Sansón. Sansón rumo aipo
 ocuacuase cute, ahese aipo Tūpa seseveño ité yepi.
 Iyavei aipo Sansón ipirata etepri vahe. Ahe aipo
 oyuca yagua píta opo pípe tēi aracahe.

Ipare rumo aipo omenda cuña filistea rese. Ahe
 cuña ndovíroyai vahe Tūpa aracahe. Iyavei aipo

ahe mendasa pieta pīpe oyapo aipo porandusa filisteo yuvīrecoi vahé upe. Yīpīndar aipo ndoicatui eté yuvīreco. Ipare rumo aipo sembireco sui oicua coiye pīhañemoñeta yuvīreco cute. Evocoiyase aipo Sansón omboasí güembireco upe. Sese aipo oseya güembireco aracahe.

Ipare rumo aipo oicuase güembireco menda ambuae mbīa rese, ahese aipo oipīstí 300 aguara, ahe suguai yacatu aipo opa omondo tata ombahemboasípave. Ahese aipo aguara yuvīnoña-noña cove pīpe rupi yuvīreco; filisteo eta remití opa tuprī osapí yuvīreco aracahe.

Evocoiyase aipo filisteo omboasí iteanga yuvīreco.

--Yaipīstí --ehi Sansón upe yuvīreco viña.

Aní rumo. Esepia, Tūpa omondo ipīrata catu áqua chupe yepi iyavei oipītīvīi etepri iyepepi áqua yepi no.

Iyavei aipo Sansón mil ava aipo oyuca oamotarēhīmbar guaricu rayīgürer pīpe tēi oyeepīsave aracahe. Ipare aipo oso Gaza ve. Aheve aipo cuña osepia, ahese opīta ipīri. Aheve osepiase aipo Sansón, omboya tecua roquenda guasu yuvīreco.

--Yaipīstí --ehi yuvīreco chupe viña.

Sansón rumo aipo pītu mbīterve oquenda guasu osapoho tuprīño seraso amombri ivītrī cotī imombo aracahe. Ahe ava ipīrata vahé secoi aracahe.

5. Sansón nimirata iri (Jueces 16)

Iyavei aipo Sansón ovavaño ité oico filisteo upe. Ahe rumo aipo osecaño vīte güembirecorā oico

oTūpa amotarēhīsar pāhu rupi aracahe. Ahese aipo cuña Dalila serer vahe rese oyemombota oico. Ahe cuña upe aipo filisteo aipo ehi yuvīreco:

--Ore oromondo atīra guarepochi ndeu --ehi--. Nde evocoiyase ereporandura Sansón upe: "¿Mbahe ité vo nde pīrata etepri, Sansón? ¿Mara hese vo co nde recopīra yuvīreco viña?" ere chupe --ehi yuvīreco.


Mbosapi yupagüer rumo aipo Sansón ombopa Dalila. Sese aipo opucaete-ete oñemi mopahuēhī co oamotarēhīsar rese yepi. Ipare rumo aipo oyevī iriño Dalila upe. Ahe evocoiyase oporandu-randuño ité ipīratasa rese oico chupe. Omañeco tēise rumo aipo Sansón ndoicatu iri cute. Ahese aipo ehi cuña upe:

--Che mo iporavopri Tūpa upe aporavīquī vaherā aico --ehi aipo--. Sese niha icua āgua che ha ipucu --ehi--. Acoi che ha asīase, ahese ndachepīrata iri chira --ehi aipo Sansón oyemombehu cuña upe aracahe.

Ipare voi aipo oque. Aheseve voi ahe cuña oyasīapa uca iha ichui. Ahe ramoseve avei aipo oichohopa uca yamotarēhīsar chupe. Ipare aipo Sansón omahese, oñemi pota voi aipo viña. Ndoicatu iri rumo aipo cute. Esepia, aipo Tūpa noipītīvī iri.

Evocoiyase aipo filisteo vīnose sesa yuvīreco ichui iyavei aipo trigo oichocho uca soquendasave yuvīreco chupe.

Ipare coiye rumo aipo ocuacua iri iha aracahe. Ahese aipo opacatu filisteo eta oyapo pieta guasu yuvīreco otūpa angahu tēi upe, ahe serer Dagón. Esepia, 'co niha yande pītīvī Sansón reittī āgua' ohesave yuvīreco viña. Sese aipo oyapo pieta guasu yuvīreco chupe.



Ipare aipo oichoho uca Sansón yuvireco chupe oñehe-ñehe tēi āgua. Sansón rumo aipo güesaehise oicūhagua-hagua tēi oī resendar corero guasu.

Aheve oyerure iri aipo Tūpa upe aracahe aipo ehi:
--Embou irimi tēi che pírata āgua ñepei reseve co filisteo upe mbahe apo āgua --ehi aipo Sansón Tūpa upe.

Evocoiyase aipo Tūpa oipitivīi corero guasu mope āgua opacatu oī guasu ava filisteo harive monduru āgua aracahe. Ēgue ehi aipo omano co ava acoi ipírata etepri vahecuer. Esepia aipo, ndoyemoviracuai güemimbotar tēi apoēhī āgua Sansón aracahe.

6. Rut

(Rut)

Iyavei aipo Sansón pare aracahe seta mbororecuar oime ava recocuer moingatu āgua. Iyavei aipo ahe aravíter pípe oime tíavor israelita recuave. Evocoiyase aipo ñepei mbía güembireco guahír reseve yuvíraso Moab recuave ihuprí reca aracahe. Aheve aipo opítia pucumi yuvíreco.

Ahe mbía aipo omano aheve. Ipare rumo aipo ñuvírío tahír opa ocuacua yuvíreco, ahese aipo ahe opa omenda yuvíreco ñuvírío cuña Moab pendar rese aracahe. Ñepei aipo cuña rer Orfa, ambuae aipo Rut. Ipare rumo tahír opaño avei omano yuvíreco.

Sese aipo ichí Noemí ndovíhai etepri oico aracahe. Evocoiyase aipo aipo ehi vovayar upe:

--Oime aipo tembihu ore recuave cute --ehi aipo--, sese ayevíra aheve --ehi--. Evocoiyase pe avei peyeví pe ru upe --ehi aipo vovayar upe aracahe.

Ahese aipo Orfa, Rut ndovíhai, oyasehó yuvíreco. Ipare rumo aipo Orfa oyeví güêtave oso. Rut rumo aipo opítia vovayar Noemí píri aipo ehi:

--"Eyeví" erei rene cheu --ehi--. Che asora nde sosave iyavei nde pítasave, aheve avei che apitara --ehi--. Nde mu, che murā; nde Túpa, che Túpa aveira --ehi aipo Rut aracahe.

Ipare aipo Noemí, Rut oyepota tecua Belén ve yuvíraso. Aheve Rut avíye etepri secocuer vovayar upe, oporavíquí etepri aipo tembihu rereco āgua ñuvírío upe nara. Égüe ehi tembihu avíye pípe aracahe. Iyavei aipo Rut ari yacatu cove rupi secoi yepi. Ahe aipo omonuha-nuhami tembihu ava iparaísu vahe upe seyapri aracahe.



Ahe oporavíquì ava mbahe yar cove, ahe serer aipo Booz. Co rumo aipo Noemí mu ité viña. Sovayar rumo aipo ndoicuai; "Che mu revo" ndehi chupe aracahe.

Evocoiyase aipo co ava mbahe yar, osepiase co cuñatai, aipo ehi chupe:

--Erecarura che cove ava oporavíquì vahe píri viña --ehi aipo chupe.

Iyavei aipo Booz oicuase secocuer, avíye etepri chupe. Ahese aipo oipota rai co cuña.

Mbahe tembihu monuha pare aipo omenda sese cute. Ahese aipo ovíharete Rut cute. Ipare aipo tahi yuvireco, ahe aipo tahi'r serer Obed. Sese aipo Noemí sorívete iyavei aipo osáro tupri güemiariro Obed.

Ahe Obed aipo mborerecuar David ramoi aracahe.

7. Samuel chihivahe agüer (1 Samuel 1-2)

Aracahe aipo oime ñepei cuña Ana serer vahe omembíehise ndovíhai oico.

Ipare rumo aipo ñepei arí pípe oso tūparo Jerusalén ve oyerure ãgua Tūpa upe aracahe aipo ehi:

--Che Yar Tūpa, emboumi ñepei che membírā --ehi--. Ahe niha amondora ndeu ndeundar mbahe rese hañeco ãgua --ehi aipo Tūpa upe aracahe.

Evocoiyase aipo judío pahi Elí, sepiase aipo ehi chupe:

--Tūpa omondora ndeu co nde porandusa --ehi aipo chupe aracahe.

Iparemi aipo imembí. Ohase, omondo sererguā Samuel yuvíreco.



Ipare aipo acoi opoise osi cā sui cute, ahese aipo tu, ichi vīraso tūparove yuvīreco. Aheve aipo Ana aipo ehi Elí upe cute:

--Ndo co chīhivahe rese acoi aporandu Tūpa upe cuese, ahe co aru ave Tūpa upendar mbahe rese hañeco āgua --ehi.

Ichui aipo Samuel opita Elí pīri ipītīvī āgua aracahe. Iyavei aipo tu, ichi avei aravīter yacatu yugüeru tūparove oyerure āgua yuvīreco yepi. Iyavei aipo ichi camisa ipīasu vahe güeru Samuel upe yepi no. Ēgue ehi aipo aracahe.

Ipare rumo aipo coiye imembī iri ichi.

Samuel chīhivahe rumo aipo avīye ai iyavei aipo oipītīvī etepri Elí aracahe.

Elí rahir rumo aipo ñuvīrío ocuacua vahe, ahe imondaño yuvīreco Tūpa upendar porerecosa rese. Iyavei aipo cuña vīroqueño tūparo pīpe yepi no, ēgue ehi aipo co ñuvīrío yuvīrecoi vahe Elí rahir aracahe.

8. Tūpa oñehe Samuel chīhivahe upe (1 Samuel 3)

Evocoiyase aipo Samuel ocuacua ramosē oico cute, ahe aipo Tūpa osaīsu etepri aracahe. Coiye aipo pītu pīpe Tūpa oñehe chupe, ahese aipo oso voi Elí rupa coti aipo ehi chupe:

--¿Mbahe vo ereipota? --ehi aipo chupe.

Esepia, "Elí revo oñehe cheu" ehi aipo aracahe viña.

Evocoiyase rumo aipo Elí aipo ehi chupe:

--Che ndaiptai mbahe --ehi--, iyavei ndañehei ndeu --ehiño chupe aracahe.

Ipare,

--Eso, tereque --ehiño chupe.

Ēgue ehi aipo co mbosapi oyupagüer rupi aracahe. Ahese aipo Elí aipo ehi chupe cute:

--Tūpa mo oñehe ndeu yepi --ehi--. Acoi oñehe irise ndeu, emboyeví chupe: "¿Mbahe vo?, che Yar. Che nde rembiguai aico; asendu nde ñehe" erera --ehi aipo Elí chupe aracahe.

Evocoiyase aipo Tūpa aipo ehi Samuel upe:

--Co Elí rahir yuvírecoi vahe mbahe tēi oyapo yuvíreco, nombohe tuprīse guahir iyavei noñehengataise chupe no secocuer mohivi āgua. Sese amondora ñemoírosa ipíratá vahe chupe, tahir upe avei --ehi aipo Tūpa.

Sese aipo Samuel ndovíhai etepri aracahe. Ahe rumo aipo omombehuño ité Tūpa ñehe Elí upe. Esepia, Tūpa ité niha aipo ehi Samuel upe aracahe.

9. **Samuel ipa vahe ava recocuer moingatusar**

(1 Samuel 4-7)

Ipare aipo Samuel ocuacuase oico aracahe, ahese aipo Tūpa setá yupagüer oñehe chupe yepi. Sese avei ahe oñehe opacatu ava upe oico aracahe. Evocoiyase ahe chupe, "Tūpa ñehe mombehusar" ehi ava yuvíreco. Iyavei, "Ava recocuer moingatusar" ehi avei yuvíreco no.

Ahese aipo filisteo osecopí iri israelita yuvíreco aracahe. Evocoiyase aipo israelita vīraso Tūpa porocuaita ríru vavasave ovava tuprī āgua oamotaréhísar upe yuvíreco aracahe viña.

Ahe vavasave rumo aipo Elí rahir yuvírecoi vahe iyavei setá ambuae yucapri yuvíreco .

Ipare aipo filisteo imonda Tūpa porocuaita rīru rese yuvīreco.

Evocoiyase aipo Elí oicuase aipo nungar, ovīapi güenda sui, aheve aipo omano aracahe.

Ipare aipo filisteo Tūpa porocuaita rīru omondo otūparove otūpa Dagón serer vahe rovai yuvīreco aracahe. Ahere ayihive rumo aipo añihiveive ovīapi mbahe rahanga oso Tūpa porocuaita rīru rovai. Ipare aipo omopuhaño yuvīreco. Ahere ayihive aipo añihiveive ovīapi iri oso no. Ahese aipo opē ñaca, iyīva avei no. Ēgüe ehi aipo aracahe. Ahese aipo filisteo osīquīye yuvīreco. Iyavei aipo ava setá omano ruru ai pīpe yuvīreco.

Ahese aipo filisteo omboyevī Tūpa porocuaita rīru yuvīreco israelita upe aracahe.

Iyavei aipo veinte aravīter rupi filisteo vīreco israelita opovrīve yuvīreco. Ahese aipo Samuel aipo ehi israelita upe cute:

--Peguata Tūpa rupi --ehi--. Pepoi co ambuae tūpa sui --ehi--. Acoi peyapose co nungar, Tūpa pe renosepara filisteo povrī sui --ehi aipo Samuel israelita upe aracahe.

Evocoiyase israelita omocañīt otūpa rahanga tēi Tūpa supi vahe rupi oguata āgua yuvīreco. Samuel oyeroquiño ité israelita rese yepi. Sese Tūpa iyeroquī renduse oipītīvī filisteo recopītā āgua.

**9. SAUL, DAVID IYAVEI SALOMON ISRAEL RERECUAR
YUVIRECOI**

**1. Saúl, mborerecuar guasu yipindar vahe
Israel ve
(1 Samuel 8-15)**

Samuel ocuacuase aracahe, ahese aipo ñuvirío guahír omondo ava recocuer moingatu água aracahe viña. Ahe rumo naporai yuvireco. Iyavei aipo guarepochi oipota rai yuvireco. Iyavei aipo oyeupe omboepi catu vahe upe oyapoño mbahe icatupri vahe yuvireco yepi. Égüe ehi ava aracahendar yuvirecoi vahe. Evocoiyase aipo ava rerecuar yuvirecoi vahe aipo ehi Samuel upe aracahe:

--Ore mo oroipota ñepei mborerecuar guasu inungar vireco ambuae ivi rupi yuvireco yepi --ehi aipo yuvireco chupe.

Ahe aipo Samuel upe naporai. Túpa rumo aipo aipo ehi Samuel upe:

--Che ité ava ndache potai güerecuarā yuvireco --ehi--. Sese oipota ambuae ava güerecuarā yuvireco --ehi aipo Samuel upe aracahe--. Evocoiyase emondo ñepei ava ahe serecuarā yuvireco. Ipare catu aipo ere ava upe no: "Pe rerecuar pe cuai píratara pe rerecuar" ere yuvireco chupe --ehi aipo Túpa Samuel upe aracahe.

Evocoiyase Samuel aipo omombehu ava rerecuar upe. Ahe ava rumo ndoyapísacai iñehe rese yuvireco.

Evocoiyase aipo Samuel omondo Saúl mborerecuarā aracahe. Saúl aipo mbia ipucu vahe, icatupri ai iyavei oicoeté vahe. Evocoiyase ava ovihareté

yuv̄treco sese aracahe viña. Iyavei aipo acoi yugüeruse yamotarēhisar chupe, ahe aipo opaño ité osecop̄ yepi. Yip̄indar mborerecuar chinise, aipo aviȳe etepri iyavei ndasecoasti, viroya avei aipo Tūpa oico aracahe.

Ipare coiye rumo aipo ndov̄troya pota iri Tūpa, sese ndaseco pōrai oico iyavei oyemboivate ai, ēgue ehi aipo aracahe.



Evocoiyase aipo Tūpa aipo ehi Samuel upe:

--Co Saúl ndaseco tupri oico --ehi--. Cūritei naporai cheu amondose mborerecuarā. Oguata güemimbotar rupi tēi oico. Sese che amosera imborerecuasa sui --ehi aipo aracahe.

Evocoiyase aipo Samuel aipo ehi Saúl upe:

--Co eremondo vahe nde porerecosa tata resendar Tūpa upe, ahe ndoip̄isti. Esepio, ndereroyai niha

eico. Sese nde mose Tūpa nde mborerecuasa sui --ehi chupe aracahe--. Sese avei ambuae ava oiporavo mborerecuar seco āqua. Esepiā, aipo ahe osaīsu Tūpa opacatu opīha pīpe oico --ehi Saúl upe aracahe.

Evocoiyase aipo Tūpa Espíritu oseyá ité Saúl. Ipare aipo Tūpa omondo espíritu naporai vahe chupe imañeco tēi āqua aracahe.

2. David ovesa rārosar secoi

(1 Samuel 16-17; Salmo 23)

Iyavei aipo David secoi tecua Belén ve aracahe. Ahe aipo ovesa rārosar secoi. Tu aipo Isaí, Rut suindar.

Ahe aipo arī yacatu seroguatasa rupi ovesa osāro tuprī sereco yepi. Ñepei arī rumo aipo yagua pīta oyemboya ou ovesa rese tahīr pīsī. Evocoiyase aipo David oña chupe, ocua sese. Ahese aipo yagua pīta opoi ovesami sui.

Oña voi aipo David upe viña. David rumo aipo oipīsī voi sayī rese. Ahe aipo ocua-ocua ivīra pīpe sese. Ahese aipo oyuca aracahe.

Ambuae arī pīpe aipo ēgüe ehi avei mbahe mīmba oñaro vahe upe aracahe no. David aipo ihonda serai vahe, omota tuprī vahe avei arpa.

Evocoiyase aipo mborerecuar Saúl acoi omañeco tēise espíritu naporai vahe, ahese aipo David oso omoñehe oarpa chupe. Evocoiyase aipo Saúl sesarai mbahe tēi sui yepi. Ēgüe ehi aipo David Saúl upe oico aracahe.

Iyavei aipo David Tūpa raīsusar ité yepi. Iyavei oñehe, osapucai Tūpa upe yepi. Ahese aipo aipo ehi aracahe:

--Tūpa che rārosar secoi iyavei nomopanei mbahe cheu. Ahe avei ombou che moviracua āgua. Iyavei ahe che reroguata, che rāro tupri avei iyavei ndasiquyei chira mbahe tēi sui. Esepiá, ahe niha secoi che rese yepi. Iyavei sētave aicora apirēhi vaherā --ehi aipo David aracahe.



**3. Tūpa David oiporavo mborerecuar seco āgua
(1 Samuel 16)**

Evocoiyase aipo ñepei arī aipo ehi Samuel upe Tūpa aracahe:

--Eso tecua Belén ve Isaí rētave --ehi aipo chupe--. Ñepei tahir mborerecuarā secoira --ehi aipo Samuel upe aracahe.

Evocoiyase aipo Samuel oso aheve. Aheve oyepotase aipo, osepia tahir cuacua catu vahe, ahese aipo ehi:

--Cora revo mborerecuarā --ehi aipo viña. Esepia aipo, ahe icatuprī ai aracahe.

Tūpa rumo aipo ehi:

--Ndahei co --ehi--. Esepia, ava niha osepia sova catuprigüer tēi yuvireco viña --ehi--. Che rumo asepia ava pīha --ehi aipo Samuel upe aracahe.

Sese aipo Tūpa oiporavo David chīhivahé catu vahe aracahe. Evocoiyase aipo Samuel oipiyere aceite ñacave. Ahe ēgüe ehi: "Co mborerecuarā" hé āgua. Ichuive ité aipo Tūpa Espíritu secoi David rese aracahe.

**4. David oyuca filisteo yeroyasa Goliát
serer vahe
(1 Samuel 17)**

Evocoiyase aipo filisteo yuvirecoi vahe aipo ovava iri israelita upe yuvireco aracahe. Ahese aipo mbosapī David rīquehīr cuacua catu vahe yuviraso sundaoguā yuvireco. David rumo aipo ndosoi, opitaño ovesa rāro āgua aracahe. Ipare

aipo ñepei ari omondo Isaí guahir David 'teresepia ñamarai pīha nde rīquehir yuvireco?' oyapave aracahe.

Oyepotase rumo aipo aheve, osepia opacatu sundao osāro yugüeru co coti ñivivate mahugüerve. Iyavei aipo filisteo sundao eta yugüeru co coti ñivivate mahugüerve avei no. Ahe aipo opacatu mbahe ovava áqua vireco yuvireco aracahe.

Evocoiyase aipo oime ñepei filisteo pāhuve ndiguayi catu vahe. Ahe aipo tenonde-nonde catu oguata ava israelita upe ovava áqua aracahe viña. Serer aipo Goliát. Iyavei aipo ipucú iteanga, seni aipo tres metros ñivateguer. Iyavei aipo oyemonde vahe turucuar guarepochi apoprí pipe.

Ipare aipo opivondi osapuca-pucai aipo ehi:

--Peiporavora ñepei ava che rese ovava vaherā --ehi catu-catu aipo aracahe.

Iyavei aipo omundo-mondo tēi oñehe imbosiquiye áqua iyavei aipo ehi no:

--Acoi ahe che yucase, evocoiyase co opacatu filisteo eta yuvirecoira pe rembiguairā --ehi aipo aracahe.

Ipare aipo ehi no:

--Acoi che ayucase rumo ahe, evocoiyase pe peicora opacatu ore rembiguairā --ehi aipo Goliát aracahe.

Ichui aipo ehi no:

--Pembou ru ñepei ava --ehi.

Aipo ihe renduse opacatu israelita oriri osiquiye pave yuvireco. Iyavei aipo opa yuvirnoña oyevi guaquicuei coti yuvireco ichui aracahe.

Ahese aipo David,

--¿Ava vo aipo vīroñro ava Tūpa rembiporavo yuvirecoi vahe? --ehi--. Che rumo ayucara --ehi.

Evocoiyase aipo mborerecuar Saúl aipo ehi chupe:

--¿Ereicatura vo? Esepio, nde chihivahe tēi ereico --ehi aipo chupe.

Evocoiyase aipo David omboyevi iñehe chupe:

--Cuesé niha ñepei yagua pita, ñepei mbahe nimba oñaro vahe avei yugüeru che ovesami hu ãgua yuvireco viña. Tupa che pitivisa pipe rumo ayucapaño. Evocoiyase Tupa avei che pitivira co ava ndiguayi vahe yuca ãgua --ehi aipo Saúl upe.



Ipare aipo osupi cinco ita, ahese aipo osē co ndiguayi vahe rovaichi oivira, ohonda resemi tēi.

Sepiase aipo, Goliát oñemoiró iteanga.
Osapuca-pucái aipo ehi:

--;Nde ivíra rese tēi ereyu cheu! ¿Cave tie
aico? ¡Che rumo oroyucara! --ehi aipo mbia
ndiguayi vahe chupe.

Ahe evocoiyase omboyevi iñehe chupe:

--Nde ereyu nde lanza rese iyavei nde quise
pucu rese no. Che rumo ayu Túpa seco pírata vaher
pípe. Ahe nde ereroiro-iro vahé yepi, sese
che oroyucara --ehi chupe--. Evocoiyase toicua
opacatu israelita rese Túpa reco yuvireco --ehi
aracahe.

Ichui aipo oña osē ndiguayi vahe upe, ahese
aipo oyapi ohondave ita pípe, isiva avíterve tupri
oyoho guasu seití imondo. Ahe peve omano. Ahese
aipo filisteo opa yuvinoña ichui.

Israelita rumo aipo supitísave opa oyuka
yuvireco. Ipare aipo David opita sundao rerecuar
páhu güeco áqua Saúl upe aracahe.

5. David Jonatán rese oyembori ai yuvireco (1 Samuel 18)

Mborerecuar Saúl aipo víreco ñepei guahír
aracahe. Ahe serer Jonatán. Ahe aipo David rese
oyembori ai vahe yuvireco.

Evocoiyase aipo ñepei arí pípe Jonatán omondo
oturucuar icatupri vahé, oquise pucu, ovírapar
avei David upe. Esepio aipo, osaísu ai eté, sese
ëgüe ehi chupe.

Iyavei aipo David omenda ñepei Saúl rayrit rese
aracahe.

6. Saúl ndoyambotai David (1 Samuel 18-20)

Evocoiyase aipo opacatu Israel recua pendar iyavei sundao eta aipo oipota rai eté David yuvireco aracahe. Iyavei aipo David oicoete ai vahe yepi. Aviye etepri avei secocuer.

Evocoiyase aipo Saúl ndoyambotai David ava rese güecatéhisa pipe. Esepio aipo, ava David eté oipota catu yuvireco. Evocoiyase aipo espíritu naporai vahe omañeco tēi iri. Ahese aipo David omoñehe oarpa chupe 'tasesarai mbahe sui' oya viña. Saúl rumo aipo oyuca potaño. Ahe arí pipe suive aipo, "Tayuca ité" ehi tēi chupe viña. Amove ombori angahu tēi.

Evocoiyase aipo ñuvirío yupagüer Jonatán oipitiví ñomi ãgua vu sui. David rembireco ēgüe ehi avei.



Ipare aipo oñemi-ñemiño ité oico ichui. Esepi aipo, Saúl oseca uca sundao rehī pípe yuca água viña.

Diez araviter rupi aipo secoi tēi caha pípe, mbahe cuarve, iyavei ava porēhīsa rupi. Ëgüe ehi aipo oñemi Saúl sui oico aracahe.

Ahese aipo Saúl sembireco omondo ambuae mbia upe. Ipare rumo aipo David omenda iriño ñuvirío cuña rese aracahe.

7. David pan sovasapí ohu aracahe (1 Samuel 21)

Ñepei arí pípe aipo David ondugüer rese oyepota yuviraso tūparo rese yangarecuar upe aracahe. Ahe serer aipo Ahimelec. Ahe chupe David aipo ehi:

--Emboumi pan tahu. Esepi, ndacheríepoi --ehi.

Evocoiyase Ahimelec aipo ehi chupe:

--Areco niha pan, sovasapíraño rumo --ehi aipo chupe.

Ahese aipo ehi Ahimelec upe:

--Avíyeño, embou ru cheu --ehi aipo chupe.

Evocoiyase ahe pan yuvirohu ondugüer rese yuvirereco. Ahe aipo tūparo rese yangarecuar güeraño ité yuvirohu vahe aracahe yepi.

8. David ndoyapoi eté mbahe Saúl upe (1 Samuel 24, 26)

Iyavei aipo David ondugüer reseve oñemi yuvirereco mbahecuar tuvichá vahe pípe aracahe. Aheve tupri avei aipo Saúl oque icuaéhīsave.



Evocoiyase aipo indugüer aipo ehi David upe
yuvireco:

--Tūpa mo co ombou nde amotarēhīsar 'toyuca'
oya ndeu --ehi aipo indugüer yuvireco chupe.

David rumo aipo ehiño:

--Aní. Esepia, evocoi niha ava Tūpa rese
yuvirecoi vahe rerecuar --ehiño--. Sese ndayapoi
chira mbahe chupe --ehi aipo.

Evocoiyase aipo aipo ehi:

--Iturucuar popi güeraño tēi ayasiamirā ichui
--ehiño aipo ondugüer upe.

Evocoiyase aipo Saúl omahese, opūha oso mbaecuar sui. Amombrí secose aipo David osapucai chupe aipo ehi:

--¿Mahera aipo nde, "Che yucara" ere cheu? Cheu rumo iyacatu guasu nde yuca água viña --ehi--. Ndayapo potai rumo mbahe ndeu. Esepiar, co nde turucuar popi ayasía vahe --ehi--. ¿Mahera che yuca pota eve? --ehi aipo Saúl upe.

Evocoiyase aipo Saúl ochí oyevi oso güêtave.

Ipare rumo aipo coiye Saúl osecaño vîte oico iyavei aipo ñuvirío yupagüer têi iyacatu guasu chupe Saúl yuca água viña. Ndoyapoiño rumo mbahe chupe. Iyavei aipo ahe setá araviter rupi oyerure Tûpa upe oico 'tache râro tupri' oya aracahe.

Evocoiyase acoi iyeruresa oime Salmo pîpe. Ahe ipipe yasepiara David yerure agüer yepi.

9. Saúl oso cuña ipaye vahe upe mbahe cua água (1 Samuel 28)

Ipare ava filisteo yuvirecoi vahe ovava iri israelita upe yuvireco aracahe. Ahese aipo Saúl osiquiye têi oico. Esepiar aipo, Samuel omano ichui. Iyavei aipo Saúl oñehese Tûpa upe, nomboyevi iri eté aipo iñehe chupe. Sese Saúl oseca cuña ipaye vahe. Ahe güeru Samuel espíritu chupe.

Evocoiyase aipo Saúl aipo ehi Samuel espíritu upe:

--Filisteo yugüeru ovava cheu --ehi--. Iyavei Tûpa noñehe iri cheu no --ehi--. ¿Mbahe pîha ayapora? --ehi aipo.

Evocoiyase aipo Samuel espíritu aipo ehi chupe:

--Tūpa opoi nde sui --ehi--. Esepiá, nde ndereroyai. Sese filisteo nde recopira yuvireco ayihive --ehi chupe--. Iyavei nde rahir omanora yuvireco --ehi--. Evocoiyase David-ra mborerecuarā --ehi aipo chupe aracahe.

10. Saúl iyavei tahir Jonatán mano agüer
(1 Samuel 31, 2 Samuel 1)

Evocoiyase aipo supi eté aracahe. Ahere ayihive aipo setá oyuca filisteo israelita yuvireco. Iyavei aipo Jonatán tivri reseve oyuca yuvireco. Saúl avei oñivo yuvireco.

Oyanduse aipo Saúl guahir mano, ahese aipo ovíapi oquise pucu rese ae omano.

Evocoiyase aipo David ndovihai eté sese yuvireco aracahe.

11. David mborerecuar secoi cute
(2 Samuel 2-9)

Ipare rumo aipo Saúl manore David israelita rerecuarā secoi aracahe. Ahe aipo oyapo ité mbahe Tūpa omombehu vahe chupe yepi, sese avei aipo Tūpa oipitiví etepri. Iyavei David sundao güecose oicoeté iteanga aracahe. Sese aipo ahe ité opa osecopi israelita amotarehimbár güecua ivirindar aracahe.

Iyavei aipo David recocuer avíye etepri. Evocoiyase aipo Saúl sundao rerecuar coiye ndovava iri David upe yuvireco. Sese aipo David coiye



iñero chupe. Ipare aipo oyemboripar yuvirecoi cute iyavei coye oseca Jonatán mu oicove vîte vahe ipitivî água. Ipare oyosu ñepei Jonatán rahir. Chupe aipo opa omundo tamoi mbahecuer aracahe. Iyavei oyopoi uca omu piri, yepe ahe ñuvirio ipi nomi vahe viña.

David mborerecuar avîye vahe ité, seco ñvi vahe avei aracahe.

12. David oyemboangaipa (2 Samuel 11-12)

Ñepei arî aipo David osepia cuña icatupri vahe aracahe. Ahe cuña aipo Uría rembireco. Ahe serer Betsabé. Chupe aipo David oñehe, ichui aipo oque ipiri.

Ipare aipo cuña imembî ramosé oico, ahese aipo David omundo imer Uría vavasave aracahe. Aheve

aipo cuña mer oyuca yamotarēhīsar yuvireco. Ahese aipo David omenda Betsabé rese cute, ēgüe ehi aipo aracahe.

13. David oporandu Tūpa upe ñerosa rese (2 Samuel 12; Salmo 51)

Ahese aipo Tūpa omboas† David upe. Sese aipo omundo oñehe mombehusar Natán chupe. Natán aipo aipo ehi David upe:

--Oime mo ñepei ava mbahe yar ahe setá ovesa vireco --ehi--. Iyavei oime ambuae ava ipara†su vahe, ahe ñepeíño ovesa vireco. Sese osa†su etepri viña. Coiye rumo ou ava ndahei vahe secua pendar, ahese mbahe yar ndoyuca potai güeimba ité ovesa tohu. Ipare rumo ipara†su vahe reimba tēi oyuca ichui co ava ou vahe tohu --ehi.

Evocoiyase aipo David omboas† etepri aracahe aipo ehi:

--Omanora ahe ava naporai vahe --ehi.

Evocoiyase aipo Natán omboyev† chupe aipo ehi:

--Nde ité rumo ēgüe ere --ehi--. Nde niha ereyuca uca Uriá sembireco rerocua āgua ichui --ehi--. Evocoiyase cüritei Tūpa amotarēhīsar yuvirecoi vahe oñehe tēi Tūpa rese yuvireco. Sese nde suindar ovavañora yuvireco yepi --ehi--. Iyavei ambuae cuimbahe oquera nde rembireco yuvirecoi vahe piri --ehi--. Iyavei acoi chihivahé ohase, omanoñora --ehi aipo chupe.

Evocoiyase aipo David oyaseho ité iyavei oyerure Tūpa upe opacatu op̄ha p̄ipe aipo ehi:

--Erocuaapa mbahe-mbahe tēi che recosa che sui --ehi--. Iyavei che moatiro che angaipa sui eve.

Che ayemboangaipa nde rovaque, embou catu che pīha catuprīsa cheu. Iyavei che mboyevī eve nde poropīsīrosa vīharetesa pīpe --ehi aipo David oyerure.

Ahese Tūpa osendu iyeruresa, sese aipo iñeroño chupe. Omundoño ité rumo aipo oporonupasa chupe Natán remimombehu rupi eté,

--Nde rahīr omanora --ehi acoi chupe, ahe supi eté aipo aracahe.

Omano Betsabé membrī. Ipare rumo aipo Betsabé imembī iri. Ahe serer Salomón. Ahe rumo aipo Tūpa rembiaīsu ité aracahe.



14. Nuvirio David rahir oyamotaréhi vu yuvireco
 (2 Samuel 15 - 1 Reyes 1)

David rahir aipo setá aracahe. Oime ñepei tahir icatupri catu vahe opacatu sui. Serer aipo Absolón.

Evocoiyase aipo David oipota rai guahir icatupri catu vahe. Ahe chupe aipo,
 --Cora mborerecuarā curi che manore --ehi viña.

Ipare rumo aipo tahir Absolón ipoyava ité mborerecuar güeco áqua. Sese aipo ombopa vu. Iyavei aipo ovava yuvireco chupe yamotaréhisave.

David rumo aipo ndovava potai tēi chupe. Ipare rumo ovavase yuvireco chupe coiye, ahese aipo David sundao osecopi yuvireco.

Evocoiyase aipo Absolón oñemi oso mburica cuña harive. Iha rumo aipo omombita ivira raca rese. Ahe aipo opita oyaseco oico. Coiye aipo sundao ou, ahe oyuca. David oyanduse rumo, oyasehó iteanga guahir Absolón rese.

David cuacuami etese cute, ambuae tahir opūha yamotaréhisave 'che ité taico mborerecuarguā' oyapave. David rumo aipo omoingue guahir Salomón mborerecuarguā.

Ipare aipo omano cute. Ëgüe ehi aipo David oico aracahe.

15. Salomón mborerecuar yaracuá vahe secoi
 (1 Reyes 3-4)

Evocoiyase aipo ñepei pītu pīpe aipo ehi Tūpa Salomón upe:

--Eporandu mbahe nde remimbotar rese cheu, ahe che amondora ndeu --ehi aipo Salomón upe aracahe.

Evocoiyase,

--Aviye --ehi Salomón chupe--. Che mombahecua ayase eve --ehi chupe--. Taicua tupri ayase opacatu mbahe aviye vahé apo āqua vichico --ehi aipo Salomón Tūpa upe aracahe.

Evocoiyase aipo Tūpa upe aviye etepri Salomón porandusa, sese aipo ehi chupe:

--Ereporandu tupri ité --ehi--. Che orombahecuara iyavei amondora setá mbahe ndeu --ehi--. Iyavei oromboyeroya ucara opacatu ava upe --ehi aipo chupe.



Evocoiyase aipo ñepei ari pípe ñuvirío cuña yugüeru Salomón upe. Ahese aipo ñepei aipo ehi:
 --Ore oroyu ñuvirío voi ñepei oí pípendar ndeu
 --ehi aipo chupe--. Iyavei oyoya tupri avei
 orovireco ore membrí --ehi aipo--. Co pítu pípe
 rumo omano co mbia membrí. Ahese co mbia
 osecuñaro omembrí omano vahe che membrí oicove
 vahe rese --ehi--. Che rumo aicuaño añihivei
 --ehi aipo cuña Salomón upe aracahe.

Evocoiyase aipo ambuae cuña aipo ehi:

--Aní, che membrí mo oicove vahe --ehi--.

Evocoiyase co mbia membrí mo omano --ehi aipo.

Ahese aipo aipo ehi:

--Pembovo ayase co pítani secove reseve quise
 pípe --ehi--. Ipare pemboyaho imondo yuvireco
 cuña upe --ehi aipo Salomón.

Evocoiyase ñepei cuña aipo ehi:

--Supi eté avíyera --ehiño aipo viña.

Ambuae cuña rumo aipo ehi:

--¡Aní! Peyucai rene --ehi aipo--. Pemondoño
 co mbia upe --ehiño aipo chupe.

Evocoiyase opitivisar upe aipo ehi:

--Peyucai rene --ehiño--. Acoi cuña ndoyuca
 uca potai vahe, ahe ichí --ehi--. Ahe chupe
 pemondoño --ehi aipo aracahe.

Evocoiyase aipo opacatu ava eta oicua yuvireco
 Salomón poromboaracuasa avíye vahe. Ndipoi eté
 ambuae imbahecua catu vahe ichui. Co
 iporomboaracuasa setá icuachiasa Proverbio pípe.

Iyavei aipo ahe mborerecuar mbahe yar catu no
 icuapri ité opacatu íví rupi. Iyavei aipo opacatu
 rupindar ava güeru mbahe oporerecosa yuvireco
 chupe. Yugüeru aipo iñehe rendu água, imbahe eta
 repia água avei aracahe.

16. Tūparo icatupri vahe oyapo Salomón (1 Reyes 5-10)

Evocoiyase aipo yipindar David oyapo pota tūparo Tūpa uve nara aracahe viña. Tūpa rumo aipo ehi chupe:



--Aní. Esepio, nde niha sundao ereico. Setá rupi erekava --ehiño aipo chupe--. Nde rahír Salomón rumo iyacatu oyapora --ehi aipo chupe--. Esepio, ahe ndovavai vaherā --ehi aipo Tūpa chupe.

Sese aipo Salomón oyapo tūparo tuvichá vahe Tūpa upe nara. Ahe tūparo ita iyavei iva avíye vahe apopri. Iyavei aipo ipípe yahopri tupri oro pipe. Ipípe avei aipo oime Tūpa porocuaita ríru. Iyavei aheve oime vera hí, pan sovasapri renda. Iyavei aipo ava setá iteanga yaposar. Evocoiyase aipo ahe omboavíye siete aravíter rupi tūparo yuvíreco.

Ahese aipo Salomón opa uca oichoho opacatu mborerecuareta iyavei ava cuacua yaracua vahe opacatu rupindar. Ahe aipo oporerecosa setá omondo Tūpa upe yuvíreco. Iyavei ahe pipeve avei Salomón oyerure Tūpa upe. Ahese aipo Tūpa omboapípo iva quíha nungar tūparo pipe aracahe. Ahe ipípe omboynecua Salomón rese ovíharetesa iyavei ava eta rese no.

Evocoiyase aipo Tūpa aipo ehi Salomón upe:

--Che asendu nde yeruresa --ehi chupe--. Nde che reroyase eve inungar David oyapo cheu yepi, ahese yuvírecoíño itera nde suindar mborerecuará --ehi aipo chupe.

Ipare aipo ehi chupe:

--Ambuae tūpa angahu tēi eremboyeroyase rumo, ahese che anosepara opacatu israelita co iva sui. Iyavei co tūparo aitípara --ehi aipo aracahe.

17. Salomón oyepepi Tūpa sui
 (1 Reyes 11)

Coiye rumo aipo mborerecuar Salomón osaſsu eteprí aipo cuña ndahei vahe omu yuvírecoi vahe. Ahe cuña aipo oyerure vahe yuvíreco ambuae tūpa angahu tēi upe aracahe. Iyavei aipo ogüeru Jerusalén ve, aheve aipo oyapo oí sētarā icatupri vahe yuvíreco. Oyapo avei tūparo imbahe rahanga rētaguā chupe. Iparemi tēi aipo ahe avei oyerure mbahe rahanga upe oico aracahe.

Evocoiyase aipo Tūpa ndovíhai sese, ahese aipo omboasí aipo ehi chupe:

--Nde ru David reco avíyesa rese tēi oimeño vítera nde rahír ñepei yahocuer israelita rerecuarā --ehi aipo chupe--. Iyavei rumo ambuae ava yahocuer rerecuarā oimeño itera --ehi aipo Tūpa Salomón upe aracahe.

18. Israel pendar oyemboyaho yuvíreco
 (1 Reyes 11-16)

Ipare aipo omanose Salomón cute, ahese aipo ava oyemboyaho ñuvírio rupi yuvíreco aracahe. Iyavei aipo oime ñepei Salomón rahír Roboám serer vahe. Ahe aipo Judá suindar upe mborerecuar iyavei aipo Benjamín suindar upe mborerecuar secoi, ahe ñuvírio ívì upe, "Judá" ehi yuvíreco.

Ipare rumo aipo coiye Roboám aipo oguata ambuae tūpa angahu tēi rupi oico ichui aipo Roboám rahír ndaseco pōrai vahe, ahe aipo mborerecuar aracahe.

Ipare coiye rumo aipo Roboám rumino Asa aipo mborerecuar Judá ve secoi. Ahe secocuer rumo aipo

avíye etepri mborerecuar güecose. Esepio, ahe niha aipo opa omocañi co mbahe rahanga tecua Judá pendar oime vahe. Ipare aipo ahe Túpa eté ombooyeroya oico.

Iyavei aipo Jeroboám imoñuviriossa yahocuer ambuae israelita mu rerecuar. Jeroboám niha aipo ndaseco pōrai vahe. Ahe aipo oyapo ñuvirío guaca rahir rahanga oro.

Evocoiyase aipo ehi ava eta upe:

--Co pe tūpa --ehi--. Sese ndapesoi chira Salomón tūparove pe yerure água Túpa upe --ehi aipo ava eta upe.

Evocoiyase aipo Jeroboám pare ambuae ava cinco yuvirecoi vahe mborerecuar, ahe aipo ndaseco pōrai vahe pāve yuvirecoi.

Ipare coiye aipo ambuae ou no, ahe serer Acab, ahe naporai catu opacatu ambuae mborerecuar sui. Iyavei ahe omenda cuña ndaseco pōrai vahe rese, ahe serer Jezabel. Iyavei aipo oyapo tūparo co mbahe rahanga Baal upe nara, aheve oyerure chupe yuvireco. Iyavei aipo oime 450 iñehe mombehusar oguata vahe secocuer rupi yuvireco.



Evocoiyase aipo cuña Jezabel opa seni oyuca Tūpa ñehe mombehusar supi eté vahe aracahe. Ahese Elía güeraño tupri ndoyucai. Ëgüe ehi aipo cuña Jezabel aracahe.

10. TŪPA ÑEHE MOMBEHUSAR ELIA IYAVEI ELISEO RECOCUER

1. Mbosapí aravíter yemombítesa rupi omombita Tūpa amar (1 Reyes 17)

Elía aipo Tūpa ñehe mombehusar secoi aracahe. Ñepei ari pípe aipo ou mborerecuár Acab upe aipo ehi:

--Tūpa rer pípe aipo ahe ndeu: Cohave ndoquí chira acci che amombehuse voi --ehi aipo chupe aracahe.

Ichui aipo Elía oso oñemi tembi Quelit cotí oico. Aheve aipo añihivei, caharuse avei vîrai vîraso pan mbahe roho reseve itohu yepi. Iyavei aipo ahe tembi sui oihu †.

Ahese aipo mborerecuár Acáb oseca uca opacatu tecua rupi, tecua poréhisa rupi iyavei ambuae ava-ava têi recua rupi aracahe. Ndoysui eté rumo yuvireco. Oyuca pota aipo yuvireco viña. Esepia aipo, ndoquí eté. Sese aipo, "Yayuca" ehi yuvireco chupe. Esepia, ahe niha omombehu, "Ndoquí chira" ehi.

Ipare aipo coiye tembi ipiru cute, ahese aipo Tūpa aipo ehi Elía upe:

--Eso tecua Sarepta ve. Aheve oime ñepei imer mano vahe cuña. Ahe omondora mbahe terehu --ehi aipo chupe.

Ichui aipo Elía oso oñehe ahe cuña upe.
Evocoiyase aipo cuña aipo ehi chupe:

--Chīhimi tēi mo areco trigo cuhi. Ipare co opami tēise orohu, ahese che, che membrí opara t̄eporēhī ore yuca --ehi.

Evocoiyase aipo Elía aipo ehiño chupe:
--Eres̄quyei rene; embouño mbahe tahu, co trigo cuhi ndopai chira iyavei aceite acoi Tūpa ombose voi amar --ehi aipo chupe aracahe.

Evocoiyase aipo Elía ahe peve opituhi oico.
Aheve aipo nipanei mbahe semihura yuvireco.

Nepei art rumo aipo cuña membrí imbaheast.
Ichui omano. Ahese Elía oyerure Tūpa upe. Tūpa evocoiyase ombocuerayevi iri chīhivahe aracahe.



**2. Elía iyavei Baal recocuer mombehusar
(1 Reyes 18)**

Ipare aipo mbosapi araviter yemombitesa pare Tūpa aipo ehi Elía upe:

--Eso, teresepia Acab --ehi chupe--. Esepiá, amondora amar opacatu ivi rupi cute --ehi--.

Iyavei ihusei, ndasíepoi avei yuvíreco --ehi aipo.

Evocoiyase aipo Elía oso mborerecuár Acab reca. Acab aipo osepia ramoseve Elía aipo ehi voi chupe:

--Nde eremañeco tēi yande mu eico --ehi aipo chupe.

Elía rumo aipo omboyevi chupe:

--Nde sui niha mbahe tēi oime. Esepiá, nde niha erepoi Tūpa eté sui Baal mboyeroya água --ehi.

--Emondopa opacatu israelita ivitri Carmelo ve. Iyavei 450 Baal recocuer mombehusar yuvírecoi vahe --ehi.

Evocoiyase acoi oyepotase yuvíraso co ivitrive, ahese aipo Elía aipo ehi yuvíreco chupe cute:

--¿Marase rutei vo peseyara pe piháñemoñeta raisa? Tūpa supi eté vahe Tūpa secoise, ahese supi peguata --ehi--. Acoi Baal supi eté vahe tūpa secoise, supiño ayase peguata no --ehi aipo ava eta upe aracahe.

Ipare aipo ehi iri:

--Che año tupri aico Tūpa ñehe mombehusar --ehi--. Baal rumo vireco 450 güecocuer mombehusar, ahe togüeru ñuvirio tivi yuvíreco --ehi aipo--. Ñepei chupe nara yuvíreco, ambuae cheu nara. Ahe ñepei tivi toyuca oporereco água yuvíreco --ehi aipo--. Tomondo eme catu tata

yuvireco sese --ehi--. Che avei niha amondora che tivi Tupa upendar mbahe seropovéhepri renda harive sapi agua --ehi aipo ava eta upe--. Indó, toyerure Baal upe yuvireco cute --ehi--, evocoiyase che ayerurera Tupa upe --ehi--. Acoi Tupa supi eté vahe, ahe omboura tata co porerecosa rapi agua --ehi.

Evocoiyase aipo opacatu ava eta aipo ehi yuvireco:

--Aviye ité iñehe --ehi yuvireco.

Evocoiyase yipindar aipo Baal upe tēi rane oyerure secocuer mombehusar yuvireco añihivei suive tēi. Ndoyapoi rumo aipo mbahe yuvireco chupe. Esephia, ndosendui vahe mbahe.

Evocoiyase aipo Elia seroyaéhisa pipe aipo ehi Baal recocuer mombehusareta upe:

--Pesapucai pírata catu chupe --ehi aipo--.

Aviyeteramo pe tupa oñemoñeta vite yuvireco, anise oporaviqui vite no, oque vite no. Sese pemomahe --ehi aipo Baal recocuer mombehusar yuvirecoi vahe upe aracahe.

Aipo ihese, osapucai pírataño ité iyavei yuviroopo-ropo tēi aipo seropovéhepri renda ivi. Iyavei oñequichi-quichi tēi quisemi pipe yuvireco. Sese aipo suvi-suvi yuvireco. Ëgüe ehi vahe ité secocuer yuvireco yepi.

Ipare rumo aipo ndosendui eté iyavei nomboyevi eté iyeruresa itupa yuvireco chupe.

Caharuse aipo Elia aipo ehi:

--Che no --ehi--. Peyemboya opacatu cohabe coti --ehi--. Peru irungatu cambuchi i --ehi--. Peipiyyere i mbosapi yupagüer tivi roho rese --ehi aipo.

Evocoiyase opa omoaqi tivi roho, yepeha, mbahe seropovēhepri renda avei iyavei tembi yivindar savapi po avei aipo.

Ipare aipo Elia oñehe Tūpa upe cute aipo ehi:
--Che Yar, nde niha Tūpa Abraham, Isaac upe iyavei Israel upe. Emboyevi che ñehe cheu --ehi--. Ipīpe sui tande cua co ava opacatu yuvireco Tūpa eté nde recose --ehi aipo Elia oyerure Tūpa upe aracahe.

Evocoiyase cūriteimi Tūpa ombou tata i va sui chupe. Ahese aipo ocai tivi roho, yepeha, mbahe reropovēhepri renda ivi cuhi reseve. Iyavei aipo i opa tupri omombiru.


Ahese aipo ava eta ndoyembovihai yuvireco aipo ehi:

--;Co yande Yar Tūpa supi eté vahe! --ehi aipo yuvireco.

Evocoiyase aipo Elia opacatu ava eta reseve opa oyuca Baal recocuer mombehusareta yuvireco. Ichui aipo Elia aipo ehi mborerecuár Acab upe no:

--Pihaiivi oquira --ehi.

Ihe pare voi aipo oqui aracahe.



3. Elía ñemi agüer (1 Reyes 19)

Evocoiyase aipo mborerecuar Acab rembireco Jezabel oyanduse Elía rembiapo mbahe, ahese aipo omboasí iteanga. Sese aipo ahe cuña omondo oñeho Elía upe aipo ehi:

--Ayihive co hora pípe tuprì nde avei eremanora --ehi aipo chupe aracahe.

Evocoiyase aipo co ava acoi ndosíquìyei vahe ava 450 Baal recocuer mombehusar sui yipindar, coiye rumo cuña sui osíquìye.

Sese aipo oñemi oso ivití iporupiréhisa rupi. Aheve iviravríve oguapíse ipihañemoñeta oí:

--Tamanoño --ehi aipo.

Ahese aipo Túpa upe iparaísu. Sese aipo omondo güembiguai, "Eraso mimoi i reseve tohu" ehi aipo chupe.

Ahese aipo ocaru cute. Ipare aipo oso amombri ivitri Herob ve mbahecuarve oñemi oico.

Aheve aipo Túpa oporandu chupe:

--¿Mbahe vo ereyapo ave eico? --ehi aipo chupe.

Evocoiyase aipo omboyevi iñehe Túpa upe:

--Che año tuprì areco che reco avìye vahe ndeu nara --ehi aipo Túpa upe--. Ipare ndipo iri ambuae --ehi--. Iyavei che yuca pota yuvireco --ehi Túpa upe.

Evocoiyase aipo Túpa omboyecua güeco píratasa chupe, ombou ivitu ipírata vahe chupe. Iyavei aipo omborirí i vitri, tata avei ombou. Ahese ramo aipo Túpa oñeho mbegüe chupe aipo ehi:

--Ambuaera israelita rerecuará --ehi aipo chupe aracahe--. Evocoiyase Eliseo che ñehe mombehu ãguará nde sore --ehi aipo chupe--. Iyavei acoi

ava eta oñenopīha vahe Baal rovai, ahe opara omano yuvireco --ehi aipo.

--Iyavei oime 7000 ava noñenopīhai vahe Baal rovai yuvireco. Evocoiyase ndahei nde año che reroyasar ereico --ehi aipo Elía upe Tūpa.

Aipo oyeupe he pare, oyevi Elía tivit iporupirēhīsa rupi sui ou. Ahese osovaichi Eliseo. Eliseo aipo oporavīquī tivit monguhi tīvi pīpe oico. Aheve aipo Elía omondo oyeosa Eliseo harīve 'che recuñara ereicora' oyapave.

Ichuive tuprit aipo oguata supi aracahe.

4. Acab oipota rai Nabot uva tī (1 Reyes 21)

Evocoiyase aipo mborerecuar Acab mbahe yar iteanga aracahe. Vireco atī aipo mbahe. Ñepei ari rumo aipo osepia Nabot uva tī icatuprit ai vahe. Evocoiyase aipo oipota rai eté. Sese aipo oso Nabot upe aipo ehi:

--Embovende nde uva tī cheu --ehi aipo chupe.

Nabot rumo aipo ehiño chupe:

--Aní, ndaipotai imbovende āgua. Esepia, co uva tī che ru ombou cheu --ehiño aipo chupe aracahe.

Evocoiyase aipo Acab oyevise güêtave oso, ndovīhai, omboasī aipo iyavei ndocaru potai.

Evocoiyase aipo sembireco Jezabel aipo ehi chupe:

--¿Mahera vo nderevīhai? --ehi--. Che niha amondora evocoi uva tī ndeu --ehi aipo Jezabel chupe.

Evocoiyase aipo sembireco omondo cuachiar Nabot recua pendar rerecuareta upe aipo ehi:

--Peseca ava Nabol rese semira tēi āgua; semira tēisa pīpe peyuca --ehi aipo.

Ipare aipo sembireco aipo ehi chupe:

--Eso uva tīve. Ahe nde mbahe cute. Esepiā, omano niha Nabol --ehi aipo chupe.

Ipare aipo Acab oguata vīteseve aipo uva tī pīpe oico, ahese aipo Tūpa ñehe mombehusar Elía oyemboya oso sese, aipo ehi chupe:

--Nde ereporoyuca iyavei ndemonda, sese eremano pīhaivira nde --ehi aipo chupe--. Iyavei Jezabel omocañīra Tūpa opacatu imu eta cuimbahe reseve --ehi aipo chupe.

Ipare aipo Acab oso ovava Sirio yuvīrecoi vahe upe. Aheve aipo Sirio oyuca Acab yuvīreco cute. Aheseve avei aipo Jezabel oiti metana ivate vahe sui yuca yuvīreco aracahe.



5. Elía oso ūvave, nomanoi eté (2 Reyes 2)

Ñepei arī pípe aipo Elía, Eliseo reseve yuviraso tecua Betél ve aracahe. Yipindar rumo aipo Elía aipo ehi:

--Epita cohaye. Esepio, che Yar che cuai Betél ve che so āqua --ehi aipo Eliseo upe.

Eliseo rumo aipo ndopita potai eté ichui. Betél ve aipo oime ava aipo ehi vahe Eliseo upe yuvireco:

--¿Ereicua vo nde: co pípe aipo Tūpa vīrasora nde mbohesar Elía nde sui? Evocoiyase nderesepia iri chira --ehi aipo Eliseo upe yuvireco.

Ahese Eliseo omboyevi aipo ehi:

--Taa, aicua --ehiño chupe.

Iyavei aipo yuvirasose tecua Jericó ve, aipo ehi tupri avei yuvireco chupe.

Evocoiyase aipo co ñuvirío yuvirasoño oyepota ūai Jordán popive yuvireco. Aheve aipo Elía ocuase oyeosa pípe i rese, ahese aipo cūritei opa i oipepi. Supi aipo osasa yuviraso ūai Jordán rovai.

Aheve aipo Eliseo upe aipo ehi:

--¿Mbahe ereipota che ayapora ndeu? --ehi--. Esepio, Tūpa che reraso voira --ehi aipo Eliseo upe.

Evocoiyase Eliseo omboyevi iñehe chupe aipo ehi:

--Che aipota espíritu inungar nde erereco vahe, ipirata catu vahe rumo --ehi aipo Eliseo chupe.

Ahese Eliseo upe aipo ehi:

--Too, yavai etepri mo aipo nde porandusa cheu --ehi aipo.



Ipare aipo ehi:

--Che repiase eve acoi che rerasose cohave sui
yuvíreco, ahese ēgüe ehi etera ndeu --ehi aipo
Eliseo upe.

Ipare rumo aipo acoi oñemoñeta viteseve aipo
yuvíraso perí rupi. Ahese aipo cäreto, cavayu
tata resevendar ogüeyí iva sui ou omboyepepi Elía
Eliseo sui aracahe.

Ahese Elía oyeupi ivitú ipíratá vahe pípe oso ivave. Evocoiyase aipo Eliseo osepia tupri ité Elía iyeupise oso ivave güecove reseve aracahe.

Elía yeaosa aipo ovíapi ichui, ahe Eliseo osupi. Ipare aipo oyevi iai Jordán ve. Aheve aipo ocua iri i rese Elía yeaosagüer pípe. Ahese aipo Túpa opa iri oipepi i ichui. Ipare aipo Túpa ñehe mombehusar Jericó pendar sepiase, aipo ehi yuvireco chupe:

--Ore toroseca Elía ivitri rupi --ehi aipo.

Evocoiyase aipo mbosapí arí rupi ivitri rupi oseca tēi yuvireco. Ndoyosui rumo aipo yuvireco. Esepia aipo, Túpa viraso ivave aracahe.

6. **Eliseo oyapo poromondisa**

(2 Reyes 2-4)

Evocoiyase aipo Eliseo setá mbahe poromondisa oyapo oico Túpa reco píratasa pípe aracahe. Ipare aipo Eliseo oyevi Jericó ve oso. Ahe tecuave aipo i naporai. Evocoiyase aipo Eliseo omoëhe ahe i Túpa píratasa pípe.

Iyavei aipo oipitiví avei israelita ava Moab yuvirecoi vahe recopipa uca áqua aracahe.

Ipare aipo ñepei arí pípe Eliseo upe ou cuña imer mano vahecuer aipo ehi:

--Che mer omano --ehi aipo--. Ahe niha ereicua vahe Túpa rese secose --ehi aipo--. Ahe imanore ava chupe ore reve vahe ou guarepochi rese oporandu --ehi--. Sese co che membrí ñuvirío yuvirecoi vahe viraso pota güembiguairá --ehi aipo--. Esepia, ndoroicatui niha ore revesa mboyevi chupe --ehi aipo cuña chupe.



Evocoiyase aipo cuña upe aipo ehi:

--¿Mbahe vo che ayapora ndeu? --ehi aipo chupe--. Eso, eporandu opacatu nde cotindar i ríru tuvichá vahe rese, ndovírecoi vahe mbahe ipípe iporu raimi tēi água --ehi--. Ahe emboapípopa tupri aceite erereco viitemi vahe pípe --ehi.

--Ipare eraso imbovende --ehi aipo chupe--. Ipípe eremboepípara nde revesa --ehi--. Ipare sumbírer pípe erocua mbahe pe remihura --ehi aipo cuña upe.

Ahe iñehe rupi tupri aipo oyapo cuña imer mano vahecuer. Evocoiyase aipo ndovírasoi ahe ava imembrí yuvíreco.

Ambuae tecuave aipo oyapo uca ava güembireco reseve Eliseo que āgua güēta harīve yuvīreco. Iyavei aipo ahe cuña nimembītī vahe; ahe rumo aipo imembītī pota tēi oico.

Evocoiyase aipo Eliseo aipo ehi chupe:

--Co aravīter ndemembīra --ehi aipo chupe.

Evocoiyase ahe cuña aipo ehi:

--Erembopai rene catu nde rese hañecosar --ehi aipo.

Iparemi tēi aipo oime imembrī cute, ahese aipo cuña oviharete omembrī rese. Ichui rumo aipo movīro aravīter pare chīhivahemi omano.

Evocoiyase aipo cuña oña oso ambuae tecuave Eliseo upe imombehu. Oyepotase aipooyerure Tūpa upe.

Ahese Tūpa ombogüerayevī iri chīhivahe. Sese aipo tu oyemboviharete yuvīreco ichītī reseve. Ēgue ehi aipo aracahe.

7. Naamán lepra sui imbogüerasa

(2 Reyes 5)

Iyavei aipo iñītī Siria ve secoi ñepei cuimbahe, ahe serer Naamán. Ahe aipo sundao eta rerecuar aracahe.

Ipare rumo aipo Naamán imbaheasītī lepra pīpe. Ahe aipo mbaherasīsa ndavīyei vahe. Naamán rembireco aipo vīreco ñepei güemimboacua cuñatai israelita. Ahe aipo oicua vahe Tūpa iyavei oicua avei aipo iñehe mombehusar Eliseo. Ñepei arī pīpe aipo ahe cuñatai aipo ehi Naamán rembireco upe:

--Osora co nde mer che recuave viña --ehi aipo--. Aheve oime Tūpa ñehe mombehusar, ahe oiposanora viña --ehi aipo Naamán rembireco upe.

Evocoiyase aipo osenduse, Naamán opacatu mbahe
vîraso oporerecosa Eliseo upe.

Oyepotase aipo Eliseo upe, ahese Eliseo aipo
ehi chupe:

--Eso ūai Jordán ve. Aheve ecui ūpive siete
yupagüer --ehi aipo chupe.

Evocoiyase aipo osenduse, omboas ū ai aipo ehi:

--¿Mahera che mundo pota aheve? --ehiño aipo--.
Che recuave niha oime avei ūai avive catu vahe
ichui --ehiño aipo.

Ipare rumo aipo sembiguai aipo ehi yuvireco
chupe:

--Eresoño itera viña --ehi aipo yuvireco.

Ipare coiye aipo oyemongueréh ū oso água, ahese
aipo siete yupagüer ocui ūpive. Ipipe aipo
ocuera.

Ipare aipo ovihareté oyevi oso Eliseo rêtave.
Ahese aipo ehi:

--Cûritei rumo che aicua israelita Tûpa supi
eté vahe Tûpa --ehi aipo--. Chupe nara che
aporaviquira --ehi aipo--. Iyavei co che areco
che porerecosa ndeu nara --ehi aipo Eliseo upe.

Eliseo rumo aipo ndoipissi potai iporerecosa.
Ichui aipo Naamán oyevi güetave oso.

Ipare aipo Eliseo remimboacula oipota Naamán
porerecosa. Sese aipo osupiti Naamán peri rupi
oso. Supitisave aipo ehi Naamán upe:

--Che rerecuar aipo ehi: "Tomboupa oporerecosa
cheu" ehi ndeu --ehi aipo chupe.

Evocoiyase aipo Naamán opaño voi omondo
porerecosa chupe.

Ahe aipo oyevi Eliseo rêtave oso. Ahese aipo
Eliseo oporandu chupe:

--¿Que vo ereso? --ehi aipo chupe.

Evocoiyase aipo omboyev† aipo ehi:

--¡Aní! Ndasoi que --ehiño aipo Eliseo upe.

Evocoiyase aipo Eliseo aipo ehi chupe:

--¿Mahera nderemira cheu? --ehi--. Che aicua mbahe nde rembiapo --ehi Eliseo chupe--. Nde ñemisa pîpe ereso mbahe porerecosa reca --ehi aipo--. Sese Naamán mbaherasís ovara nde rese --ehi aipo chupe.

Evocoiyase aipo Eliseo ñehe rupi tupr† ova co mbaherasís semimboacua rese aracahe.

8. Túpa ombosiquye Israel amotarehísar Siria pendar yuvírecoi vahe (2 Reyes 6-7)

Ñepei ar† pîpe aipo Siria igañuar yugüeru ovava Israel upe aracahe. Ahese aipo Eliseo ombohe tupr† Israel rerecuar iyoep† ãqua yuvíreco Siria igañuar rerecuar sui. Sese aipo serecuar oyuca pota Eliseo viña. Ahese aipo omundo sundao rehí tecua ivi ipis† ãqua yuvíreco.

Ichui aipo Eliseo rembiguai osiquiyé iteanga. Ahese aipo ehi güembiguai upe:

--Eresiquiyeyi rene. Esepia, yande pîtivisiar setá catu yande amotarehímbar sui --ehi.

Aheseve voi aipo sembiguai osepia opacatu ivitri rupi cäreto, cavayu tata reseve aracahe. Ahese aipo oicua Túpa guärrosa cute.

Ipare aipo Siria igañuar omañeco têi vîteño israelita yuvíreco. Evocoiyase aipo ñepei pîtu Túpa oyapo mbahe siapu vahe 'tosendu yuvíreco' oya Siria igañuar upe.

Evocoiyase aipo ahe ipîhañemoñeta yuvíreco aipo ehi:

--Yugüeru rutei catu yande amotarẽhimbár sundao ambuae tecua sui ovava vaherã yandeu --ehi aipo yuviréco viña.

Evocoiyase oyembosiquye guasu yuviréco. Sese aipo opa iri oyevi güecuave yuviraso. Iyavei aipo opa tupri omabahe oseya yuviraso opoyavasa pípe. Ahese aipo israelita opa tupri imbahe secosé vahé oipisí yuviréco aracahe.

9. Jonás oñemi Túpa sui viña (Jonás 1, 2)


Iyavei aipo oime ambuae ivi tuvichá vahé, ahe serer Asiria aracahe. Evocoiyase aipo ñepei arí pípe Túpa aipo ehi Jonás upe:

--Eso tecua Nínive ve, Asiria recua ivate catu vaheve --ehi chupe--. Aheve aipo ere ava upe: "Túpa opara pe mocañi. Esepia, pe ndape reco pôrai" ere ava upe --ehi aipo chupe viña.

Jonás rumo aipo ndoso potai aheve. Sese osoño carite yemboyasave, omboepi ambuae tecuave tēi oso água. Evocoiyase aipo opase yuviroha ipípe cute, ahese aipo Jonás oique oque águave. Aheve oque ou.

Ahese Túpa ombou ivitu ipírata vahé para guasu pípe. Ahe aipo osupi-supi carite guasu, seni-seni aipo omboyere.

Ahese aipo ipípe oporaviqui vahé osiquiyé iteanga, oyerure píratá avei ñepei-pei otúpa upe yuviréco.



Evocoiyase aipo oyemboya yuviraso Jonás upe aipo ehi:

--Nde oque tēi vahe, eñarapuha nde quesa sui --ehi aipo chupe--. Eyerure avei nde Tūpa upe. Aviyeteramo ahe yande písirora yande cañiēhī ãgua --ehi aipo Jonás upe yuvireco.

Ipare aipo oyapo suerte yuvireco icua ãgua 'uma sui oime co mbahe tēi yandeu' oya. Ahese oicua Jonás sui eté. Sese oporandu Jonás upe yuvireco:

--¿Ava vo nde? ¿Que sui vo ereyu? ¿Mbahe vo ereyapo? --ehi aipo yuvireco chupe.

Evocoiyase Jonás omboyeví chupe:

--Che Hebreo aico, aroya co ̄vī iyavei para guasu aposar Tūpa --ehi aipo--. Ahe che mondo pota tecua Nínive ve viña. Che rumo ndaso potai,

añemi tēi che Tūpa sui. Sese co ombou ivoitai ai yandeu --ehi aipo--. Che mombo peye para guasu pīpe --ehi--. Ahese opituhura co ivoitai ai --ehi aipo Jonás.

Carite pīpe oporaviqui vahe rumo aipo ndomombo potai yuvireco viña. Ipare rumo aipo aipo ehi yuvireco:

--Aviye ayase --ehi.

Ahese aipo vīnose, omombo para guasu pīpe yuvireco. Ipare voi aipo ivoitai ai opituhu, ahese ramo aipo oicua Jonás Tūpa supi eté vahe yuvireco.

Tūpa rumo aipo omoingatu pira guasu imoco āqua. Evocoiyase aipo mbosapi arī, pītu reseve iparaīsu pira guasu rīe pīpe oico. Ahese oyeruré Tūpa upe cute. Ichui aipo Tūpa omondo pira guasu igüēhe āqua ivoitai atasave aracahe.

10. Jonás ombooyeroya Tūpa cute (Jonás 3)

Ipare aipo Tūpa aipo ehi iri Jonás upe:

--Eso tecua Níneve ve, teremombehu acoi amombehu vahe ndeu --ehi chupe.

Evocoiyase oso Nínive ve, aheve omombehu Tūpa Nehengagüer.

Evocoiyase ava Nínive pendar osenduse, setá viroya yuvireco. Ahese aipo mborerecuar ité oporocuai aipo ehi:

--Tipo eme ocaru vahe iyavei oīhu vahe no --ehi aipo--, iyavei tomonde turucuar vīharēhīsa resendar opacatu yuvireco; ava cuacula, chīhivahe avei --ehi aipo--. Iyavei peyerure Tūpa upe opacatu pe pīha pīpe; ndahei chira pe reco rai pīpe --ehi.

Ahese aipo Tūpa osepia oangaipa mboas̄ise yuv̄ireco. Sese aipo ndomocañ̄ipaiño aracahe.

Evocoiyase aipo Jonás omboas̄i ava upe Tūpa ñeroisa.

Ipare aipo oñemoiro catu opase aipo iñemohasa caha ipiru ichui. Sese Jonás,

--Che tamano --ehiño.

Ahese aipo Tūpa oporandu chupe:

--¿Mahera vo nanderor̄i etepri? --ehi aipo chupe--. Iparāsu co caha tēi ipiruse ndeu. ¿Naporai tie iparāsususe ava reh̄i cheu iyavei mbahe mbimba reh̄i? --ehi aipo Jonás upe Tūpa aracahe.

11. Tūpa omombo norte cotindar israelita yuv̄irecoi vahe oiv̄i sui (2 Reyes 15, 17)

Ipare aipo coiye oime Acab pare ambuae-ae norte cotindar iv̄i Israel pendar rerecuar. Ahe iv̄i p̄ipendar tecua ivate catu vahe ahe Samaria. Iyavei aipo evocoí iv̄i rerecuar yuv̄iroique vahe, ahe aipo ndaseco pōrai vahe pāve yepi. Inungar avei aipo Jeroboám, Acab yuv̄irecoi vahe aracahe. Ahe aipo mbahe rahanga tūpa angahu tēi rupi oguata vahe yuv̄ireco. Iyavei aipo ndov̄iroyai vahe Tūpa eté yuv̄ireco. Sese aipo Tūpa omondo oñehe mombehusar Osea Samaria ve, ambuae recua rupi 'teremombehu che porocuaita yuv̄ireco chupe' oyapave chupe viña.

Ipare aipo omundo iri oñehe mombehusar Miquea, Amós avei. Ava eta rumo aipo ndov̄iroyaiño ité yuv̄ireco.



Ipare coiye rumo aipo Tūpa upe poramba tēi cute. Evocoiyase aipo, "Tosecopiño ayase ava Nínive Asiria pendar Israel pendareta yuvireco" ehi aracahe. "Tovinosepaño ayase ivi aviyé vahe sui yuvireco. Ahe acoi amondo vahe chupe" ehi aipo Tūpa.

Ipare aipo opa Tūpa omombo imocañi tēi āgua yuvireco. Sese cūritei ndipo iri Biblia pīpe secocuer resendar yuvireco. Evocoiyase aipo ava Siria pendar yugüeru oyemboerecua āgua ivi Samaria ve Israel ivi rese. Ahe oyerure vahe mbahe rahanga upe yuvireco iyavei rumo aipo oipota avei Israel Tūpa rese yembohesa rupi oguata āgua yuvireco no. Égüe ehi aipo secocuer yuvireco, omboyeseha-seha tēi güecocuerai güeco tupri rese yuvireco aracahe.

**11. FVÍ IROHÍ COTÍNDAR JUDAS RERECUARETA,
IPÍPENDAR TÚPA ÑEHE MOMBEHUSARETA AVEI**

1. Judá rerecuar yuvírecoi vahe

Evocoiyase aipo mborerecuar Asa pare oime ambuae mborerecua-recuar tēi yuvíroique vahe aracahe no. Ahe aipo oyocuai ava ndasetai vahe fví irohí cotíndar Judá pendar yuvíreco. Amove aipo oime mborerecuar ndaseco pōrai vahe iyavei aipo oime avei ambuae avíye etepri vahe inungar David iyavei Asa. Iyavei aipo amove mborerecuar yípíndar avíye tupri vahe viña. Ipare rumo aipo sesarai Túpa sui yuvíreco inungar Salomón oyapo.

Ahese aipo Túpa omondo oñehe mombehusar rehíi ahe ava pítvíti água aracahe iyavei oyese mahenduha água oyeupi guata água avei.

2. Mborerecuar Joás avíye vahe

(2 Reyes 11-12)

Evocoiyase aipo Joás serer vahe siete aravíter vírecoseve secoi mborerecuar aracahe. Ahe chihivahemi tēi aipo viña, co rumo aipo Túpa rēta rese yangarecuar opítvíti secoi, seco tupri aracahe. Iyavei aipo tūparo opa vahe onduru, ahe aipo opa uca omoingatu.

Ipare rumo aipo omanose ahe Túpa rēta rese yangarecuar, ahese aipo Joás acoi ava Baal uper yeroquí vahe mborípar secoi. Sese aipo sesarai Túpa sui. Supive avei ava eta sesarai yuvíreco aracahe.



**3. Tūpa omboyeucua mbahe oñehe mombehusar
Isaía upe
(Isaias 6)**

Setá aravíter pare aipo oime mbia chihivahe, ahe serer Isaía. Ahe aipo ñepei arí pípe secoi tūparove oyerure aracahe. Ahese aipo osepia Tūpa güenda porañete ívate vahe haríve chinise iyavei aipo osepia avei setá Tūpa rembiguai íva pendar osapucai atí vahe yuvíreco:

--Santo, santo yande Yar opacatu ité savapípo íví pípe seco porañetesa --ehi aipo osapucai yuvíreco.

Evocoiyase aipo Isaía aipo ehi:

--¡Too, mbahe tēi eté cheu! Esepiá, che añahe
mbahe naporai vahe rese --ehi--. Asepiá rumo che
Yar --ehi aipo.

Evocoiyase aipo Tūpa rembiguai opoco iyuru
rese. Ahese Tūpa omoatiro yangaipagüer ichui.

Ipare aipo Tūpa oporāndu aipo ehi:

--¿Ava vo amondora? --ehi iyavei aipo ehi no--.

¿Ava vo osora yandeu nara? --ehi aipo Tūpa.

Evocoiyase aipo Isaía omboyeví iñehe Tūpa upe
aipo ehi:

--Co niha che aico --ehi--. Che che mundo eve
--ehi aipo Tūpa upe aracahe.

Ichuive tupri aipo Isaía osiquiyeéhisa pípe
Tūpa Ñehengagüer omombehu ava rehí upe. Ahe
evocoiyase oicove viteseve ava rehí omboaracua
oico iyavei Judá pendar mborerecuar irungatu
yuvirecoi vahe avei. Isaía cuachiar pípe oime
opacatu iñehengagüer aracahendar.

4. Mborerecuar Ezequía avíye vahe (2 Reyes 18-19)

Iyavei aipo setá mborerecuar ndaseco pōrai vahe
Judá ve chini vahe pare, ahese aipo Ezequía
mborerecuar secoi aracahe. Ahe aipo viroya Isaía,
oguata avei Tūpa rupi opacatu opíha pípe. Ahe
avei opa omocañí uca mbahe rahanga renda iyavei
opacatu sesendar mbahe oime vahe aheve aracahe.
Iyavei aipo ahe arí mborerecuar Asiria pendar
osecopí norte cotíndar ava israelita yuvirecoi
vahe Samaria rupi.

Ipare aipo mborerecuar Asiria pendar ovava pota iri Ezequía upe viña. Evocoiyase aipo co mborerecuar Asiria pendar oicuachía oñehe imondo mbahe tēi Tūpa reroirosa resendar Ezequía upe. Sese aipo ñepei pītu Tūpa oyocuai güembiguai imondo 'toyucapa sundao Asiria pendar' oyapave.

Evocoiyase aipo mborerecuar Asiria pendar ndovavaiño mborerecuar Judá pendar upe; oyevi rumo güecuave oso. Esepiá aipo, Ezequía avíye etepri mborerecuar güecose aracahe. Tahir Manasés rumo, sumino Amón avei mborerecuar yuvirecoise ndaseco pōrai yuvireco. Evocoiyase aipo Tūpa aipo ehi:

--Opara amombo iivi sui --ehi--. Esepiá, ndaseco pōrai etepri yuvireco --ehi chupe aracahe.

5. Josía oyoso Tūpa porocuaita icuachiapri (2 Reyes 21-23)

Evocoiyase aipo setá aravíter pare Amón rahir Josía mborerecuar chini aracahe. Ahe aipo avíye etepri aracahe no.

Evocoiyase aipo Josía opa tupri iri omocañi mbahe rahanga senda reseve iivi Judá sui. Iyavei aipo opa uca oyuca opacatu ipaye vahe, caruguar rese oporavíqui vahe, curi mbahe oime vaherā mombehusar yuvirecoi vahe.

Ipare aipo opa iri avei tūparo omoingatu uca. Evocoiyase aipo acoi ava omoatírose mbahe tūparo pīpe yuvireco, ahese aipo cuachiar oseca Tūpa porocuaita resendar Moisés upe omondo vahe aracahe.

Evocoiyase aipo acoi oyeroquise co cuachiar rese mborerecuar Josía upe yuvireco, ahese aipo

ndoyembovihai. Esepio aipo, nomboaviyeyi Tūpa porocuaita yuvireco. Iyavei aipo oyeroquî cuachiar rese Tūpa aipo ehi vahe:

--Acoi ndoviroyaise che porocuaita, opara amombo co ivi aviyeyi vahe sui --ehi aipo.

Evocoiyase aipo omondo Tūpa ñehe mombehusar upe icua tuprisa äqua. Ñepei cuña aipo Tūpa ñehe mombehusar Hulda serer vahe omboyevi iñehe chupe aipo ehi:

--Égue ehi etera. Esepio, oyevi-yeviño mbahe rahanga reroya äqua yuvireco yepi --ehi--. Josía rumo aipo osatisu vahe Tūpa. Sese aipo ndomombo vîtei chira ahe --ehi aipo.

Evocoiyase aipo Josía oyeroquî Tūpa porocuaita resendar opacatu Judá pendar upe.

Ahese Josía iyavei ambuae ava eta omondo setá oporerecosa Tūpa upe yuvireco. Iyavei aipo ehi yuvireco:

--Oroguatara nde rupi opacatu dre pihañemoñeta tuprisa pipe --ehi aipo Tūpa upe yuvireco.

Josía mborerecuar secose Judá ve, aheve avei yuvirecoi Tūpa ñehe mombehusar Jeremía, Habacuc, Sofonías. Ahe ava yipindar yuvirecoi aracahe.

6. Tūpa oiporavo Jeremía oñehe mombehu äqua (Jeremías 1.7, 11, 26)

Aracahe aipo oime avei mbia chihivahe Jeremía serer vahe. Ahe aipo ndaseco asti vahe, osiquiye vîte vahe avei.

Ipare rumo ñepei ari pipe Tūpa aipo ehi chupe:

--Nde eresora che Ñehengagüer mombehu ava eta upe opacatu ivi rupi --ehi aipo chupe aracahe.

Ahese aipo Jeremía omboyevi iñehe Tūpa upe aipo ehi:

--Che ndaicatu tupri i añahe. Esepiá, che chihivahe vîte aico --ehiño aipo.

Ipare rumo aipo Tûpa aipo ehiño chupe:

--Nde eresora eremombehura opacatu acoi amombehu vahe ndeu --ehi chupe--, iyavei nderesiquyei chira que ava sui --ehi aipo chupe.

Ipare aipo Jeremía oso Tûpa Ñehengagüer mombehu güecoetes a pípe.

Josía oicove vîteseve, avíye vîte Jeremía upe. Ipare rumo aipo Josía rahir ndaseco pôrai vahe mborerecuar yuvirecoi. Ahe aipo oyerure mbahe rahanga upe têi yuvireco. Evocoiyase aipo ndasori i Jeremías upe yuvireco aracahe. Esepiá, aipo oñahe pírata ahe mborerecuar upe yangaipa rese.

Evocoiyase aipo Jeremía oñahe ava upe tûparo roquendipive aipo ehi:

--Acoi ndapeguataise Tûpa rupi, ahese pe amotaréhîsar pe recopira yuvireco --ehi aipo--. Iyavei peicora ipovri ve sembiguairâ têi. Iyavei opara imondurusa co tûparo, tecua avei ocaira --ehi aipo.

Aipo ihese, mborerecuareta omboasi iteanga yuvireco iyavei oyuca pota yuvireco no. Ahese Jeremía aipo osiquiyeéhisa pípe ité aipo ehi:

--Che yucaño ayase peye --ehi aipo.

--Acoi peyapose co nungar cheu, ahese Tûpa ommondora oñemoirosa pêu --ehi aipo chupe yuvireco.

Aipo ihese, opoiño yuvireco ichui. Ipare rumo aipo ndoipota iri tûparove seique yuvireco aracahe no.

7. Mborerecuar Joacim osapí Tūpa ñehe cuachiapí (Jeremías 36)

Ipare aipo Jermía, "Erio" ehi Baruc upe 'toicuachía Tūpa ñehe' oya aracahe. Evocoiyase aipo Baruc oicuachía opacatu Tūpa omombehu vahe Jermía upe. Ahe aipo omondo mborerecuar Joacim upe yuvireco, ahe imondore rumo oñemi voiño yuvireco ichui. Evocoiyase aipo ahe cuachiar vīroyeroquise mborerecuar Joacim upe yuvireco, ahese aipo ahe osendu raimi aipo omombehu vahe cuachiar pípe yuvireco:

--Aipo mborerecuar Babilonia pendar oura opara omocañi co tecua Judá rupindar --ehi--. Iyavei ava eta opacatu tupri oipisira --ehi.

Osenduse aipo ñehesa, mborerecuar omboasñño.

Ahese aipo seroyeriquipri tupriño oyasía ichui, ahe aipo omondo tatave. Ichui aipo oyeroquínō vīte. Mborerecuar evocoiyase ndosendu potaiño ité iyavei ndoviroyai Tūpa ñehe. Sese oyasía-sia quisemi pípe imondo tatave.

Égüe ehi aipo Jermía remimondo Tūpa cuachiar rapipa. Ipare rumo aipo Jermía Baruc rese oicuachía iri yuvireco ahe ñehesa. Oicuachía iri avei aipo ambuae ñehesa mbahe-mbahe tēi Tūpa suindar oime vaherā mborerecuar Joacim upe. Esepio, ahe niha ndaseco pōrai vahe.

Ipare aipo Tūpa omboavíye ité oñehe yuvireco chupe cute. Mborerecuar Babilonia pendar opa ité ava rehīi Judá pendar oipisí uca. Ahe aipo opa vīnose Judá sui seraso güecuave yuvireco. Iyavei imonda aipo setá mbahe tūparo pendar avíye vahe rese yuvireco aracahe.

**8. Jeremía imombaraīsusa Tūpa ñehe
mombehu sui tēi
(Jeremías 37-38)**

Yipindar rumo aipo opūha ambuae mborerecuar co tecuave aracahe. Acoi osése aipo Jeremía co tecua sui, ahese aipo ehi ava yuvireco chupe:

--Oyemboya pota yande amotarēhimbár rese cute --ehi aipo yuvireco.

Aheseve voi aipo oipisí osoquenda yuvireco.

Setá arí pare aipo, ñepei arí pípe mborerecuar oichoho uca oyeupe 'taicua mbahe Tūpa suindar' oyapave.

Evocoiyase aipo Jeremía aipo ehi chupe:

--Mborerecuar Babilonia pendar pe recopíra --ehi aipo--. Evocoiyase peyemondopaño chupe, ahese ndape yucai chira yuvireco --ehi aipo Jeremía chupe viña.

Ahese aipo mborerecuareta omboásí catu Jeremía upe yuvireco. Evocoiyase aipo oporandu rane mborerecuar ivate catu vahe upe yuca água rese yuvireco. Ahese aipo mborerecuar aipo ehi yuvireco chupe:

--Avíyeño, peyapoño mbahe chupe --ehi aipo.

Evocoiyase aipo omondo ivicuar ipicucú vahe pípe 'tomano' oya yuvireco viña. Aheve aipo Jeremía iparaísu tipisa catusave ocuisse oso. Iyavei aipo ndocarui.

Ipare aipo oime ñepei avaū oiparaísuereco. Evocoiyase ahe oporandu mborerecuar upe senose água rese. Ahese aipo mborerecuar,

--Avíyeño, enose --ehi aipo chupe aracahe.



12. JUDIO ETA BABILONIA VE YUVIRECOI

1. Judá pendar ipisipri yuvireco (Jeremías 39)

Moviro yasi pare yuguero mborerecuar
Nabucodonosor Babilonia pendar opacatu sundao eta
reseve Judá ve secopi āqua aracahe.

Evocoiyase aipo opa omonduru tūparo. Iyavei
opacatu mbahe eta vireco vahe Judá pendar yuvireco
vīnosepa yuvireco ichui iyavei aipo tecua opa
tupri osapi yuvireco.

Evocoiyase aipo mborerecuar Judá pendar resa
opa vīnose ichui ipare oñapichi carena pīpe seraso
yuvireco Babilonia ve opacatu ava eta reseve.
Ahese moviro tēi aipo ava opita iparaīsu vahe cove
rāro āqua yuvireco. Jeremía upe rumo aipo

ndoyapoi mbahe yuvireco. Oseyáño co tecuamive ava iparaísu vahe piri yuvireco.

Evocoiyase aipo ichuive tupri omombehu iri Túpa Ñehengagüer oico ava upe. Iyavei oyaseho etepri acoi omu serasopri rese iyavei tóparo, tecua mocañsa rese. Sese aipo, "Túpa ñehe mombehusar oyaseho vahe" ehi yuvireco chupe aracahe.

Ahe iñehengagüer, iyerure agüer avei oime Jeremía cuachiar pípe.

2. Judío yuvirecoi vahe soquendapri Babilonia ve (II Crónicas 36; Jeremías 29)

Evocoiyase ava Judá pendar soquendapri yuvirecoi tecua Babilonia ve aracahe. Ahe Túpa poronupasa oipisi vahe yuvireco. Esepiá aipo, mbahe rahanga upeño vié oyerure yuvireco.

Evocoiyase aipo ava Babilonia pendar, "Judío" ehi yuvireco chupe. Esepiá, ahe Judá pendar yuvirecoi vahe.

Ahe judío aipo ndovihai yuvireco. Esepiá, oyevi pota ité güecuave yuvireco.

Ipare rumo aipo Jeremía oicuachía oñehe imondo yuvireco chupe aipo ehi:

--Peico tupri Babilonia ve --ehi--. Pemboetei Túpa. Pemboetei rene mbahe rahanga tēi --ehi aipo--, iyavei peyerure Túpa upe opacatu pe píha pípe. Evocoiyase Túpa pe reroyevípara pe recuave 70 araviter pare --ehi aipo ava Judá pendar upe Jeremía.

Túpa oyocuai oñehe mombehusar Ezequiel ava judío soquendapri yuvirecoi vahe upe iñehe água. Ezequiel aipo setá mbahe ndayasepiai vahe Túpa

remimboye cuia ose pia iyavei aipo omboviha iri omu judío. Evoco iyase aipo ava judío Tūpa eté rese oguata pota iri yuvireco.

Ahese aipo Ezequiel aipo ehi:

--Tūpa omondora oporonupasa acoi ava judío mara-mara tēi vireco vahe upe --ehi aipo.

Ahese aipo mborerecuar Nabucodonosor Babilonia pendar avíye tupriño aipo ava Judá pendar upe. Iyavei aipo iñiguā omundo yuvireco chupe. Oiporavo judío pāhu pendar mbia chihivahe avíye catu vahe imbohe äqua mborerecuar yuvirecoi vaherā Babilonia ve yuvireco. Ëgüe ehi aipo aracahe.



3. Daniel recocuer (Daniel)

Iyavei aipo Daniel recocuer aracahendar mbosapi induguer yuvirecoi vahé rese, ahe aipo icatupri güerai yuvireco. Iyavei aipo ipirata, imbahecua etepri yuvireco. Sese aipo mborerecuar Babilonia pendar oiporavo imbohe áqua mbosapi aravíter rupi 'tovireco omborerecuasa yuvireco' oya.

Iyavei aipo oiporavo setá mbia chihivahé judío yuvirecoi vahé. Egüe ehi aipo mborerecuar ava imbahecua vahé upe.

Evocoiyase aipo mborerecuar omoingatu uca vino, mimoi avíye vahé opacatu ava oyembohe vahé upe nara viña.

Daniel rumo aipo ehiño chupe:

--Che iyavei ambuae che nduguer ndoroíhui chira co vino iyavei ndorohui chira co mimoi (mbahe rahanga upe imondopri) --ehiño aipo.

--Eyapomi mbahe icatupri vahé oreu. † tēi embouñomi toroíhu, mbahe ihupri güeraño tēi avei --ehi aipo guárosar upe.

Ipare aipo diez arí pare sárosar osepiase Daniel ambuae mbosapi induguer rese, ahe aipo nimarai catu opacatu ambuae oyembohe vahé sui. Sese aipo omundo ucaño ité † toíhu iyavei mimoiñomi tēi aipo.

Ichui aipo Túpa omundo yaracua tupri áqua yuvireco. Ipare aipo co mbosapi aravíter pare, Daniel ambuae induguer mbosapi yuvirecoi vahé, ahe aipo imbahecua catu opacatu ambuae oyembohe vahé sui, mborerecuar rupindar imbahecua vahé sui iyavei aipo ipaye vahé mbahe oime vaherá cuapar sui yuvireco. Sese aipo mborerecuar omundo Daniel

mborerecuarā indugüer reseve Babilonia ve.
 Evocoiyase aipo setá aravíter rupi ēgue ehi iyavei
 aipo amove ambuae yuvíroiquese mborerecuar güeco
 água, ahe avei aipo Daniel omboaracua aracahe.

4. Mborerecuar Nabucodonosor recocuer (Daniel 2)

Mborerecuar Nabucodonosor aipo ñepei pítu
 iquerai aracahe. Sese aipo añihiveive opacatu
 oichoho uca ipaye vahe, ahe chupe aipo aipo ehi:
 --Pisa chequerai --ehi aipo--. Ahe che
 mbosiquíyé iteanga. Opa rumo cheresarai che
 querai agüer sui --ehiño aipo.

Evocoiyase aipo ehi:

--Che aipota pe pemombehura che querai agüer
 cheu --ehi--. Acoi ndapemombehuise cheu, che
 opoyucara --ehi aipo chupe.

--;Aní, ore rerecuar! Esepio, ndipoi eté que
 ñepei ava co íví pípe oicatu vahe ambuae ava
 querai agüer cua áqua yepi; Túpaño íté oicua vahe
 yuvíreco yepi --ehi aipo yuvíreco chupe.

Evocoiyase aipo oñemoíró iteanga; sese aipo,
 "Tayucasapa mbahe cuapar" ehi viña. Daniel rumo
 aipo ehi chupe:

--Ore rāro rane eve --ehi.

Evocoiyase aipo Daniel ambuae ondugüer reseve
 oyerure yuvíreco Túpa upe. Ahese aipo Túpa ombohe
 opacatu mbahe rese Daniel aracahe.

Ichui aipo Daniel ahere ayihive oso chupe aipo
 ehi:

--Che ndahei imbahecua vahe aico --ehi--. Túpa
 tēi rumo omboyecua nde querai agüer cheu, ipare
 omboyecua mara oya --ehi aipo Daniel chupe.

Evocoiyase aipo Daniel omombehu opacatu chupe. Iñehe renduse aipo ndoyembovihai aipo ehi Daniel upe:

--Supi eté nde Tūpa opacatu ambuae tūpa Yar iyavei opacatu mborerecua-recuar tēi rerecuar no --ehi--. Ahe niha oicua opacatu mbahe ndicuasai vahe --ehi aipo Daniel upe.

Evocoiyase aipo mborerecuar omondo Daniel mborerecuarā opacatu Babilonia pīpendar upe. Iyavei opacatu imbahecua vahe rerecuarā aipo aracahe. Ěgue ehi mborerecuar Nabucodonosor recocuer aracahe.

13. JUDIO GÜECUAVE YUVIRECOI IRISE

1. Judío oyevi güecuave yuviraso (Esdras 1-3)

Evocoiyase aipo 70 araviter rupi judío yuvirecoi Babilonia ve. Iyavei ndoyerure iri mbahe rahanga tēi upe yuvireco aracahe. Ahe rumo aipo oyerure Tūpa eté upe opacatu opīha pīpe yuvireco.

Evocoiyase ambuae mborerecuar Ciro Persia pendar aipo aipo ehi:

--Tūpa aipo ehi cheu: "Emopuha tūparo Jerusalén ve" ehi. ¿Uma vo aipo judío oyevi pota vahe Jerusalén ve yuvireco? --ehi aipo.

Evocoiyase aipo judío eta oviharete yuvireco. Daniel rumo aipo cuacuami eté, ndoicatu iri oguata pucu āgua. Sese opīta.



40.000 judío rumo aipo oyevi güecuave yuvireco. Evocoiyase aipo mborerecuar opacatu mbahe avíye vahe vîraso vahecuer judío tûparo pendar, ahe opa iriomboyevi yuvireco chupe. Iyavei ava Babilonia pendar avei omondo ati-atí aipo oro, guareepochi ava upe no.

Yipindar acoi iparaísu güerasose güecua Judá sui yuvireco. Ichui rumo aipo mbahe yar oyevi yugüeru güecuave. Ahese aipo oviharete yuvireco aracahe. Ipare aipo acoi oyepotase Jerusalén áchisa viapi agüerve, omopuha mbahe seropovëhesa renda yuvireco Tûpa upe nara. Evocoiyase aipo aheve arí yacatu osapi oporerecosa yuvireco Tûpa upe. Añihivei, caharuse avei aipo, Moisés ocuaisa rupi eté egüe ehi yuvireco.

Ichui aipo amar pītuhu pīpe omboīpī tūparoguā
apo, omboīpī avei tecua mopuha iri yuvīreco.
Opacatu avei ovīharete yuvīreco aracahe.

2. Omopuha iri jūdío tūparo yuvīreco (Esdras 3-6, Hageo)

Evocoiyase aipo ava tecua Jerusalén ívīrindar
upe naporai judío yevīpa yuvīreco aracahe. Ahese
aipo oyapo opacatu mbahe imombīta uca āgua
yuvīreco.

Ipare aipo Asuero secoise mborerecuar Persia
ve, ahese aipo Jerusalén ívīrindar oicuachía oñehē
imondo yuvīreco chupe aipo ehi:

--; Imboeteisa mborerecuar Persia pendar! Acoi
oyapo irise judío tecua Jerusalén, ahese nande
reroya iri chira --ehi--, iyavei ndomondo iri
chira guareepochi ndeu no --ehi aipo.

Evocoiyase aipo mborerecuar Asuero oicuachía
iri oñehē aipo ehi:

--Ndoicatu iri mboravīquī apo yuvīreco --ehi.

Coiye aipo oique mborerecuar güeco āgua Darió,
Persia pendar. Evocoiyase aipo Tūpa ñehe
mombehusar Hageo oporandu ava eta upē:

--¿Mahera pe tūparo mopuha vīteēhīseve peico oī
aviye vahe pīpe? Pemopuhaño, ahese Tūpa pe
rovasara --ehi aipo yuvīreco chupe.

Ipare aipo judío omboīpī voi eté oporavīquī
yuvīreco. Evocoiyase aipo ava tecua ívīrindar
omboasī aipo ehi yuvīreco chupe:

--¿Ava vo, "Peyapo co" ehi pēu? --ehi yuvīreco
chupe.

Evocoiyase rumo aipo mborerecuar Dario omondo
iri oporocuaita yuvireco chupe aipo ehi:

--Peyapoño evocoí mboraviqui mborerecuar Ciro
pe cuaisa rupi, pemomba rane ité --ehi aipo Dario
chupe.

Iyavei aipo ehi no:

--Opacatu pe recua ivirindar pe pitivitira
yuvireco guarePOCHI pípe iyavei oporerecosa pípe
--ehi aipo.

Coiye aipo opa omboavíye yuvireco cute.

3. Esdras oporombohe Túpa Ñehengagüer rese (Esdras 7-10)

Ipare aipo Esdras oso oguata Babilonia sui
Jerusalén ve. Aheve aipo oicua amove omu judío
menda cuña ndahei vahe judío rese yuvireco.

Iyavei ahe cuña oyerure vahe mbahe rahanga tēi upe
yuvireco. Evocoiyase aipo Esdras aipo ehi
yuvireco chupe:

--Iyacatu ndapeyapoi chira evocoí nungar
--ehi--. Pe rumo peicora Túpa upendar ité
--ehi--. Iyavei ndapemendai chira acoi mbahe
rahanga tēi upe oyerure vahe rese --ehi aipo.

Ahese aipo opa oyepépi evocoí nungar cuña sui
yuvireco.

Ipare aipo Esdras oyeroqui Túpa Ñehengagüer omu
eta upe iyavei oipitivití Túpa remimbotar rupi
iguata tupri áqua yuvireco. Ahe aipo ita guasu
harive ihái imombehu. Evocoiyase ava eta aipo
opacatu sendu áqua omboapipo tupri ocar yuvireco.
Egüe ehi aipo ava yuvireco aracahe.

4. Nehemías omopuha Jerusalén āchisa (Nehemías)

Evocoiyase aipo Nehemías ambuae mborerecuar rembiguai Persia ve secoi aracahe. Ahe aipo Jerusalén āchisa viapipa oyandu iyavei ava tecua ivirindar mañeco tēisa aracahe.

Sese aipo Nehemías oporandu mborerecuar upe oso āqua 'tamopuha uca iri' oya. Evocoiyase oyepotase oso oporaviqui āguave, ahe aipo omonguerēhi opacatu ava iporaviqui pīrata āqua yuvireco.

Evocoiyase aipo tecua ivirindar oseca catu mboraviqui mocañi āqua yuvireco. Yipindar aipo iñehe-ñehe tēi chupe yuvireco viña. Ndoviroysiño rumo yuvireco.

Ipare aipo yamotarēhisar aipo ehi Nehemías upe yuvireco no:

--Nde ereyapo pota co tecua 'mborerecuar taico' nde yapave --ehi aipo yuvireco chupe.

Evocoiyase aipo oamotarēhimbar upe aipo ehiño:

--Evocoi ndahei supi vahe --ehi.

Ipare coiye aipo opacatu ambuae tecua rupindar ipīhañemoñeta yuvireco 'yavavara judío upe' oya yuvireco. Nehemías rumo aipo ehi ava upe:

--Toime imahemoha vaherā. Opacatu ambuae evocoiyase toporaviquiño --ehi.

Iyavei aipo ehi no:

--Ñepei pe po pīpe peporaviqui --ehi--. Ambuae pe po pīpe peipisí quise pucu --ehi ava upe.

Coiye aipo yamotarēhimbar yuvirecoi vahe, "Yayemborīra sese" ehi aipo yuvireco viña. Nehemías rumo aipo, "Aní" ehiño ité. Ipare coiye aipo opase mboraviqui omomba yuvireco cute, ahese

yamotarēhimbareta iquiriri tupriño yuvireco.
Esepiá, ahe oicuaño Tūpa oipitivise iporavíquisa
rese.

Evocoiyase aipo Nehemías mborerecuar secoi
Jerusalén ve doce aravíter rupi. Ipare aipo oso
iri Persia pendar mborerecuar upe mbahe mombehu.
Ichui aipo oyevi Jerusalén ve aracahe.

5. Malaquías omombehu yande Yar yu água (Malaquías)

Aracahe aipo oime mbia Malaquías serer vahe.
Ahe aipo ipa vahe Tūpa ñehe mombehusar, ahe aipo
ehi:

--Icuerai tēi Tūpa pe yeruresa rese iyavei pe
porerecosa rese --ehi aipo--. Esepiá, pe
ndapeyapo iri mbahe opacatu pe pīha pīpe chupe
nara --ehi--. Iyavei ava iparaísu vahe mara-mara
tēi pereco. Taetru yande mu pahi yuvirecoi vahe
naporai catu opacatu sui, ahe ombohe opacatu
mbahe-mbahe tēi rese ava yuvireco iyavei aipo,
"Tūpa ndayande repiai chira yayapose opacatu
mbahe-mbahe tēi" ehi yuvireco viña --ehi aipo.

Evocoiyase aipo aipo ehi icuachía no:

--Tūpa aipo ehi: "Che amondora che ñehe
mombehusar Elía ava recocuer moingatu água che
renondeve" ehi. Ipare yande Yar oura avíyeteramo
tēi otúparo upe --ehi aipo Malaquías omu judío eta
upe aracahe.

**14. JESUS YU RENONDE OPA 400 ARAVITER
MALAQUIAS PARE**

Evocoiyase aipo Malaquías pare 400 aravíter rupi judío yuvirecoi güecuave ité Jesús ha renonde aracahe. Iyavei aipo amove ndahei ambuae ava povrīve yuvirecoi. Setá rupi rumo aipo ambuae tecua pendar povrīve tēi yuvirecoi aracahe.

Ipare coiye rumo aipo co romano osecopipa ité yuvireco, ahese aipo mborerecuar Roma pendar omondo Herodes ava judío eta rerecuarā.

Herodes evocoiyase vireco mara-mara tēi ava, amove rumo ava ombovīha pota.

Ahese aipo tūparo cuacua ité cute. Sese aipo Herodes opa uca omombo. Ipare rumo aipo oyapo ambuae tūparo ipiasu, icatupri vahe.

Ahese aipo ava judío yuvirecoi vahe upe avīye etepri tūparo piasu. Evocoiyase aipo judío pahi aheve oyapo porerecosa Tūpa upe añihivei, caharuse avei. Ēgūe ehi aipo ava yipindar yuvirecoi vahe recocuer aracahe yepi.